

近代中國史料叢刊第四十一輯

沈雲龍主編

蜀  
燹  
述  
略

余鴻觀著

文海出版社印行

蜀  
燹  
述  
畧

蜀  
燹  
述  
畧

蜀  
燹  
述  
畧

序

班志雜家之後敍引小說謂其源出稗官綴而不亡蜀藁足采洵屬定論是編網羅散佚臚采舊聞戢臬獍之兇鋒表忠貞之潛德洵足扶聖風化廉立懦頑其志乘不及之條褒崇尙闕之典得免湮沒以俟將來尤仁人君子之用心也閱竟爰弁數語而歸之


四川督學使者歷城吳樹棻譔



序

光緒己亥予守成都時郡試得士金堂余生潤拔前茅抄呈生父鴻觀字蘭閣所著蜀燹述略多紀咸同間川省糜爛死節事往覆瀏覽深欽其有關世道人心而未識蘭閣之爲何許人也明年庚子請咨入都正值拳匪肇亂死者枕籍不下千萬其間忠孝節烈曷勝枚舉事後追論闡發幽光更不可無燕許其人辛丑由行在覲見事畢宦遊舊地權篆嘉陽適蘭閣廣文攝夾江司訓來見攜前蒞嗣所呈已刊成書再加披閱竊幸文字有緣維風化而起人心將於是書是賴而當時州縣采訪竟遺之不以爲多事卽目爲具文吁

通家寅愚弟王明德拜讀



Handwritten text in a vertical column on the right side of the page, possibly a page number or a reference code. The text is difficult to read due to its orientation and the quality of the scan.



序

歲己亥余補官夾江其明年秋金堂余君爛谷來攝司訓恨相見之晚久之出示所輯蜀變述略余受而讀之歎其存心之厚而用意之深也方藍李諸逆之蹂躪川中文武死事者所在多有其間老弱男女無辜而罹於鋒鏑尤難更僕數夫其飲刃齒劍甘之如飴而卒不爲賊誘不受賊污者固天地間氣之所鍾亦由我國家教養之深漸摩之久淪肌浹髓故能收效之至於斯事平後大憲廣爲蒐羅輯成忠義錄其表章之意誠急急矣顧其書浩繁人或不能盡閱余君以布帛菽粟之理寫忠孝義烈之行事必求其實文無取乎繁以視于寶之搜神任昉之述異其得失爲何如哉吾知此編一出必有激發天良而頑廉懦立者請以斯言爲他日之券


教弟申麟頓首拜序



序

太上立德其次立功其次立言三者並著不朽而吾謂立德立功不有言以紀其實行將湮沒而不彰學博余公瀾谷學粹品端才優治世小試牛刀司訓吾邑乃出示所輯蜀燹述畧一書備載李藍石逆擾蜀情事前後四五年蹂躪各州縣其間忠臣孝子義士烈婦慷慨殉難之狀覺生氣踴躍於行間或曰公之所述半紀於忠義總錄矣不知忠義總錄僅著姓名不詳事實閱者易爲掩卷此編事蹟里居原委備悉展讀之餘死者顯而生者慕行見天下之大萬類之繁盡化爲忠孝義烈矣此其功爲何如功此其德爲何如德功德不可量又豈僅立言云爾哉時光緒辛丑清和月浴佛日

世愚弟王德忠謹識



江奐莊鄉察覆函

瀾閣仁兄大人閣下頃接來函并黑揚前明臥碑一紙均已收悉所有蜀葵述畧一書分爲忠孝義烈四項足見有志表章潛心著述洵足勵頹俗而闡幽光當飭本局員紳三名在忠義總錄內逐細查對業已刊入七百餘名其餘二百數十名亦在各州縣志書查出尙有四十餘名俟行查明確申覆到日再爲酌辦可也特此布復並頌文祺附完芳版不備愚弟江希曾頓首

皇朝文獻通考

自序

昔歐陽存一云天下未亂蜀先亂天下既治蜀後治蜀似治日少而亂日多邵康節云天下將亂惟蜀獨安蜀又治日多而亂日少然則治亂何常之有哉亦由人心善惡召之耳明季獻賊之禍衣冠文物半委青羊然當時費此度彭警泉諸公猶有紀載以備勸懲我朝定鼎以來時和年豐人民安堵承平既久遂滋嘯聚之徒嘉慶元年達州教匪滋事蹂躪數省石香村居士著有戡靖教匪述編蓋遵欽定平定教匪紀略一書而演述之也咸豐九年滇匪李際二逆竄蜀塗炭四十餘州縣髮逆石偽翼相繼窺邊必欲逞志於蜀協揆駱文忠公進督川疆運籌帷幄不數年間以次蕩平然值賊勢猖獗時凡忠臣孝子義士烈女殉難者不可勝紀國家褒忠表節典禮優崇賊平後飭各府廳州縣續修志乘立采訪局體恤之恩有加無已然其時地方初經兵燹有無從籌款而遂寢其事者有糜費數年而未成書者有書既成而采集未多附會不實者無惑乎忠魂毅魄多淹沒於石爛海枯時也今蜀郡承平三十餘

年矣迴憶少小時身歷韓灘劫火目睹濠水烽煙士女此離人民勞苦得諸見聞彙書簡冊已哀然成帙焉復訪求近人所著詩文雜集有關蜀亂者雖片玉零金無不采錄上自朝廷員弁下至閭巷士女凡以身殉難者均略紀其行誼事蹟大旨以忠孝義烈爲準他如名流議論隱逸詩章九流讖語四方災祥鬼力神功死離生合怪怪奇奇怵人心目其與本專有涉者卽附錄於後以備參攷年來幕游兩川南北歷綫勞人已將此編束之高閣矣繼又奉調尊經書院治經之餘日以帖括爲業乃屢薦不售僅以明經試用學博近承乏同文書院講席復取舊篋所藏而編次之卽以忠臣孝子義士烈女分爲四部都爲一集草創成名曰蜀變述略蓋謹述舊聞而略紀之仍不免望漏之譏耳夫今之崇尚兵法者莫不推重軍火利器然必施放得人而後利器皆爲我用使無披肝瀝膽舍命不渝之士雖有利器亦委以資敵而已可知培養正氣之說並非老生常談誠爲今日之急務也伏冀維持風教留心經濟者匡其不逮補其遺失則幸甚時光緒甲午嘉平月東坡生日澣村余鴻觀自識於蟠



溪草堂之栖碧齋

明季臣各一自序

七



說例

一是編錄分忠孝義烈四部忠部編列文武員弁之沒於戰陣者鄉紳團勇殺賊隕命者編入義部孝子孝婦烈婦烈女臨難捐軀者編入孝烈二部四者苟非以身殉難概不收錄竊仿濡須汪氏史外體例彼積勞病故者不敢濫登矣至於駱文忠公薨於位雖與殉難者有別然殄夷巨寇盡瘁鞠躬死而後已較殉難之功尤大謹述其事於卷首并錄奏疏二摺見蜀難所由平也

一嘗博采近事羣書暨各州縣續志凡載有李藍石各逆擾蜀情事或數篇或一二條摘錄其言之有涉於各傳事實者增存於後以備勸懲然必標出作者姓名書目非惟不敢掠美且欲以徵實也

一奏稟城防諸紀及近人詩文雜集有備錄全文者有篇幅較長僅摘取大意者蓋限於集隘不能畢登耳

一滇匪之亂身所經歷流離轉徙間凡殉難士女有得諸鄉老傳說者有得自賊營

逃歸口述者概筆誌之原爲瘠苦州縣無費修志貧賤鄉民無力舉報久恐遺沒故搜采備錄是於所見諸書外又參以當日之見聞也

一大和酒妓編入烈部以其一節可取也巫山道士遂寧和尚編入義部不以方外見棄也蓋謂梟獍肆惡人人得而誅之耳

一余曩時襄校章山官舍獲見浙江江西忠義總錄均有表有傳此編雖有傳無表然排纂次序始於咸豐己未終於同治癸亥大指亦以年分爲先後至孝部士民後附列婦女義部士民後附列方外則另以婦女方外殉難之年爲先後使閱者一目了然

一非史官不應爲人作傳故於各篇題目謹書官爵姓字不敢添書傳字其述事則仍傳體也

一是編旣以蜀燹命名則所述皆李蓋石三逆并同時土匪兵燹實事搜采十餘年而成外此無關兵燹者概不收錄恐自亂其例耳

一編中所載官紳士女就其事蹟昭著死難尤烈者各爲傳紀其餘團丁散勇鄉民村婦遇賊被害僅有姓名堪稽全無事實可紀者已彙入忠義總錄中茲不備載

一每篇後間有論斷或自據臆見或仍時賢舊說總以勸善爲主冠首皆標出姓字以示區別

一阮文達國史儒林傳皆就各家紀述集句成篇仍分注所出於下彭尺木名臣儒行吏蹟述皆注明所出之本於篇末李雨村淡墨錄亦間有注明所出之處是編附錄諸家紀載始標出姓名書目其各篇事實所采私家底本或已梓行或未成集或得諸當日目見耳聞故不暇一一注明所出云

一事貴傳信一人見聞有限有耳目未及者有及之而考核未確姑闕以待者原本收采較多惜爲友人攜之外省尙未歸還茲刻只就行篋所存附本編次成書其所錄僅及原本之半俟原本歸還再爲續刻伏冀同志諸君子廣爲搜羅惠寄寒齋當即補入

鴻觀再識

駱文忠

駱公諱秉章、號籟門、廣東花縣人、道光壬辰翰林、由編修洊升侍御、以清廉直亮稱、戊申由侍講外補湖北臬司、己酉遷貴州布政使、調雲南藩司、庚戌授湖南巡撫、咸豐元年辛亥幫辦湖北軍務、旋仍巡撫湖南、六年丙辰冬賞戴花翎、八年戊午春賞加頭品頂戴、十年庚申九月膺督師援川之命、十一年辛酉七月實授川督、同治元年壬戌賞加太子少保銜、癸亥加太子太保銜、甲子夏賞給一等輕車都尉世職、並賞戴雙眼花翎、六年丁卯夏任協辦大學士、冬十一月中旬以軍務積勞薨於任、壽七十有五、遺摺具聞、天子震悼、追贈太子太傅、加恩予諡、入祀京師賢良祠、併於四川湖南兩省建立專祠、生平政蹟、宣付史館立傳、謹按公生平政事之尤大者、在督辦兩湖四川軍務二端、而弭事底定、更關係天下大局、戡靖之功、似尤偉云、自道光庚戌、湖南李元發亂作旋平、粵西髮逆乘間起、不一月、直由永安破武昌、湘皖、窟據金陵、騷動大江南北、其中狡悍善戰者、僞翼王石達開尤甚、咸豐戊巳、滇匪藍季士

匪張何、販煙殺郡、因事竊發、蜂聚蟻屯、攻城殺將、承平日久、民不知兵、變起倉猝、莫解爲計、自己未秋九月中旬、至於辛酉夏五月中旬、日聽賊匪擁衆二三十萬、出沒殺瀘順保潼縣資簡富隆邛眉間、蹂躪四十餘州縣、流毒生民幾三載、是時公奉朝命、督師援川、率所部知府黃澹熙等營五千一百人、由沙市上駛、行抵萬縣、謀知順慶圍急、卽飭澹熙率所部果毅營、先馳順慶、斜出定遠解圍、立將首逆何國梁生擒正法、救出難民萬餘、軍勢大振、詎賊詭作村氓、誘黃深入二郎場、四路設伏、黃中賊伏、於層阿斜谷間、爲賊顛害、公在大竹得報、師次順郡、收合將士、撫摩激厲、士氣復振、是役也、公於是年辛酉四月十七日抵萬、黃以五月十四夕陣亡、雖少有摧折、而我軍傷亡、不過百餘、殲賊不僮千計也、以同知曾傳理統帶黃軍、諭加持重、維時藍逆朝鼎、圍攻縣州、李逆永和、陷踞青神、各統衆十餘萬、公審定地勢、一面咨署提督蔣玉龍以兵牽制李逆、一面咨商署督學將軍、會調湘果營總鎮胡中和、何勝、必蕭慶高等、率所部六千人、進紮縣州之朱家橋、分三路進撲東嶽廟賊壘、檄副將唐友



耕、率所部由石橋鋪進擊其左、副將彭太和、由桑林壩進擊其右、同知曾傳理、劉德謙、各率所部進攻榜山十賢堂賊壘、分勦塔子山西山觀賊巢、檄州判顏佐才、率所部從新店子進攻其東、調在籍道員張由庚、武舉傅鴻勳、勒所部扼橋樓場、以防該逆出竄保甯一路、飭副將虞又熊、勒所部扼魏城驛、以遏該逆出竄梓潼劍州一路、飭知府宣維禮、都司姚懷玉、督率團練、分紮中壩場、翠坪各險要、爲狙擊鷓鴣計、絲州牧唐炯、蠟丸密稟、蓋逆精銳、悉萃州南東嶽廟塔子山榜山等處、其輜重則在州西之西山觀、北之龜山桑林壩、東之雲屏山等處、與探符合、期定八月初一日、八路同時齊進、公於十月二十六日、移駐潼川府城、策應會勦、期至、各營俱於五更出隊、劉德謙曾傳理、率隊至塔榜兩山下、見賊旂林立、已列隊山腰、我軍猛擊、賊屹不動、遂分軍夾擊前後、賊駭、退入壘、我軍擲火箭火彈、扼其壘門、賊不得出、遂焚賊壘九座、逆黨悍目、冲突枕藉、同歸一炬、曾傳理即以分勦榜山十賢堂之師、抄逼賊之餘壘、賊棄壘投涪江下竄、適劉德謙亦以分勦塔山之師、沂江而上、前後夾攻、胡何蕭

等軍進攻東嶽廟、賊列隊出迎、中右兩路獲勝、左陣堅不動、胡幾爲賊乘、幸中路分隊擊走、時賊營著火、煙焰蔽天、其有未盡火者、曾傳理復擲火器、炎上隆隆、忽大雨傾注、火器盡濕、弁勇身無乾縷、不得已收隊、而顏佐才一軍之進攻西山觀者、亦爲暴雨所阻、未獲全功、越五日雨止、藍逆自燬東嶽廟餘壘、移踞西山觀、十一日逆復縱火焚龜山及桑林壩各集渡涪水、悉聚於青衣壩一帶、連營二十餘里、列營七十餘座、時西山觀青衣壩兩處、偵知賊約八九萬人、旋飭各營循東嶽廟上下、多造浮橋濟師、賊來撲者、均被擊退、橋成晴霽、飭彭太和等、由扁堆山分三路趨西山觀之後、據上游以擊其背、而以劉德謙顏仕才兩軍循涪江直上、以遏青衣壩之衝、曾傳理獨率所部、趨沈家嘴攻其前、期定十四日辰刻、同時並舉、豫計該逆若敗、勢必西竄、安什彭諸縣、先飭曾傳理審賊竄動、卽由羅江繞赴縣竹之符箕灘、防賊奔竄彭縣、飭劉德謙督所部繞扼縣竹城外、防賊旁走什邡、以胡中和等營乘機從略坪場截擊、以分其勢、以顏佐才乘勝尾追、逼中尹游擊之伏、不意尹違調度、不卽移皂角

鋪之營、伏於花街鎮之界牌子、伺隙夾攻、諸將於十四日進戰、縱火青衣壩、且焚且殺、血流遍野、涪江爲殷、縣州圍解、約斃賊四萬餘、解散難民無數、餘賊果由花街鎮一帶逸去、奏聞、將士賞罰有差、其逸去之賊、擾及什邡、官軍會齊、賊又竄至崇慶、分踞石羊場、柳街子、李家橋、馬祖寺一帶、旋勦旋奔、復斬賊級萬餘、生擒一千三百餘名、分別正法遣散、賊困不支、李逆踞青神、聞藍逆狼狽、急遣黨目何螞蟻率衆萬餘、將迎藍逆入丹稜、九月十三日、公抵成都、十五日、接督篆、隨卽遣將出省、擢丹稜、拉青神、解眉州圍、將首逆李永和、僞先鋒卯得興、生擒解省、肅正典刑、餘黨周辟、郭刀刀、曹燦章、張第才等、竄擾大竹、墊江、涪州、新甯、太平、儀隴、巴州等處者、皆次第擒獲、正法、及藍逆竄陝、被戮、而腹地遂無賊、壬戌春間、紛傳髮逆石達開、有率兵犯蜀之舉、初達開與洪秀全等、首據金陵、諸賊憚其狡悍、欲相屠害、乃隻身潛出、嘯聚醜羽、擁衆自雄、由金陵屢犯江西、安徽、繞竄浙江、福建、廣東邊境、攻名城、戕大吏、有衆數十萬、圍攻湖南寶慶、經大兵合勦、敗遁廣西、黨類逃散、踞伏山中、蹶而復起、突由

兩湖直趨川境、衆復至十餘萬、及敗入滇黔、仍由甯遠繞道內竄、公撫湘十年、深知石逆詭謀、可以智取、聞其黨李復猷、賴裕興、大股竄陷湖北來鳳縣城、復分竄西陽州界、經團練擊退、隨陷湖北利川縣城、報至、公卽星夜派總兵唐友耕、暫革知府唐炯、率所部赴重慶一帶陸路堵剿、並調副將朱桂秋、率桂字營水師礮船、駛往堵截江面、石逆前鋒、果由利川入、搶渡過江、而公已先飛飭沿河州縣、將船撤退、逆前鋒至不得渡、遂沿南岸上竄涪州、抵城外對岸山梁屯駐、又不得逞、乃偷渡小河、直撲州城、州牧姚寶銘、登陴固守、二唐軍到、麾軍力戰、城內徐邦道亦出練夾擊、涪圍以解、適所調臬司劉嶽昭之果後營大隊已至、遂商定留唐知府暫駐涪城、防逆回竄、劉臬司及唐總兵之軍、由北岸捷抵重慶、迎頭截擊、逆乃橫竄南川、趨貴州桐梓、取道攻綦江、唐知府由涪率兵至、逆遁走時、曾傳理兵駐合江、扼其上竄瀘州之路、劉臬司紮江津、以備迎擊、唐總兵由重慶馳至、與唐知府合隊、逆見籌備周密、乃繞邊狂竄、所有敘永興文江安長甯高琪慶符筠連一帶、均被騷動、徑由敘南來犯、蝟集

橫江雙龍捧印等場，綿亘數百里，銳意渡金沙江，以圖大舉。我軍又已。光期至，節節扼剿，逆不得志，乃竄入滇。其僞宰李復猷一股，敗竄入黔。中旗賴裕興一股，敗竄入會理州。中旗最剽悍，卽由會理州糾合煙幫游匪三四萬衆，擇癸亥正月二十六日，出竄甯遠。石逆在後軍，將乘勢趨進。二月初八日，中旗至大渡河，復爲我軍所扼。其所裹脅者，已在寧遠冕山越嶲，經我軍朱桂秋、劉鶴齡、周岐源、楊應剛、督同土司嶺承恩等剿滅無多，而中旗剽悍異常，雖不敢由大路直窺雅州，而旁竄天全，勢尤猙獰。得唐總兵先到，會同團勇殺斃數千。該逆遂由大邑崇慶竄溫江縣，至崇甯各縣，逼近省垣。而蕭慶高扼之於彭縣，之敖家場，何勝必扼之於什邡，衛生黨逆遂兼程衝去。竄往三台豐谷井，傷亡已衆。提督周達武一軍截之於梓潼，追之於江由平武等處。賊遂趨入漢中，不能回顧。公料知石逆在後，必搗我虛，獨留桂字一軍，搜勦龍安餘孽，密飭雅州府知府蔡步鍾，迅募熟悉地利勁勇待用，並調唐總兵，速督所部會合蔡知府，嚴扼大渡河之安慶壩萬工汛渡口，專防石逆，復扎飭松林地土千戶

王應元督帶土兵扼松林小河以防旁竄化林坪瀘定橋僻徑調胡提督分布化林坪瓦斯溝以爲聲援飭阜和協謝國泰馳赴磨西猛虎岡以扼賊竄打箭鑪之衝並飭邛部土司嶺承恩帶領夷兵將越嶲大路各隘紮緊逼逆入夷地小徑俟逆竄過卽從後包擊以絕回竄復調蕭何二軍兼程馳赴雅州榮經以爲後勁而防奔逸又慮川東一路勇薄兵單亟調劉臬司率果後全軍嚴防兜勦並備李復猷一股大渡河者爲川省西南巨壑發源天全土司境內流經瓦斯溝與瀘水匯流冷邊沈邊至清溪以下復入夷地而安慶壩萬工汛沿岸二百餘里渡口十三處在在須防上游之瀘定橋下游之化林坪尤爲緊要以其可越松林小河而渡也公又亟飭唐總兵蔡知府沿河設防星羅棋布三月二十五日擊晝甫定石逆果擁衆三四萬於二十七日犯大渡河是時石逆見大路有備遂由小路徑奔土千戶王應元所轄之紫打地而營擬夜由松林小河偷渡忽夜雨傾盆大渡河水驟漲數丈不能徒涉逆衆乃構篋棚屯聚急造木筏隔河游走意在疲我兵力四月初四日賊突出隊四五千擁

至河干、架木棚竹筏數十、以悍賊二三千人坐筏上、盡用懸牌護身、拚命搶渡、棚內諸賊、呼噪助威、山谷皆應、我軍牆排河岸、堅守不動、俟其半渡、以鎗礮連環轟擊、沉斃悍賊筏人淨盡、賊於是折求王千戶、以重金假道、王千戶叱賊力戰、斃其黨數千、復誘土司嶺承恩、欲使緩攻、而承恩攻之益急、甯越營都司慶吉、督夷扼險、絕賊馬鞍山糧道、石逆自恨陷入絕地、憤極思逞、四月十七日三更、盡斬鄉導二百餘人、祭旗傾巢而出、皆被唐蔡等軍轟擊而北、兼以水勢湍急、筏不爲用、賊巢糧盡、殺馬而食、繼以桑葉充飢、智窮勇竭、僞作乞降、又經我軍鎗斃、詐謀不行、維時副將謝國泰、已至松林、與千總陳太平、千戶王應元、督率土兵、渡松林小河、會同越嶺營參將都司及土司等、計定從馬鞍山後壓下、兩路齊進、直撲紫打地、將賊巢一律焚燬、賊皆狼奔豕突、自相蹙、而漢夷兵練、四面夾擊、鎗礮如雨、夷兵復登山嶺、用木石滾擊、孫升嶺上、萬石齊發、賊衆墜崖落水、浮屍蔽流而下者以萬餘計、石逆僅率餘黨七八千人、奔至老鷓游、又爲夷兵所阻、輜重盡失、其妻妾五人、抱持幼子二人、投河而

殞、其曾授僞職老賊、繼之大半、公豫知十面埋伏、賊必自困、密授意於諸將弁、謂積年巨憝、倘能設法生擒、倍彰天討、以快人心、楊應剛等、以該逆無綫逃生、則困獸力鬪、我傷必多、遂立投誠、免死大旗於洗馬姑、二十七日、石逆果攜一子、及僞宰輔曾仕和、僞中丞黃再忠、僞恩丞相韋普成、並餘黨二千人、至洗馬姑、低首乞降、公於四月二十八日得報、慮其受降時餘黨不即殲除、將貽後患、札藩司劉蓉、馳往大渡河、會同唐總兵等、妥辦善後事宜、諸將將石達開父子、及曾仕和等五犯、羈縻在營、劉方伯命將餘黨撥開、登時盡數殺戮、蔡知府將首逆解省、凱旋、公大會將軍司道、審明各供無謬、五月十一日、恭請王命、將達開等極刑處死、諸將弁及在事出力人員、請旨賞賚有差、至李復猷一股、前由黔境下竄、公即飛調劉臬司、由敘南馳赴江津、以備截勦、又奏調貴州提督田興恕、帶勇二千、來川備調、即以此兵攔截復猷一股、並將凱撤紫打地之師、分撥胡提督、仍駐敘南、唐總鎮、仍赴綦江、江津、其步步爲營、層層節制、公之用兵大率類此、兩次削平元惡、客有入賀者、公猶推功將士、謙讓不



遑、噫如公者、信可傳矣、

附錄賂公覆陳川省軍務情形疏

奏爲遵旨疏陳川省軍務。並賊踪竄近省垣。現籌勦辦情形。恭祈聖鑒事。竊臣前於恭報起程日期摺內。欽奉殊批。着初抵川境。卽將川省軍務情形馳奏。欽此。仰見我皇上篤念西陲。厯懷軍事。臣雖愚昧。敢不殫竭血誠。悉心體察。三月十四日。率師由荊州上駛。四月十七日。抵萬縣。沿途接見各府州縣官紳士民。諮採軍情。體察賊勢。僉稱藍李張何各逆。裹脅擄聚。多至廿餘萬人。出沒於潼縣資簡敘潼富隆之間。蹂躪至四十餘州縣。流毒生民。殊堪憤悒。然以臣審度情形。其黨多而不整。其人狡而不悍。其情合而不固。此三者猶是亂賊草竊之故態。非若粵逆之堅悍難制也。然亦有不易勦除者三端。一則散而不聚。賊黨雖多。而東西分佈。不聚一隅。卽至臨陣對敵。往往以數十百人爲一隊。錯雜散布於峯巒堆阜之間。我師銳欲進攻。而不能專向一處。幸而勝之。所殺不過數百人。而於賊勢初無所傷。

不幸竟爲所乘。則重重包裹。無得脫者。一則漂而不留。賊志本在擄掠。初無據城掠地之圖。每逢勁兵進勦。輒卽棄而他竄。所在擄掠糧食。輕飄迅疾。而官兵非整旅資糧。不能追躡其後。料理數日。賊已遠颺。卽欲窮追。而疲勞已極。縱能襲賊。而亦難期得力。一則伏而不出。嘉慶年間。川省勦辦教匪。多修碉堡。爲堅壁清野之謀。今往往反爲賊踞。飽掠米丁水粟。巢窟於層壘疊嶂間。聲息相聞。我師欲上攻而山路崎嶇。峭壁千丈。雖勇者無所施力。及至日暮引還。賊反蜂擁而下。鳴鼓蹂逐。此三者。所以爲蜀省行師之深患。難期功效於旦夕者也。臣反覆熟計。竊謂賊勢旣慮其分。非聚歸一處。則此剿彼竄。莫收聚殲之功。我師每虞其薄。非併力一心。則補東缺西。終成流寇之患。現在臣所帶湘勇僅五千餘人。卽會合蕭啓江舊部。亦只萬二千人之數。川省兵單。習氣太深。營制太壞。雖經署督臣崇實極力整頓。而積習相沿。驟難期其得力。合圍會剿之謀。恐非臣力所能及。倘賴皇上天威。或事機順手。一戰而殲厥渠魁。使各匪大受懲創。則脅從黨羽。當可駭散大半。由

是而節節勦洗。尙易爲功。如其竄踞崇崖。負隅不出。或聞聲而走。南北紛歧。有攔頭之銳師。無截擊之勁旅。則東馳西突。實有疲於奔命之勢。卽或窮追逼勦。亦慮回竄滇南。終爲蜀省之患。此臣所以日夜焦思。而私切深慮者也。臣前行次雲陽。接准署督臣崇實來咨。言粵逆攻破畢節。恐其竄越赤水。兼聞敘瀘一帶。城隍蔓延。方擬移師進勦。迨十七日。行抵萬縣。始聞賊蹤竄近省垣。東南北三路。徧地皆賊。道路梗阻。並新起另股陳匪等。又復逼圍順慶府城。人心震悚。臣思省城重地。必須先固保固。卽於十八日。派撥黃醇熙。率果毅營。由梁山大竹。進趨順慶。旋於二十日。接准崇實來函。邀臣率師徑赴成都。商同勦賊。臣現已整隊東裝。卽日續發。其一切撫勦方略。容俟臣熟籌具奏。所有覆陳川省軍務情形。謹先恭摺具奏。附錄駱公奏報河神助順疏。

伏查僞寶王石達開。上年擁衆自滇邊突竄建昌。銳意圖犯腹地。經臣調派升雲南提督唐友耕。督率振武軍。暨雅州府知府蔡步鍾。所帶練勇。並漢土各兵。分布

大渡河。據險扼擊。惟時正值暮春。水尙平靜。隨處可以涉淺。須至五六月間。河水始能漲發。儻被該逆徑渡。勢既蔓延。撲滅非易。乃石逆於三月二十七日。甫抵河干。是夜大雨滂沱。次日河水陡漲十餘丈。波濤洶湧。並松林小河。亦成巨浸。詢之士人。向來三四月間。從未見此盛漲。石逆每欲扎筏搶渡。被我軍槍炮轟擊。筏入水輒覆。限於巨流。不得狂逞。大兵四面逼促。該逆遂困於紫打地。食盡路絕。渠魁就縛。餘逆殲除。該逆就擒之後。水勢仍復消落。衆目共睹。無不傳以爲異。竊惟此役成功之速。雖屬將士用命。而仰仗天威。神靈助順。河水陡漲。確有明證。溯查大渡河發源岷山之陽。一曰陽江。流經大坪魚通各土司之內。至打箭爐東之瓦斯溝。與旄牛徼外柘拔洳之瀘水合。轉經瀘定橋。下匯衆流。夾山澗曲折而南。至青溪之大樹堡。始能開渡。復經野美境內。東至嘉定府。匯於大江。源遠流長。實爲西南巨壑。雖考諸志乘。其神無典可稽。而捍患禦災。有功于民。則祀之。况洪波助勢。俾賊技漸窮。翊贊聖功。削平巨寇。既昭靈顯。允宜崇報。應請飭部議加大渡河神

封號。建立專祠。列入祀典。並懇頒賜御書匾額。敬謹懸挂。以揚國威。而顯神蹟。再聞雅州府西之化安坪。向祀金華神。其年代姓氏。皆無可考。前次滇匪圍攻雅州。嘉定兩城。皆著靈應。據所擒賊供。攻城之際。皆見神兵默助。當卽駭潰。城圍立解。士民奉祀益虔。據該府具詳請奏前來。應請賜加封號。附祀大渡河神祠。用以俯順輿情。是否有當。理合恭摺具奏。

余濟村曰。公沈毅靜鎮。殄夷巨寇。不動聲色。人驚爲神。公歿。蜀民會奠而哭者。聲震天地。街巷沿門。皆貼輓聯。惟錦江橋一聯云。鞠躬盡瘁。死而後已。盛德至善。民不能忘。意最渾括。至今猶尸祝之。良有以也。當賊始竄蜀時。公尙未奉命援川。果州有人降虜云。若要太平時。除非馬生角。人莫解其語。迨公總制全蜀。削平亂逆。馬角適符其姓云。此編專述蜀事。故傳中於蜀事獨詳。若欲覽公生平政蹟。自有國史列傳。暨公之奏疏年譜在。茲不復贅。



## 蜀燹述略卷一

金堂余鴻觀淵閣編輯

## 忠部

蓮匪殄夷。蜀稱平治。滇烽忽形。城成衆志。統兵將臣。守土牧吏。勦賊衛民。以死勤事。爲國盡忠。身罔不致。孔曰成仁。孟曰取義。瀟氣英光。名稱沒世。述忠。

## 武慶符。

武公諱來雨字聽濤籍隸山西交城道光壬午舉人以大挑仕蜀歷任漢州蓬溪縣竹平武崇甯多惠政令平武時有某甲兒年十歲捕魚溪中得金盃半額途中遇某乙兒奪之互相爭競甲乙兩父至各執爲己子所得鬪毆成傷事無證見咸謂莫白兩家俱訟公驗盃叱曰此古物例應報官敢私者應受杖盃入官乙遂實供未拾甲稱不能狡辨甲父泣求寬責公笑曰汝子拾得汝卽攜去乙伏罪受杖知綿竹時有

兩盜竊富室、一從穴竄入、捕者杖路之、立斃、富家長累、囑家人潛避、意望同盜負屍去、移時果一盜至、負屍出竄、過鄰人垣下、大吠盜驚、棄屍逸、鄰人訟富室移屍嫁禍、公往勘、悉其情、大怒、指屍曰、汝罪應杖、尙詐死耶、命杖百、一隸跪白盜已死、公責隸、拍案曰、盜詐汝亦詐耶、左右懼、杖盜、公曰、氣絕未、隸畏責、佯應曰、尙有微氣、公叱再杖、乃探盜鼻笑曰、汝尙鍊吾刑否、命埋漏澤、而富室無累、又富翁某壽、鄉鄰繡綵帳、多人物冠裳、某秀才控其犯分、前任下富翁獄、內外賂費不貲、公蒞任、富室訴冤、公立釋其囚、秀才抗抵、公曰、綵帳玩器、鄉民非有意於僭也、此必究、而僧道優巫之衰、冕冠裳、不勝誅矣、秀才謝過去、咸豐九年、署慶符縣事、九月、滇匪李永和藍大順二逆壓境、公率勇僅五十、人出境迎擊、殺賊凡若干人、賊大股至、遂不能支、公妾張氏、雉經、蒼頭某、及幼子、符官、皆死、公殮妻子及奴、畢、齧指血書遺囑、貼堂壁、示士民、其辭曰、守土無狀、不肖知縣武來雨、泣血頓首、來雨、幸叨科名、毫無韜略、生靈塗炭、咎實難辭、上負國家委任之恩、下慚撫育百姓之義、然開門揖盜、始自筠連、起衅失機、



兆於宜邑、該匪本係游民無入川憲因今年六月宜賓縣令汪觀光

民受魚殃、無城無兵、慶符向無城池罪當共諒、匪入爲連境不過五六百人今日死節、分

所宜然、來雨妻張氏今日已經死幼兒符官亦死僅留老妻李氏痛但無兒無女、

家鄉族子可繼兩袖清風、屍骨歸鄉、所費不少、慶符山青水秀、雨深羨慕、倘將來平定後、士

民垂憐、覓我屍骸、擇一善地、樹深竹茂、更植梅花數百株、築屋數椽、穴葬其間、夫妻

相依、建一碑坊、題曰清死節縣令武聽濤之墓、則生生世世圖報、無窮矣、咸豐九年

九月十一日、署慶符縣令武來雨燈下書、越明日、冠服仰藥坐堂上、賊入大呼曰、武

公死乎、尙能與我輩廝殺否、一賊揮刀欲戕公、刀忽中折、賊顛去十尺有咫、死、羣賊

羅拜、驚以爲神、稱好官者再、爲之殮祭、築高塚於大堂而去、公夫人亦未加害、聞公

尙有遺囑、無從見、遺囑、則得之縣堂壁間云、

余濟村曰、公守慶符、無城無兵、調圍禦賊、度不能支、亦事勢之無可如何也、乃合

家殉節、復作硃書、媿媿數百字、何從容就義如斯耶、其曰、賊至殺我眷口、勿傷百

姓、非真有父母斯民之心者、安能爲此痛切之言乎、然開門揖盜起、岬失機之原、已於血書中見之、故此編以公冠首、亦以見亂之始生、不無所自云、遺囑中言賊起事、只數百人、證以無名氏陷賊見聞紀、事皆符合、今節錄數條於左、以誌滇逆之緣始焉、

李逆名永和、雲南昭通人、年二十三、瓜面長身、外和內暴、好吸洋煙、貪淫酗酒、父亡母存、娶妻回人、又娶同姓之女爲妾、卽前以千餘人擾害仁壽被擒、李玉齋之女、起弔黃樓時、相從僅六百餘人、因稍知書識字、衆遂推尊之、聞周公山靈官殿高廟等處、逃去甚屬艱難、倘官軍一心掃滅、安有今日之患、李逆性不好動、衆號李半年、僞設官爵、僭號出示、左護國軍政司何政、右護國軍政司鄒成林、石進士、李舉人、皆尊爲參謀、其餘文人、俱令大會朝考、分三等定次序、賊中惟何政一人有膽略、每出陣、必親帶隊、政爲川省名山人、僞三法司龍德耀奏章、有諫李逆勿食洋煙、勿貪酒色等語、蓋李黨雖多、不如二藍之勇悍也、賊所攻陷之

城是防守鬆懈、致被地雷攻破、傳令先登者賞婦人一箇、遂蜂擁而入、若能齊力防守、先斃其先鋒百長、遂不敢攻、卽寨堡亦不能破、或破一二寨、亦因地勢不佳、防駐人少故耳。賊善習伏、兵名曰磨肉、視坤形兩邊有藏身處卽伏之、中用數千人詐敗、官兵追勦不防、伏兵出抄爲兩斷、使首尾難顧、以此取勝。以賊數而論、雲南賊不過千餘人、餘皆川省紅黑兩黨家暴子、滾刀客、耗子精、冒穀子、拜弟兄、約有四五萬人、投賊者亦四五萬人、統計不過十餘萬、其餘都是良民裹脅、欲徐圖逃脫者。

宜賓明經、詹君文昶、弔武公楹聯云、極慷慨、極從容、讀娓娓遺言、未拈斑管心先碎、亦英雄、亦兒女、看雙雙致命、不樹梅花骨已香。

### 馬軍門

馬公諱天貴、字爵齋、維城人、少剛勇有膽識、初應汛官、左金樹募充汛兵、屢立戰功、洊升四川提督、咸豐八年戊午、彗星見西南向東北、芒數丈、旬日乃滅、典史姚成雲

上書制府言乾星直逼奎度若隱若見忽高忽低其色白主刀兵之象其分野在川南一帶云云逾年滇逆起敘州公率兵勦洗遏賊眞武山弔黃樓自秋徂冬堅持不下進攻石梯橋公身先士卒與賊力戰馬陷水田泥滓中陣亡賊遂竄入嘉屬犍爲諸郡都司余公振海及瓦司兵同日戰沒余公自有傳

余澹村曰劫運之來不特上天垂象卽禽獸草木以及尋常細故皆有先機之兆或由人心感召歟抑亦地氣使然歟余嘗慕游川東南凡賊所過之區詢諸父老咸云殺機預兆所在皆有今備錄於此庚申滇逆竄蜀有小鳥黑身紅喙連呼過兵數數不輟又有山鳥長呼藍大順者屠家宰豕毛去而膚有紅印方圓大小字畫不可識民間桃李結實如刀形黃黑蟻常鬪道旁吾鄉李氏家李枝發竹葉駮類矛頭樣余親見之李逆之姓已兆於此人呼短刀爲順刀藍逆之名已兆於此什邡王氏家梁燕毀巢四月賊至焚掠萬餘家天彭河壩場山腰裂一縫水出色赤如血辛酉春通山會匪卽於是場起竄皆機之先兆也

余都司

都司余公諱振海、廣安州人、提督步雲公之孫、游府長春公第五子也、幼具英武姿、及長、爲人慷慨有大志、入行伍、嫻方略、以功得守備、咸豐九年秋、加都司銜、札令帶兵勦漢逆、賊踞敍府眞武山、弔黃樓堅持數月、遏賊鋒不得出、至冬、馬軍門天貴進剿石梯橋陣亡、賊旋竄出嘉定府境、大帥飭公追剿、立功自贖、公率軍數百人、營於犍爲縣屬之箭板場山下、去賊所踞之牛心山僅十餘里、賊探知公所部只數百人、合瓦司兵及各練勇共五營、僅二千餘人、冬十一月中旬、賊數萬蜂擁至、圍繞山梁、撲營力攻、公以衆寡不敵、乘壘堵禦、矢石鉛藥俱盡、繼以刀矛、已而力不能支、全軍覆沒、賊殺公而焚其尸、同時死難者公之六胞弟某、族姪輯五、鄉人周志遠、趙某等、事聞議卹、

余濟村曰、提督公以大將之才、由諸生改武職、辦理粵東軍務、名震一時、游府公以名將之子、勤勞王事、懋著功勳、公生長將家、幼嫻武略、三代爲將、世受國恩、臨

難身殉、不求苟免、遊府公可謂有子、提督公亦可謂有孫矣、詩曰、夙夜匪懈、無忝爾所生、公其有焉、又余聞族人從軍者歸云、箭板場之戰、賊將逼營壘、時公檄四營出戰、皆不應、各以守擊爲辭、號曰打坐籠、眼見前營爲賊夷滅、次及公營、三面皆環、水田賊匪營猛撲、力不能支、公率麾下二百人出營與賊決戰、陷大田泥水中死之、自辰至未、五營蹂躪幾盡、於是賊易官軍、勢更猖獗矣、

趙千總 陳正魁附

宜賓殺馬營千總趙公三元、咸豐九年九月十九日、滇賊李永和圍殺郡、公帶勇數十名、築西關外較場壩、賊統衆千餘、倏至、前後合圍、公力戰死之、公有勇目陳君正魁、宜賓人、前剿雷波夷有功、咸豐九年、隨公攻滇賊於牛皮寨、旋奉檄調歸、九月十九、滇賊李永和圍殺郡、陳君登陴守禦、城屢陷、俱獲保全、自唐公友耕來歸、連日隨攻西門外各賊壘、克之、繼攻花園菴賊巢、唐公攻其南、君攻其東、始與賊巷戰、君揮矛直前、賊不支、敗入垣內、閉門拒戰、君乘勝躍入、力戰方酣、將撲入中營、忽內放巨

礮中君左目受傷、猶呼勇弁上前殺賊、東路唐公藉公聲勢、兩路夾攻、破賊捷聞、而公已死矣、尙怒執長矛不倒、弁等負公屍、回葬翠屏山麓、

### 蘇陳二典史

蘇君寶林、曾任慶符縣典史、咸豐十年正月二十九日、滇匪擾筠連、君督勇堵剿、陣亡、

陳君思源、任丹稜縣典史、咸豐庚申、藍逆圍攻丹稜、城陷、巷戰不勝、被執、罵賊不屈、死之、同時死難者、廩生劉君建勳、知縣之官親王盥、知縣之家丁蕭銘、

余濬村曰、昔獻賊陷金堂、典史潘孟科死之、至今尙祀昭忠祠、而所謂守土知縣無聞焉、今蘇君死筠連、固與慶符知縣武公相輝映、而陳君之死丹稜、僅與知縣官親知縣家丁同盡節焉、是與孟科潘君之死無以異也、世變之甚、何古今一轍乎。

### 彭汛弁

彭公諱光華、字耀亭、大邑縣武庠、投効營伍、辛亥歲、由資陽駐防、補授金堂汛、甲寅、奉調討賊雲南、保陞六品藍翎回任、咸豐己未、滇匪竄川、隨大帥出師敘府、營於自流井、次年二月朔、與賊大戰連日、追至威遠天成寺中溪河、賊併力死拒、公力戰、面帶二十一傷、死之、事聞、蒙恩賜卹。

### 張協戎

張公諱萬祿、字錫齋、由雲騎尉入戎行、咸豐五年、以夔左都闖、出師湖北、克復楚皖諸郡、保加捍勇巴圖魯、授鄖鎮遊府、九年七月、擢協戎、馭兵嚴、所過秋毫無犯、是年八月、以太夫人春秋高、乞養回籍、滇匪擾蜀、當事知公能、奏派帶勇、太夫人亦勉以大義、公始募勇五百、十一年二月初旬、由省、由資簡至威榮、時李逆自富庶犯榮邑、大股竄黃石坡、震公名、霄遁、公追剿不遺餘力、十六日、賊夜襲公營、與賊大戰於秀才坡、時賊萬餘、公親兵僅五百、所轄三營先潰、公奮不顧身、直衝賊隊、自辰至午、援絕馬疲、陷泥田中、賊復後路包抄、而公已負重傷矣、擲冠地下、大呼將士曰、爾等各逃



生路。此地乃我瀕國之所。衆將士苦求公上馬。潰圍逸出。圖再舉。公唾而刃之。已而圍逼。公猶手刃數十人。始自刎。身凡受傷二十八處。同時死難者。藍翎府經桑逢春。守備楊朝貴。把總閔肇烈。千總伍遇春。武舉吳家漢。武生張桂芳。訓導左有芝。皆蜀人。親兵死者三百七十餘人。帶傷者百餘人。前後殺賊共千餘人。歸柩之日。士民遮道祭奠。咸誄以詩云。

附錄哀辭一章

戰雲壓壘。天地黑。將軍率師破殘賊。指揮叱咤。虎狼驚。頃刻機槍掃湖北。凱歌聲。逐紫駟飛。奇功許繼燕然勒。歸來休沐錦城裏。突聞井上煙塵起。蜀將深藏細柳營。隻身鏖戰馬公死。當時想見旌旗擁。腰箭橫刀稱悍勇。偏師直搗秀才坡。不許中原留逆種。忽然一夜人聲吼。千騎萬騎營門口。拍馬橫槍當賊鋒。公竟願死不願走。時賊夜直從半夜殺到午。鏖鏖摧破軍中鼓。前頭不見救兵來。斷送五百巴圖魯。戰袍染透猩紅血。天地無光星斗掣。英雄結局竟如斯。吁嗟已矣復何說。

余澣村曰、此詩選載王師曾詩緣第三卷。

左訓導

左公諱有之、字宜軒、新繁縣人、幼勤於學、性豪爽、以春秋兵法論、受知何子貞學使、補本郡博士弟子員、援例遷龍安府訓導、滇匪竄蜀、協戎張萬祿帶兵勦殺、聞公名、聘主營幕、帷幄運籌、多所參助、後戰沒於榮縣之秀才坡、制府曾公卓如奏聞、奉諭旨給卹銀、并給雲騎尉世職、其子石麟承襲、時有鄆篤忠鄆守忠兄弟、亦同日戰死。

羅教諭

羅公諱策、字玉山、什邡人、道光戊子舉人、以大挑任蒲江縣教諭、廉潔自矢、士林愛戴、咸豐十年三月十二日、藍逆竄蒲、城陷、官弁俱逸、公率家丁力拒於學署門外、鬪而死、其僕傅興與焉、事聞、賜知府銜、廕其孫揚烈入監、以州判用。

余澣村曰、聞同時有楊洪順者、夾江縣人、貿易於蒲、滇匪攻城、隨衆守禦、力戰陣亡。又有王玉龍者、隨教諭羅公守禦、城陷、羅公殉難、玉龍亦被殺、然則一城之破。

恐睢陽士女志傳。書不勝書矣。

### 孔吏目

孔吏目諱昭淇、咸豐庚申春、奉憲檄委署天全州吏目、其時滇匪竄眉州、陷青神蒲江、圍攻邛州、提督占公泰、陝西候補知府田公良、帶兵援勦、邛勇破圍、官軍後至、賊退守文筆山、大張僞示、有占泰田良免送之語、賊乘間據名山縣城、雅安去名山四十里、烽火相望、人民悚懼、雅安知縣何君小塘、議守關防河、孔君赴任、路過雅州、府憲蕭公時馨、留孔君守金雞關、先是閏二月朔、賊以偏師叩關、爲守關軍士敗走、焚賊營四壘、僅喪勇目李順有、萬德猷二人、次日賊復大至、分五道並進、又分股循岩而轉、繞出關後、我勇腹背受敵、孔君殉焉、賊進攻雅城、文生鄧雲霄受僞官、圖內應、擊獲正法、延燒城外民房四晝夜、環攻不息、城角被地雷轟塌、城軍用鎗礮力禦、取質庫棉絮浸水、裹花板堵焉、賊復取田間菜麥稈、堆積如山、隱身伏攻、城軍擲火彈礮子、遇青卽落、何縣君乃募敢死士數百人、取黃紙裹首爲號、黃髮蓬鬆、似神似

鬼開關殺敵、賊衆驚走、立將稗堆夷平、各鄉團勇、獻賊首級者、皆獲重賞、階下纍纍、幾如瓜市、賊憤屢攻不下、復斃賊目藍四大王、李二管事、藍逆亦因攻城、頭面受傷、賊衆救歸、雅圍遂解。

### 李千總

城右千總李奎、擢升都司、咸豐十年五月、滇逆圍井研、李帶兵殺賊、死於陣、妻楊氏聞變、亦嘔血死、妾嚴氏、僅有一女、攜醮龍泉驛屠兒、嚴死、屠賣女安妓家、女不屈、轉賣秀清班、有沈璧卿者、浙右舊家子也、以先世宦蜀、家於蓉城、少年持重、奉母以孝、母生日、親賓賀壽、女優秀清班、善走場劇、名動一時、部中有李金枝者、千總女也、年十六七、貌端雅、不事歌舞、行觴而有慚色、沈詢、則盈盈欲淚、吞聲無語、乃乘隙呼室中詰之、女伏地泣且訴、自言韓灘良家女、賺賣部中、誓以死不得便耳、暑露兩臂、青黑鱗傷、沈爲惻然、許贖身、女願爲奴、言次、母呼瑄、踉蹌各去、席終以情告母、母聽往贖、議五十金、將立券、有譏於母者曰、郎君有私贖、必爲筵室、彼煙花蕩妓、不安清門、

自此恐無甯日矣。母遂斥子絕其約。沈往毀成議。至妓門而一足不能舉。返步如故。怪而復履。則兩足如縛。駭爲鬼神所鑿。仰天誓曰。必贖李女。而雙足無累矣。及與搗母議。似有異詞。沈乃呼女獨詢。女泣曰。彼以五十金買身。不能獲利。昨猶嗷嗷。筆楚君果出兒水火。再益三十金可耳。沈慨應之。歸白母。母不許。夜與妻謀。妻惑流言力阻。沈晨起。潛赴神祠。破指瀝血書誓狀。洩至戚爲盟證。卽於次日攜金迎女歸。延集親賓。人以爲邀賀小星也。多腹非之。母怒將杖。沈跪出誓狀。朗白而焚之。女亦大哭。欲赴清流以白其誣。適金沙菴老尼在焉。迎女住菴中。蓋沈早具薪水資。而謀活女於尼者。斯時浮言頓息。有某節婦聞而慕之。倩武弁安俊爲子求婚。沈呼其子登堂。循循俊秀。試語曰。李女流落江湖。人或賤之。有娶無歸。能無後言乎。子曰。孀母苦節。愛彼貞操。母命如天。沒齒無怨。沈喜受聘。訂期而去。異日。尼偕女來拜沈爲父。太夫人留女治裝。女分母氏勞。親逾骨肉。乃悉言家世。問曩何不言。女曰。身陷濁中。何忍辱父母名。兒非阿爺。誓有死耳。聞者莫不嗟嘆。婚之日。沈爲大治奩具。賓客踵賀。傳

爲美談、此又同治七年三月事也。

余濟村曰、此事曲折、近於傳奇、沈生以名門公子、偏鍾惜玉之情、李女雖溷迹下流、猶勵堅冰之志、忠臣節婦之後、於千磨百難中、卒成眷屬、誰謂蒼蒼者高不及察哉。

節錄董叔純貽清刺史援守井研記

咸豐九年秋九月、滇匪李永和、藍大順、入川境、連破筠連慶符高縣、攻敘府不克、十一月、竄犍爲五通橋、十年正月、竄富順自流井、榮縣貢井、二月、復竄回五通橋、攻嘉定府、官兵僅能尾追、或避徙他去、以故賊鋒所至、如入無人之境、三月、藍逆分股、由嘉定上竄、疊破青神彭山蒲江名山等縣、其李逆大股、仍據橋上、大憲以省垣爲重、所有占軍門泰、明都司耀光、唐守備友耕、各營俱調回省、查五通橋上省之路、一由嘉定青神眉州彭山新津雙流至省、四百餘里、其中州縣城池、凡五六處、惟時郭軍門相忠、唐大令炯等兵勇、扼截要隘、防守甚嚴、一由井研仁壽至

省亦四百餘里、仁邑無城垣、恃井研爲屏障、而馬達井、河二坎、又係緊要隘口、北路無一卒之戍、井邑劉令棣威、屢稟州求救、因派珠江勇四百名、前往防堵、委軍功劉玉龍、職員羅忠延等統之、零匪悉就擒獲、逆料大股必至、貽清帶勇駐羅泉井、以爲聲援、適資陽范令涑清上、連橫禦敵章程八條、其意以一處賊至、四處隣封互援爲主、此法制上匪甚妙奉憲札褒獎、并飭責成資嘉敘先辦、三月二十七日、奉憲批令貽清親帶練勇、前赴井研一路防勦上竄之賊、閏三月初一日、抵井研、駐來鳳書院、初二日、派勇目羅光源等帶隊、往馬達井勦賊、生擒賊目萬有沅、十一日巳刻、賊大隊出戰、郭軍門兵未到、軍功彭能得陣亡、十四日賊隊齊至井研城外、連日急攻、二十日有賊僧在北門外叫罵往來、自誇火器不能傷、擊之果若無事者、趙汛弁先擲以米、又川婦人血衣障之、發一拾鎗、遂斃僧於城下、此等邪術自來皆有原不足資陽城隍者、最著靈異、資勇出陣、供奉行營、以下休咎、二十三日、天甫明、火神廟地雷炸發、城垣外倒未內陷、我勇死傷不多、疑有神助、後有難民自賊中逃出、

言發地雷時、賊於對山、見有一二貴官、在城上督隊云、四月初二日、地雷連發二處、城傾二丈、隨取棹櫃厨累、仍畚土爲垣、修復補築、勇目傅占彪死之、初三日、吳訓導建議於南門內、另築土城、周圍五丈、撥勇安礮、以備地道轟突、又浚內濠、下置竹籬、以慮席蓋之、上鋪以土、城上安設礮位、此法避地雷亦妙外城卽轟倒、賊不能直入、十四日、開仗、井研勇目張定邦死之、二十三日、城勇縋而出、殺賊數十名、燒賊住房二座、珠江勇大旗軍功鄒鑑亭斃、二賊腹受礮傷、回城隕命、鄒君屢歷黔楚軍務、此次守城、尤爲得力、二十四日夜遣頭攜告急書出城、求援史太守致康、乞轉稟大憲、促令諸將進兵、蓋城中僅三日糧矣、二十五日、諭井城富戶、獻米糴者、給與軍功頂帶、多者、准與詳請官職、明參將耀光、舒參將洪元、楊部郎熙、共統兵勇萬餘、紮營近城、五月初二、三等日、賊與官軍打仗、賊大敗、難民逃出者、均稱賊將他遠、勢已窮蹙、但須官兵力勦耳、賊營於四處山頭、升旗於樹、爲緩兵之計、又射僞示入城爲搖惑人心之計、初五日、城內糧缺食糜粥、百姓盼望官兵、無不生



怨初七日、接史太守函、知蕭臬司啓疆已在省垣病故、十一日、城米顆粒俱無、糠粃度日、劉令親赴各勇處涕拜、衆皆感奮、十三日、胡總鎮中和帶楚軍抵觀音橋、十四日、楚軍與賊戰、大獲勝仗、賊夜於翠屏山、列炬數百、旌旗錯雜、其實婦孩悉在其內、不過示衆緩兵而已、十五六日大雨、十七日雨稍止、忠義勇送米入城、十八日、楚軍出隊、連踏賊營二十餘座、殺賊千餘人、撲河墜岩者不計其數、河水爲之不流、城圍始解、



# 蜀葵述略卷二

金堂余鴻觀瀾閣編輯

## 忠部

### 蕭隆昌

蕭公諱慶、咸豐五年、知隆昌縣事、九年己未九月、滇逆李永和藍大順、糾黨千餘、破高縣筠連慶符、寇敘郡、圍攻五十日、公聞報、夜延邑舉人彭君達訓咨策、達訓曰、事非獨力可成、迺舉孝廉王君炳森、共襄籌畫、設防衛局、以監生鄔君文柱、廩生萬君邦翰、司製造、州同余君繼書、司收發、監生黃君慶廷等、司帳記、文生陳君煥勳、統帶新募義勇三百人、汛弁吳勳、帶舊募義勇一百一十人、赴郡協勦、大府調遣失機、敗績、陣亡三十餘人、公乃先後遣陳煥勳、卿洪貴、帶勇三百餘赴救、以教職耿君光貞、司糧臺、駐離敘城之百里黃沙河、親督團勇、同諸路兵士、戰勝於弔黃樓、圍解、十一月、公振旅還、會同邑紳妥籌防具、增城壑池、積木累石、鑄大礮數十尊、因城建臺、環

布於牆、運轉礮礮、遠給符信、以通采辦之路、守器備具、凡火毬、火箭、噴筒之類、無不引機觸發、復開局列肆、鳩匠督工、自短刀、長矛、營鎗、鳥鎗、以及黑鉛、白鐵之彈、竹皮、葛根之繩、惟精惟備、無或有缺、以故城守之嚴、獨榮昌於蜀南爲最、又慮城鄉團練、聲氣弗協、爲集紳耆、諭以同仇之誼、勿分畛域、初公之解紱圍而還也、聞賊有窺自井之意、恐蔓延及境、調陳煥勳帶勇數百名、預防於富屬之陶家橋、十二月、聞賊上竄五通、乃令撤防、庚申正月、賊回竄自井、浸有掠境之勢、公調煥勳防牛腹渡、二月、賊竄井研、撤防、五月、賊由井研四竄、公復調煥勳防牛腹渡、六月、賊由富順分竄邑境、胡家寺、響石山、劫焚肆戮、公聞報、慨然曰、吾與鄉民約久矣、其敢坐視乎、乃檄煥勳、由牛腹渡勒兵會勦、并會同汛弁吳勳、親率管帶鄧忠厚、劉助祿、卿洪貴、喻致中等、帶團勇數百名馳救、道出驪子灘、團首梁世芳等帶練百餘人相從、公性素急、諸團赴召者未至、所帶練勇行數十里、飢不及飯、公速之戰、賊故畏公、將遁、有童賊謂其酋曰、肅公來、我知敗矣、然其來也急、團雖衆、不及待、盍登房脊以覘其軍乎、賊酋

從其計、盡得公虛實、急率衆圍、公從者戰且死、公度不免、揮刀斃數賊、力竭而跌、山東健兒常元、義僕也、飛躍至公側、連斃十數賊、將負公奪路走、賊圍裏愈厚、苦不得脫、爲賊刃擊撲於地、常元猶以身翼公、賊砍元首、拋棄其屍、公遂爲亂刃所害、適諸援繼至、羣賊曳奔、收公全屍、撫驗三十七傷、邑民哀之、爲公建祠、厚卹其家、與難者二百餘人、咸附祀公祠、後魏公元燮、接署邑篆、城防戰守、遵公遺法、賊數攻之、不能下、城賴以完。

余濟村曰、先兄魯生司訓隆昌時、得公死難事實、抄寄回家、乃撮其大畧而爲之傳。

### 何知縣

何公諱汝源、灌縣人、道光朝孝廉、咸豐癸丑、大挑一等、任東河知縣、循聲卓著、尊鱗念切、告歸田里、家於灌城、時藍逆擾蜀、奉憲札督辦地方團練、與在籍知縣高公溥共事、和衷辦理、動合機宜、庚申春、賊由敘擾邛、縣君英公啓祥、委公同高公督練協

守要隘。夏六月，賊竄擾崇慶分州。公同高公調勇防勦，禽戮頗多。秋九月，賊逼元通場。參戎馬公及團練分道進攻，賊宵遁。走入丹稜。九月，賊復上竄。由雙邑擦耳岩渡江，沿途焚掠。公急調練防守，走馬河上下隘口。賊不得渡。十九日，賊薄金馬場。公督衆堵禦，酣戰半日。衆寡不敵，被執不屈。賊怒，剜舌而死。事聞，卹典有加。子陸樞、蔭雲騎尉世職。

余濟村曰：昔聞青城多隱君子。如宋靈巖先生。賊過其廬曰：此篤行君子也。相戒勿毀。下馬羅拜遺像而去。如高南城先生。賊過其宅曰：此廣東好官也。戒勿焚擾。夫靈巖之沒，去賊已三十年。其流風餘韻，猶爲賊所瞻仰。固卓卓可傳矣。若南城則與公同治團事，皆殺賊有功者也。後南城以功加直隸州銜，壽終正寢。而公獨粉身碎骨於賊人之手，亦可與南城並傳矣。及攷灌縣新志，南城有傳，而公無傳。其名氏僅附見於人物志中。當日居官政績，死事情狀，皆未詳述。無乃歎然爰摺據遺事而敘其大畧如此。

劉汛弁

劉君諱升高，成都人，以雲騎尉世職，補彭什汛，貌僅中人，循循若儒者，然健勇有俠氣。初汛地爲痞匪逋逃藪，居民患之。道光二十二年，乃請設外委一員，步軍十名，置署豔陽場內。歷來汛弁有名無實，君至卽捕首匪數人，羣匪潛蹤，境內肅然。咸豐十年九月二十四日，藍逆竄敖場，居人紛紛逃避，君奮臂裂眚，激厲兵團，防堵本場。次夜五更，賊蜂擁至，君與戰於場口，初施礮斃三賊，接刃又殺二賊，賊怒，併力鏖戰，分股襲場後，圍衆驚潰，君奮勇衝殺，手刃賊目二人，有騎馬賊用矛刺其喉，遂被害。兵團從死者，舒朝升、丁公恕、楊安邦、譚有光、劉富貴、魏大品、魏存岱七人，其母迎養在署。事急時，攜君女避他所，彭令胡公延入縣城，賑之。

甘篤生曰：升高以少年襲職，備汛荒隅，部兵僅十人耳，非有三軍之衆，在其掌握也。當寇至時，自度力不能支，卽擲戈以去，亦屬可原，乃能捐軀赴敵，視死如歸，雖古之烈丈夫，不過是矣。

李太守

李公諱英榮、字子彥、湖南湘鄉人、少有至性、及長具文武才略、壯歲舉於鄉、屢上春官不第、以知州援例來川、權冤寧篆、聿茂循聲、旋代會理州事、會理接壤滇省、一日馳報滇匪數千、逼近州疆、邦人大恐、莫知所爲、公視之蔑如也、募勇練團、不日成軍、皆嚴整有法、匪畏威遁去、人以是多公才識爲不可及也、咸豐十年春、蕭廉訪啓疆奉命援川、知公能使將楚營英捷勇、而廉訪卒、當是時李藍二逆寇蜀、蹂躪戎嘉屬境上、因武陽城兩月餘、官兵數失利、檄公赴援、公至會兵更番迭進、擊破之、殲賊萬計、武陽解嚴、遂追賊於榮邑五里浩、資州蘇家灣、戰罔不克、賊望楚織輒遁、初公有猶子隨任、名宗綱者、好讀書、多奇計、公令隨營、贊畫之力爲多、於是叔姪兄弟、自楚來者、皆從公征戰、是年冬、藍逆入廣漢界、公帥師禦諸金堂之趙鎮、相距三十里、公曰、彼衆我寡、不可示以弱、宜先發扼其吭、出隊至中河嘴、遇賊與戰、斃前鋒獮悍者數百人、賊卻、公追之、盡逆傾巢、至衆三萬餘、馬隊數千、分股繞出、公後、撲公營、公



望壁上火發、知有失、督兵回救、賊衆大集、節節衝斷、官兵皆圍之數重、公戰酣、願麾下僅百餘人、語其姪曰、援絕矢亡、此余效死日也、策馬持矛大呼入賊陣、兵勇隨之、殺數十百人、公得潰圍出、家人趣公渡河、謀再舉、公不應、挺刃復戰、負重傷、撲於河、公叔宏彬、兄英杰、弟春樹、復彪、姪宗綱、正祥、暨守備黃鎮湘、外委劉國清、從九胡興儀、陳國興、監生劉輔臣、家人聶均、陳玉戴升、宋升、劉福、張玉、皆同時戰沒、兵勇陣亡過半、越日得公屍、面如生事聞、予知府優卹、建尊祠於趙鎮、其從公死節者、均得附祀、

邵棠圃曰、夫人當未事時、談忠孝節義、莫不奮袂攘臂、自許君父之難、必奮不顧身以殉、迄臨難、則又惜身命、冀妻孥苟免爲幸、聞公之風、能無媿耶、余當東過趙鎮、見大塚三、則叢瘞亡兵處也、問當時征戰事、居人類能詳言之、曾子曰、事君不忠、非孝也、戰陣無勇、非孝也、公于忠孝兩得之矣、禮大夫死衆、不亦死得其所乎、孔曰成仁、孟曰取義、公其有焉、

余濟村曰。賊以庚申十月初四日。竄趙鎮。楚兵戰歿二百餘人。川南兵亦死數百人。本鎮仁和上申。死者無算。盤踞至初十日。鎮中火起。燒賊甚衆。街房寺宇。十不存一。惟火神廟未燬。時余年十四。侍先慈彭太孺人。避亂邑城中。夜隨守陴者。登東門城樓。望趙鎮烽火。賊於次日拔營下懷口。夫趙鎮爲川北水陸會萃之區。行旅往來。號小成都。一旦橘柚殘林。剪伐無勞。霜破蔗糖滿地。飄零有似雪鋪。人亡財散。鬼哭神驚。利之所聚。受害尤烈。嘗見張禾雨先生祭趙鎮殉難軍士文。其警句云。滿腔熱血。宜葬碧如長宏。一隊鬼雄。勿介行于伯有。存歿難卜於家人。誰吟楚些。魂魄急歸其故土。毋戀川原。嗚呼。亦可哀已。

### 鄧汎弁

汎弁鄧公天斛。駐防趙鎮。咸豐庚申。藍逆犯鎮。公率勇丁出隊堵禦。被害同時死者。領旂秦三元。團丁王文成。鍾正油。江家山。杜祥望。周文蔚。劉慶有。吳大文。蕭詩全。陳育才。黃吉鼎。李昆山。曾道萃。謝孝清。曾道瓊。諸人。又文生曾炳奎。廖光藻。均遇賊被

害監生廖德同。罵賊不屈。賊怒剝其皮。支解之。其子八歲。亦殺之。其姪明啓。受傷兩日。復甦。始備述其由云。

### 沈永川

沈公諱耀章。咸豐庚申。攝永川篆。冬十一月初七日。漢匪全隊圍城。公率民兵登陴守禦。賊轟場西關一隅。有趙天錫。阮暢琴。任海者。曾受業勇士。任小樓。善擊刺。猛戰拒賊。數登皆撲退。城得復固。天錫日縋城殺賊。中火器旋卒。局紳惜恤費。民勇不力。十二日辰刻。西城復轟破。賊長驅大入。殺人如麻。公及捕汛員弁。沈萬青。李元福等。皆死之。惟廣文某公。改裝逸去。

余濟村曰。庚申永川之難。陣亡殉節者八九百人。玉石無分。同歸一劫。豈天之嗜殺歟。毋亦作孽者之殃及池魚耳。然而慷慨赴敵。非以爲名。陷敗死綏。詎曰無謂。是雖同罹不幸。有不得與殃橫同論者。一自彙報請卹。皆得光生泉壤矣。

### 袁公子

公子名慧、字叶熊、山東人、四川太和鎮通守袁公漱泉之冢嗣也、咸豐十一年春、滇匪犯川北、圍遂寧急、遂寧令盧光吉、漱泉妹婿也、聞警、漱泉遣慧督勇丁往援、戰潰、被執、賊誘諸城下、使誘遂人降、慧大呼曰、我太和鎮袁通判子某也、賊執我爲餌、以誘公等、公等好爲之、勿我顧、我死矣、遂被磔、既而賊功太和鎮城陷、漱泉長媳孫、次媳張、女四姑五姑、及孫女家屬男女共十二人、皆縊死、漱泉與夫人對縊於庭、賊救之、既蘇而罵、賊擁至其酋藍朝鼎所、卽藍大順也、偃僕迎勞、卑詞勸誘、袁誓求速死、賊贈以銀與馬、使行、袁怒揮之、罵益厲、藍逆曰、公勿爾、朝鼎好男子、終不居殺好官名、卽必欲死者、亦當別處去、袁不得已、還入署、覓舊繩結其斷、復縊、壁間匿賊出、解之下、仍擁至藍逆所、藍笑曰、公必死、朝鼎必不令公死、可奈何、令于營中曰、敢有犯袁公者死無赦、使四人持旗隨而護之、越日、并覓其夫人及次子歸之、乃相扶顛蹶出城、欲往遂寧、途遇援軍載以免、然賊之必不死公者、未必非有感於慧也、

牛雪樵曰、一門節烈奇矣、漱泉罵賊求死、至再四、賊終不怒、死亦不可得、抑又奇

焉。當時殉難士女皆蒙旌卹。獨不及袁氏眷。豈以袁之未死累乎。果爾。使文信國得黃冠南歸。卽爲門族玷矣。至長君慧所爲。尤凜烈有生氣。晉解揚之於宋。漢路中大夫之於齊。皆佯諾敵而致其主命。大節千秋。彪炳史冊。若慧者。其多讓乎。而受禍獨酷。人有顯微。事有明晦。自古忠義之魂。湮沒者衆矣。豈不悲哉。近聞已補報矣。爲之一慰。

余濟村曰。傳聞賊入公署內。搜獲皮箱一。啓視之。惟有棉花十餘觔。制錢二釧。餘無他物。賊歎曰。眞清官也。羅君器之詩云。雪刃霜戈月偃營。旌旗匝野馬嘶聲。一城百姓都降服。十二真人獨舍生。

王縣丞

王君諱鎮堃。中江人。福建龍溪知縣。王公履吉之孫也。幼孤。貌頎俊。而性行倜儻。雖業儒。素不屑屑於繩尺規度間。結客縱酒。立散千金不顧。二赴鄉闈。卽棄去。求試吏。甘州。以縣丞指贊回籍。而雍涼慷慨之氣。已現眉睫間。時藍李二逆圍遼寧。告急鄰

邑君乃破產糾合弟姪親故義勇三百人，以行自太和鎮，通守袁公阻之曰：是吾見之續也，且駐此以遏其西，上可乎？蓋是時袁公長子叶熊，方以五百人援遂，見搆賊支解於遂之東門，以衆寡之懸殊也。君念遏賊上游計亦得，即移師鎮城，部署輟筆，而賊已至，梯衝雲屯，晝夜攻不息。君同袁公分門守禦，出奇制勝，計城可保。適土著奸民通賊，獻城爲內應，賊已入鎮，君猶袴褶立陣上指揮，有鎗中面，乃踣。時咸豐十一年二月十九日也。同時死者有勇目艾榮陞以下若干人，賊遂大掠，破射洪，圍郡城矣。君沒屍故未壞，一子從行，暫逸復還，啓視公屍，親身之梓，已弗能易，遂加棺載歸，事聞奉旨入昭忠祠，世襲雲騎尉。

熊訓導

熊公諱紹伊，字莘臣，江津人，少穎悟，弱冠補博士弟子，旋登賢書，以大挑選射洪訓導，善誘掖後進，從游多知名士，繼偕胡孝廉炳奎，究心濂洛，能得先儒要領，滇逆犯蜀，輒趣邑令講防守之策，旣而度勢不支，期以死自效，辛酉春，賊攻太和鎮，距射四

十里、礮聲徹兩耳、晝夜不息、太鎮陷、射人洶洶無固志、公猶登陣以大義激勉、未幾賊逼城南、民已啓東西門奔潰、公頓足曰、事至此乎、急趨泮池、慮水淺不即絕、手鳩酒將服、諸子環跪泣阻、叱之退不得、則奮臂擊之、遽仰藥投池死、時二月二十一日也、越三日、賊得公屍、面如生、具衣冠、瘞鄉賢祠外、題曰忠義熊公、相率羅拜去、公有至性、嘗兩刲股療母疾、德配鄧夫人、亦兩刲股於姑與夫、忠孝之積、蓋有自來矣、當賊未至時、公嘗夢謁宣聖、宣聖賜之脯、味吟、又一夕、夢進鄉賢祠、先儒約有十餘人、咸雍容揖讓、推公就坐、醒甚詫異、數日而殉難、鬻官、公長子被賊掠去、至三臺麻衣洞遁歸、當城潰時、同齋易某、被戕城外、射人每并述、以爲得失之鑑云、

余濟村曰、射城之潰、縣令走潼川、公無守土之責、而以身殉泮池、可謂能得死所矣、吾聞嘉慶時、教匪圍太平、令尉俱出城走、教諭魏詩、督勇堵禦、卒保危城、亦司鐸中不可多得者矣、恭讀 聖諭廣訓隆學校一條云、廣文一官、朕特飭吏部悉以孝廉明經、補用、凡以爲興賢育才、化民成俗計也、可知冷氈一席、並非 朝廷

不甚愛情之官。視夫人之自立何如耳。采葑集中。載公同齋易公。嘗教人宗程朱之學。著有理學解。論語時行解。當城潰時。易公送妻妾幼子出城。是時百姓紛紛跳城下。堞上堆有雞卵大石。下城者。易公左額。血流不止。卒。胡君炳奎弔以詩云。我心匪石石傷生。信是捐軀節亦貞。深喻居官曾守志。漫言避寇不原情。魂隨范柏歸文里。境異曾參寓武城。我恐史臣編未到。大書特筆著公名。越明年。先兄魯生攝射洪學篆。見鄉賢祠壁間。賊書忠義熊公四字。墨跡猶新。令人肅然起敬云。

呂驛丞

呂公諱豫江。綿州魏城驛驛丞。咸豐辛酉三月二十八日。滇逆藍大順圍綿州。二十九日。破魏城驛。公及把總楊某均巷戰死。先是梓潼令張公香海。辦城團甚周備。以二月調安邑。四月初九日。賊陷安邑。張公香海死之。十一日陷彰明。十二日陷江油。知事李公東又死之。自綿州圍後。三縣連陷。而魏城實先受害。土匪四起。遠近騷然。



至八月十五日、駱撫軍督師大破賊於綿州、餘賊始西竄而去、

### 占威烈

占公諱泰、字岳亭、幼嫻武略、由偏裨洊升提督、戰功卓著、賞給伊克斯巴圖魯勇號。咸豐庚申、滇匪擾蜀、公同知府田公良、帶勇援勦、所向克捷、辛酉、藍逆糾羣匪十餘萬、困綿州、公率萬人、駐羅江卓角鋪、檄援兵未集、州城危甚、公憤不及待、束身持矛、率精銳千人、奪賊要害、賊初披靡、值驍賊藍朝柱大隊突至、寡衆不敵、公陷陣、兵潰逃、惟勇丁陳謙隨、公受創、謙愈奮殺、扶公走、賊擄公、謙死之、脅公降、罵不稍屈、欲誘公賺城、公罵益烈、賊優容、日進殺酒不食、時營中將佐、探公死生、苦無往者、部下勇丁駱耀龍、吳俊約曰、主帥陷賊、何辱如之、敢愛生乎、吾兩人幸有生還者、則詳告占公死所、如俱死、必以夢告、言畢辭衆行、萬目相送、直入賊壘、及公遇害、駱吳果同難、大兵克賊後、尋公屍不獲、有從賊中脫歸、述公死日、及駱吳同遇害狀、不爽、惟不識屍所、公家屬求屍日久、一夜宿齋寺、夢駱吳二人至、曰、大人來矣、語間、駱從如舊、直

進寺臺階下、席地坐、方欲趨叩、而公與衆杳矣、醒後、卽於階下掘得公屍、足上編履、猶在、面目鬚眉如生、乃迎歸葬之、 奏建專祠、肖公像、立木主於中、駱吳陳三人、得以配享、吳陳成都人、駱華陽人、公生時、識人善任、拔雲南提督唐公友耕於微時、公卒後、唐公每臨大敵、先一日必夢公指授方略、戰必大捷、初、金堂趙鎮士人楊錫成、被擄賊中、賊詢知爲儒士、置僞副帥藍朝柱幕中、掌書記、欲逸無間、逾年、賊犯緜疆、時楊尙在賊幟、一日聞中軍傳請占大人入幕、命楊伴守、楊始知公爲賊擄、公入幕、不言亦不食、賊目日夜勸降者數輩、皆不應、時值更殘、人靜、彼此相對歎歎、公謂楊曰、汝讀書人、當知順逆、賊巢豈可久處、我爲大員、固不敢惜身命、辱國體、汝編氓也、可設法逃逸、別尋生業、楊曰、久有逸志、但係劫火餘生、恐此後難尋別業、公曰、無慮、解腰閒扣帶授楊曰、持此見唐將友耕、必能用汝、明日勸降者復至、公正襟危坐、不顧勸者怒而出、是夜五鼓、俄聞帳外喧云、請占大人、公起、整文冠、坐竹輿中、楊尾其後、見賊衆昇公至營後、將害之、公面無戚容、從容北向叩謝、始受刃焉、後綿州圍解、

楊乘敗逃出。帶旋矢。但見吾鄉父老。猶能歷敘公死節情狀云。

余濟村曰。公視死如歸。從容就義。其大節已足昭千古。而何小塘明府。雅安防賊記中。于公之行兵。頗有不滿意處。甚矣人言豈可盡信與。然觀何明府所紀。則知當日傳言周公山放賊之事。不爲無因矣。此時游勇肆行無忌。原不足恃。徒滋擾閭閻耳。庚申冬。藍逆踞趙鎮。楚兵失利。關游擊志林。移營金堂城內。勇與團丁有隙。遂劫團首陳姓家。城內居人。皆閉戶自守。又訛言關勇與賊通。賴縣大夫蔣公寶清。百計曲全。關勇始移營城外。幸楚軍夜焚賊壘。賊悉衆竄懷鎮。關勇亦拔營去。此與雅安劫衛事無異。均賴賢守令爲之保護耳。及後駱公督師入川。首裁游勇。而忠域之衆。屏迹無何有之鄉。公之識見。非尋常用兵者所能及也。

### 張安縣

張公諱香海。字牟子。山東蓬萊舉人。咸豐戊午。知梓潼縣事。頌聲載道。大府知公仕學兼優。調省襄校文闈。辛酉三月。署安縣。時藍逆棄遂寧。圍綿州。州牧唐公炯督率

有方守陴嚴密。逾月不下。始分股撲屬縣。公到任甫一月。賊驟至。城素低狹。只四百餘垛。城中壯丁不敷役。賊黨李長毛謝寡婦等。分隊駐癢龜灘。距縣十餘里。烽火相望。公晝夜登陴。率衆堵禦。賊環攻四五日。公轟斃千餘。賊憤激。日夜加攻。外援不至。督守益力。無何。城內有朱生某。與賊通謀。塞城上礮眼爲內應。賊用地雷轟城。城裂五丈許。汎弁劉同武舉鍾。殺賊三百餘人。巷戰死。公及典史戴。俱遇害。賊屠其城。先是公恐城不能守。遣兒媳少女赴省。故公死而舉家無恙。賊退。衆發朱某奸。捕之急。竄入彰明。擒獲磔之。繁江釋雪堂有弔張牟子司馬詩云。與君作知己。往來方二春。讀君之著作。知君之爲人。自注司馬手著牟子集十二卷上足報廊廟。下足安黎民。父母保赤子。不愧宰官身。司馬會以如保赤子集十二卷造化難咨詢。咸豐辛酉夏。綿州遭燠塵。君官所屬邑。相依云齒唇。是時妖饑惡。瀕洞如奔輪。木大拔不易。先斬旁荆榛。安城小如斗。素無堅固因。豺豕偵知熟。十萬同日臻。壤山復塞野。累卵誰代陳。城中一無恃。民弱軍且貧。惟君嬰城守。賊勁少不伸。力持數晝夜。卒無相教鄰。仰天再三歎。志

矢爲張巡。生死與城共。刀踞甘如醇。我爲作長歌。歌罷爲吟呻。天南守土者。安得皆君倫。殊堪酬祿養。而全忠節臣。

余澣村曰。公有守土之責。而卒以身殉。城亡與亡。固其宜也。而采葑集載安城破時。公微服雜稠人中奔走。爲賣菜傭所識。遂遇害。其言似出情理之外。猶憶光緒戊寅。予主講同文書院。時雪堂自京師回繁。寄余綠天詩鈔。中有弔張司馬詩。附載於此。讀雪堂詩。而公之死節益明矣。公爲同邑何鑑生觀察薦卷房師。觀察詩集中。亦載有弔公殉難詩。尤激昂詳盡。惜未攜入行篋。異日當補錄之。

### 李江油

李公諱東。字敬之。直隸盧龍舉人。仕蜀。咸豐九年冬。攝江油縣事。時藍李二逆起。鴟張甚。公以此時政務團練爲急。辦理井井。著鄉兵管見一書。大吏嘉之。飭屬通行。十一年三月。賊圍綿州。衆數十萬。分黨連陷安縣彰明。遂破江屬之中壩場。勢如風雨。公嬰城固守。既而賊大至。紳團未見大敵。且爲賊先聲所劫。遂潰逃不可止。四月十

二日城陷公及家人曹堃皆被執逼降公裂眦大罵賊義之不加害擁赴中壩將徐圖勸誘也及河公投水曹堃隨之賊驚救而公已斃屍逐浪遠拯堃出驅之去數日逃出覓得公屍集附近士民殮殯焉公一子年十二賊攜至綿州八月與縣民龍姓逃回仍由曹堃經紀送至省城與其母居焉

楊威肅 光坦附

襲侯業公諱忻崇慶州人一等昭勇侯故陝甘總督忠武公之孫故閩浙總督國植公之子也欽賜文舉承襲侯爵二等待衛智勇有祖風咸豐辛酉滇賊何馬燈約數萬餘衆犯崇慶州紫白頭鋪公率忠勇軍擊勦賊敗走於南河壩虹橋水碾設伏以待官兵公與協鎮張公游府關公計曰逆賊四路狂竄乘勝而往一鼓可擒忻提兵從大路進發二公率兵分左右翼夾攻之必大捷皆然之公整隊甫行數里諜報白頭鋪無賊公疑不前賊僞爲耘田者以給之軍抵虹橋賊舉白旗爲號四面重圍公督勇衝殺力不能支遂遇害時五月十一日也事聞蔭雲騎尉世職 予諡威肅

敕建專祠。楊孝廉器之。弔以詩云。驅賊虹橋速進兵。渾身是膽氣縱橫。忠承大父輝前烈。勇著文孫繼後聲。戰死沙場歸馬革。報恩君國化鵲鳴。關西夫子遺賢嗣。他日渡煙閣上銘。同楊公光坦。河南候補知縣。請假回籍。因本省滇匪軍務。督勇勦賊。同威肅公中伏陣亡。

余濟村曰。凡執干戈以衛社稷而死者。例得並書。况公爲忠賢之後。以身報國。可逸而不書乎。或咎公紀律不嚴。兵勇常與民團滋事。是蓋未審夫當日之情事也。庚申辛酉間。蜀地盜賊幾徧。大府視民團過重。稍能自衛桑梓者。給予五品功牌。以示鼓勵。故朝而挈鉏。夕而翎頂者。指不勝屈。於是刁健無知之徒。恃衆侮官。一時統兵主將。與團總齟齬。兵團遂相水火。每致互相爭殺。此余當日所親見者也。守土官司。必下氣調停。兩解始息。是兵與團均分其咎矣。時廣漢驛有無名氏題壁詩云。九重尙有窮天子。四海俱無賤丈夫。下句恰合時事。

黃忠壯

黃公諱純熙、字子春、江西鄱陽人、幼讀書、即以古人自命、好騎馬擊劍、彈棋善射、能左右算、識者知爲遠大器、道光丙午舉於鄉、繼捷南宮成進士、以知縣簽分湖南、歷任綏寧會同州鄉、除弊、甦困、練勇、籌防、循聲卓著、性淡泊、不撓情利祿、以病乞休者屢矣、時曾滌生制府、陳竹伯中丞、塔智亭軍門、皆以上賓禮聘入戎幕、公或允或辭、或參其軍數月而退、終莫能強也、自言嘗與滌帥論兵事書、破除官例、隨事暢寫、故得滔滔盡言、咸豐八年、守制星沙、時石逆達開圍寶慶、號稱百萬、駱籲門星使、卽家強起公主軍事、公不得已受事、治軍嚴明、信賞必罰、事無鉅細、綜理不遺、自草公牘、脫稿未嘗點竄一字、其精敏非人所能及、血戰十數、解寶慶圍、大帥扼其功不上、公處之怡然、嗣轉戰永靖、郴道各府州縣、以不次功保知府、累遷至監司、嘗撫膺歎曰、吾受恩深重、不知死所矣、會滇匪擾蜀、駱公以湖南巡撫帥師援川、公爲前隊、帶果毅營、咸豐十一年正月、由楚南至川境、四月十七日、抵萬縣、聞逆匪何國梁、以三萬餘人圍順慶、五月初六日、公率師馳赴順境、賊已解圍去、攻定遠垂危、公卽於初八



日兼程進討、十一日、大破賊於定遠郭外、生擒何國梁正法、立解城圍、殺賊萬餘、逼入江中者無算、奪騾馬五百餘匹、救出難民萬餘、賊遁者僅千餘耳、公整隊窮追、十四日抵萬古場、離二郎場二十里、其地四山壁立、田谷阻深、一綫羊腸、盤紆屈曲、箐林茂密、素稱絕險、由此北定潼川、西走遂寧、均有江水限隔、逆黨被追急、恐不得渡、乃爲背城之舉、適另股朱僞統領率衆數千、由青岡壩一路竄至、兩賊既合、勢復振、遂四面設伏、虛二郎場以誘官軍、十五日五鼓、公派隊踉蹌行至燕子窩、突與賊遇、前營奮勇衝擊、賊反走、公知有伏、卽分飭各營、分左右路搜勦、親率中軍大旗、隨後策應、我兵始分、賊伏四起、朱逆另股、自後抄至、層見疊出、蜂擁直前、槍礮奮擊、賊死拒不退、隴畝間隔、官軍立足無地、分合皆難、田中泥深數尺、下足卽陷、咫尺之間、彼此不能相顧、公知中伏、率部下前進、親兵控馬請退、公叱曰、此何可走、走卽六營同盡耳、左右均死戰、幕友鄧赤子、蔡月巖、助戰被戕、各營遠隔不能救、公知事不可爲、遂拔刀直衝賊陣、前賊驚走、後賊踵至、圍復合、親兵十餘人、各以死拒、皆戰歿、公猶

奮刀馳突、鬚眉磔張、手刃數賊、旋以左脅中、矛刀傷右臂、墜馬、賊爭擁至場、迫令跪、公厲聲罵曰、黃統領豈跪賊者、欲殺便殺耳、賊怒斷其首、支解而火之、部屬收集遺骸、喪其元、餘亦灰燼、惟存左足以布裹之、已而鄉人奉元來獻、面色如生、並覓得右手右足、十八日、奉安竹輿中、歸於果州、至二十一日、鄉人又以公左手半截獻、五指宛然、時甚酷熱、距歿已七日、而肉不腐、且有一種香氣、但已大斂、別用木盒盛之、果城官紳依例迎入、易棺收斂如儀、婦孺氓庶、罔不悲痛失聲、駱帥據狀奏聞、議卹有加、以藩司禮葬公、廕其子、准建專祠於果州城內、鄧蔡二君及鄒琴戎配焉。

余濟村曰、公歷任三邑、官書從未嘗假手幕密、又能出入勾稽、左右手算、錢穀交代、卸篆即出、此雖緒餘、亦足見公才智、嘗見曹光詔、公行營公牘跋云、燕子窩之戰、前營聞敗、不回救、後隊聞敗、不前援、公遂及於難、當鄧蔡二君墜馬時、公呼前營營官某前、某應之而逸、公憤焉、親兵某控公馬、請退叱之、率左右直前猛撲、乃俱為賊擁至場、假令前隊聞而折回、後隊聞而前進、無難奪公以出、考公從軍

固早以死自誓。而在事員弁。於次日陸續逃歸。乃云此番幸統領已亡。若其不亡。吾輩必有一二百人正軍法。既視主帥之亡而不救。又幸主帥之亡而免罪。且俾而免罪。則亦已矣。又思以輕進之罪歸主帥。以結後圖。夫護主死義之員弁。既當從優請卹。則背主滅義之員弁。即當分別治罪。竟事後不戮一人。此事於行軍司馬劉公。不能無憾焉。

### 譚都司

譚公諱健。成都人。先世以武功起家。父某。重慶守備。早卒。母馬氏。能以義方訓子。公以廕積勞。授瀘甯營守備。咸豐十一年。署黔彭營都司。母夫人及妻陳俱來。先是全蜀有藍逆之變。酉獨晏如。紳民狃於地僻山險。毫不做備。突於八月初。諜報粵匪由郁鎮竄縣境。文武聚議出師。公少年勇於自任。以爲賊不足平。母夫人亦勗之曰。自吾爲汝家婦。逮事三世。均以武職受國恩。汝勉之。公曰。唯。乃集城內兵丁一百數十名。至縣西梅子關。扼險自守。時八月十九日也。無何賊至。旌旂出山谷間。公以千里

鏡燭之曰、賊幸少、我兵其無恐、賊前隊、以數百長髮、塗面銜刀持長矛誘戰、而伏賊詭從他道、小梅子極來攻、方戰之始、領哨外委宋孝榮、宋從先率兵丁力鬪、呼聲動天地、無不一以當百、賊幾不支、瞥見賊由後至、鄉勇之助戰者先潰、兵亦潰、孝榮急扶公上馬走、公指其心曰、死死、遂揮刀復戰、被殺、孝榮等亦以力護陣亡、公母聞而慘然謂公妻陳氏曰、吾策吾兒必死王事、今果然矣、吾子盡忠、吾與汝不可不盡節、卽閉戶同時自縊死、越日家人收殮之、色俱如生、賊踞城幾一月、教諭李公會白死之、九月十四日、賊自龔壩渡河、東入咸豐界、城復、事聞於朝、得卹典如例、李公自有傳、

張袞甫曰、余自今過梅子關、父老爲余指譚都戎死事處、未嘗不欷歔流涕、獨怪公以百數十之兵、敢拒強賊近萬之衆、而不膽懾、非獨公之勇、乃母之素教使然也、母教之忠、而母與妻遂俱盡矣、慘哉、然民得少緩須臾、聞耗率家人父子遠避、而賊亦恐前路復有阻禦、不敢徑趨城內、繞城三匝而後入者、則公之一戰有以

震之也。

余濟村曰。川省成華兩邑。爲首善之區。咸同間。雖未遭賊蹂躪之苦。又豈無忠義之士。出而殺賊捐軀者乎。何成都續志。所載者竟寥寥耶。如譚公本成都人。而續志未載。黔江志載有朱肇琇。梅關節一詩。爲譚公作也。詩曰。臣年十五說長劍。身不屈。頭可斷。帳前斗酒呼健兒。邊城誓保花封縣。賊來奮臂與賊戰。倉皇出師手刃賊。殺賊難盡臣馬齒。臣馬齒。臣力竭。滿山秋草濺碧血。西風日落陣雲寒。夜夜冷照梅關月。

李廣文

李公諱曾白。字魯牛。長壽縣人。道光乙酉舉人。甲辰大挑二等。選授黔江教諭。咸豐辛酉秋。粵匪自婺川入彭涪界。直逼黔境。邑令胡某不爲備。公說令曰。黔當賊鋒。蜀東門戶。厚集民團以待大兵。尙可支持。倘使闖入。失此彈丸。東南半壁搖矣。令曰。某瓜代有日。未奉成命。俟新令爲之。公厲色曰。戍允文矯詔破金。劉順昌孤城卻敵。豈

皆有命而後爲哉。我輩在位一日，當爲朝廷守土一日，力竭死事分耳。設使有濟，旣全吾身，又保吾民矣。令赧然唯唯，防務仍不墜。八月十五日，郁山鎮警報至，邑諸生集學署勸公早避。公曰：讀書數十年，豈於見危授命一語，尙未前聞乎？吾有死而已。十九日，都司譚健戰沒於梅子關，賊長驅至縣，公慙某，給以縣君請議事，公出門，姪挽以走，公力掙不脫，口齧其臂，乃釋歸。於是閉閣絕食，自撰輓聯云：處死非難，不久一死，他生未卜，無誤此生。又步其祖開先公易簣原韻詩曰：花甲週餘又七秋，放懷天地等閒鷗。青山伴我鬚眉古，白髮思親草木愁。幾卷縑緗供寢枕，一生事迹付殘甌。那堪倉猝烽煙警，報國深慚跨鶴游。邑諸生迎公妻子去，惟一老奴叩門號泣，公啓關，奴入跪，公曰：若何爲？奴曰：縣公遁矣，聞汛捕兩爺死，爺可避，公大怒，踢奴踏懷，印具朝服拜。聖廟歸，縊明倫堂上，婢女碗香哭救，公懸足踢婢於地不起，奴解帛，公復甦，遂奴去，仍自縊死，奴亦殉於階下，賊入學署，剝公朝服，婢甦罵賊，亦被殺，賊肆焚掠，推禁燬學宮，城復日，士民上其事，爲公建專祠，塑老奴於旁以祀之，邑人謠

曰、鐵鑄李廣文。泥塑胡知縣。廣文俎豆馨。知縣等獨蒙。公有經濟才。惜未竟其用。著有讀經志疑六卷。封圻扼要四卷。沿邊要隘四卷。七省海防二卷。守拙齋日記二十卷。文存二十卷。詩存二十卷。子潑然。光緒己丑進士。簽分廣東知縣。

余澹村曰。余與李君命三。先後同學。尊經講舍。其時李君文名已滿蜀都。經術湛深。議論慷慨。南宮旋捷。作吏羊城。家學淵源。吾知其必有所展布也。竊見近年高。撥巍科者。多忠臣孝子節婦之後。誰謂天地抑邪與正之心。盡泯於昏亂耶。西州冉瑞銑弔公詩。末數句云。吁嗟乎。曾子師耳。子思臣耳。爲臣思避賊。爲師知報國。廣文一死重泰山。何物守令竟斬關。

### 國新寧

國公諱樹。同治元年。署新寧縣事。滇匪藍朝柱。經官軍痛勦後。率其殘匪百餘人。竄南部僻境。適郭張朱曹各逆。自營渠奪路。與藍逆合股。向東鄉達縣狂奔。道員張公由庚。率嚮導營躡勦。逆遂乘夜遁走。直撲新寧城。公會督文武紳民。登陴固守。槍礮

灰石轟擊，斃賊多名。賊連日拚死攻，撲公與賊相擊兩晝夜，力竭兵單，遂於正月初十日失陷。公率其弟國富、家人劉珍、鄧興、石玉等巷戰，公身被四創，知不可爲，遂自盡。國富及家人皆被害。典史耿鳳翔、把總何玉春被執，罵賊不屈死。事聞，均從優議卹。

余濟村曰：謹按駱文忠片奏，據賊中逃出文生黃鼎稟稱，被賊擄入藍逆營中。幾至一年，藍逆名朝鼎、雲南昭通人。賊中稱僞帥主，驍悍善戰。其族人名朝柱，年長朝鼎數月，呼之爲兄。賊中稱僞副帥。然諸事悉聽朝鼎調度。今外間或稱朝柱爲大順，朝鼎爲二順。其實賊中無此稱謂。初至緜州，擁衆至十六七萬，設僞都統分轄。僞都統皆昭通人，僞統領以下始雜用川人等語。由此觀之，朝柱實非巨魁也。蓋至去年冬，官軍克復丹稜，鼎逆授首，而柱逆遂自爲賊帥也。

### 陳巡政

陳公諱翼，字雲亭，陝西長安人。少讀書，有膽略。道光初年，張格爾亂起，棄帖牌業，習



邊事、嘗投陝督楊公遇春軍幕、充新驛印房差務、十年、庫車大臣常公薦舉、以未入流資銓、十六年、遷四川東鄉縣典史、捕盜有聲、勤恤圉固、髡鉗德之、三十年、卓異遷太平縣、黃鍾堡巡檢、咸豐十一年十月、藍逆爲官軍所敗、亡入川東、合張郭曹卓之黨、歧爲五道、勢復張、遂侵綏郡、東梁開墊、賊壘相望、太尤戒嚴、堡人瞥見屏幟、請公驅入口入太城、從縣官爲捍禦計、且自救、堡無郭郭、旦夕恐不保、公曰、天子命翼爲此土官、堡雖小、翼資守也、離此一步、非死所矣、吾少親戎旅、識敵情、衆志可以成城、堅深胡恃、其聚吾堡人、錢鏘者兵之、布帛者旗之、丁壯者伍之、谿谷樹塹、邏候颯敵、擊鼓爲援、設伏以應、惡見其不勝也、堡人聞之、氣皆壯、明年同治壬戌四月、太城陷、公親率堡子弟扼賊於絲羅壩、及巴坪口、無敢犯堡者、五月、楚師易公佩紳、敗賊於白沙河、賊趨陝、襲定遠西鄉等縣、太境漸賤、脅從者乘間歸、公悉給牒導出境、賊中皆震公名、六月初三日、忽聞賊南向、謀言欲圖公、公遣劉先者偵之、先匿臥村中、坐是不得耗、賊日夜行百八十里、初六日五鼓掩至、圍堡三匝、公聞變、令田孺入率男

女避孺人欲與公俱。公正色曰：汝謂我遂厄乎？以汝婦人，不可久居此耳。語畢，裂襟裹首，偕幕客陳相畬督團丁數十人，巷戰不支。及長子文光、三子文藻，皆被執，賊殺相畬。奇公貌，絳相從，公憤罵不絕，遂被害。時年六十。方公之擊賊也，田孺人及女墜岩，死復蘇。遇舊館師冉翁，救匿山谷中。次子文治、四子文運，雜鄉里小兒中去。光藻居賊中，皆相失行。久乃偕，夜給賊以洩，同穴糲糝中，間道歸。返母及弟妹，殮公屍，及相畬屍，葬東鄉縣之原。制府駱公聞於朝，褒卹有加。世雲騎尉。長子文光襲焉。再從死老僕薛升山西人。

楊虞裳曰：吾嘗適秦，過太邑，問所謂黃鍾堡者，蓋叢谷中一塵地耳。非有十雉之城，一旅之卒，其奚能守？使公徙民邑城，然後抗漁陽以堅河北，其功烈豈出平原下哉？然又安知其不爲巡遠也？無社稷封疆之責，而守諸侯大夫之義，非忠烈者能之歟？彼相畬者，亦可以不朽矣。

余濟村曰：予少時習聞公殉難事，而未得其詳。後覽四川忠義錄，僅載公名，亦未

書死事時日。光緒庚子歲。余司訓南安。公長君夢蕉。適居縣幕。年已五十餘矣。與余朝夕過從。因悉公死事狀。並出示楊舍人所爲家傳。亟登之。以爲食祿者勸。

### 楊職員

楊公諱錄、綦江縣令楊公銘之弟、同治元年、粵逆石達開、銳意窺蜀、自涪州敗後、零股三千餘人、急赴桐梓、石逆擁衆數萬、圍綦江、公兄銘知縣事、率衆登陴、誓以死守、賊晝夜環撲、公及公兄親督練勇堵禦、悍賊百餘、緣梯上、公死拒不退、賊砍公頭殞命、兄銘見勢危急、督勇奮擊、立殲登城賊、礮石雨下、賊不敢繼登、併日掘地道圖轟城、四月十一日寅刻、南門轟陷十餘丈、幸城內先掘內濠、並築土垣、訓導蕭君世楷、團紳陳君嘉陞、督團勇據住內濠、鎗礮環擊、練勇二百餘名、越濠血戰、賊不能進、知府唐公炯、帶黔勇直搗賊營、城內團勇悉出、前後夾攻、追賊二十餘里、城圍立解、先是公夫人陳氏、聞公被害、卽率子女三人投池以殉、制府駱公奏聞、照七品職員從優議敘、陳夫人一例予旌。

余濟村曰、公無民社之責。而有效死勿去之心。夫人子女。同時以殉。可謂忠烈著於一門矣。聞石逆犯蜀時。蜀人扶鸞有見豕沉埋在蜀江之語。計石逆亡於癸亥。見豕之言果驗。吉水曾君東山語余云。石逆前竄江右。謁張真人殉後事。真人書王於西方四字與之。石逆遂生窺蜀心。而不知王卽亡也。是眞事有前定歟。今將石逆原供。節錄於左。

據石達開供係廣西貴縣人。祖輩由廣東和平縣移貴居住。現年三十三歲。父昌奎。與母均故。並無兄弟。娶妻王氏。生有子女。均在南京被害。後來妻妾五人。幼孩二人。均在河邊投水身死。只存親生一子石定忠。年五歲。達開自幼讀書未成。耕種爲業。道光二十九年。因本縣土人趕逐客人。無家可歸。同洪秀全、楊秀清、韋昌輝、蕭朝貴、馮雲山。共六人。聚衆起事。推洪爲首。洪亦廣東人。現年五十餘歲。初時不過萬人。後來人多。三十年。先踞永安州城。遂圍攻桂林省城。解圍後。二年三月。走全州出省。四月。至湖南道州。攻長沙省城。蕭朝貴被礮轟死。十月解圍。竄岳州。

破湖北省城、由武昌下江西、九江省、破安慶省城、三年、直抵金陵、從北門挖地道、用地雷轟陷城垣、達開起事、即稱王、與洪秀全等、同住江南省城、楊秀清性傲、韋昌輝屢受其辱、七年、達開領衆在湖北、聞有內亂之信、韋請洪誅楊、洪不許、轉加楊偽號、韋不服、將楊殺死、達開返回金陵排解、洪心疑要殺韋、達開見事不好、走安徽、妻室兒女、留在金陵城內、均被韋害、達開復由安徽回金陵、洪即將韋殺下、有謀害達開意、旋即逃出、七年、從安徽至江西、福建、八年、回南安、九年、到湖南、圍攻寶慶、兩月不能下、是年回廣西、至賓州、因夥衆三江兩湖人多、各有思歸念、不能管束、將大隊散回、達開在南甯府、沒有多人、想要隱居山林、因到處懸賞嚴拿、無地藏身、十一年、復聚數萬人出廣西、由湖南至湖北、久想占踞四川、同治元年、由利川入川、到石柱、涪州、有二十多萬人、後來裹脅更多、頭隊攻破長寧、不能深入、繞道遵義、昭通、想從橫江過河、令頭隊由屏山縣入、令李福猷、紫雲南副官村、又令賴剝皮、分股繞入寧遠府、使官兵不能兼顧、約在米糧壩交界地方、與中旗

會齊先進、達開因橫江敗後、率衆繞至米糧壩、知前隊與賴剝皮、已由寧遠大路前進、李福猷自副官村敗後、欲由貴州邊界繞入川境、達開卽率衆渡金江、經寧遠恐大路有官兵攔阻、改走西邊小路、只要搶過大渡河、卽可安心前進、不料至紫打地土司地方、探看上下河岸、皆有官兵、河水忽漲、那些夷人、三面時來搶擄、造船紮筏、搶渡幾次、均被北岸官兵擊沉、傷萬多人、後來食盡、死亡無數、達開欲投河自盡、因想真心投誠、或可僥倖免死、達開想救衆人、俱令棄城投誠、率領黃再忠等三人、並兒子定忠、過河到唐總兵營內、其未渡河者、不知如何下落、所供是實、

擷錄許平叔蘭茗館外史紀粵寇一則

石達開者、以財雄一方、素慕遊俠、好結納而不能擇人、惟日與健兒、馳馬較射、擊挺舞槊爲樂、先是其鄉有峻嶺、爲劇盜所據、劫取過往財物、無幸脫者、有閩客挾重貲經此、聞而心悸、久耳石名、因投刺踵謁、備陳衷曲、乞庇護、石憐而許之、款留

少住、將擇健兒衛送過嶺、盜聞怒甚、率其黨百人、徑至石家、欲圖擄奪、石聞盜至、令開門召入告之曰、壯士之所欲者貨財也、第念閩客挾重貲、離鄉井、以謀得什一、意良苦、今壯士不諒其衷、將盡攘爲己有、彼則本之不存、利將焉望、僕滋不忍、敢爲緩頰、因準閩客貲、約計五千金、乃解囊如數列于几、謂曰、聊備不腆、敬獻壯士、代客請命、倘壯士矜而宥之、卽不啻身受其賜、羣盜相顧嘆曰、人言石公重義、輕財信然、吾儕重違公命、但令閩客就道、毋恐、然公所惠豐腆、受之有愧、敢辭、石大悅、治席爲閩客祖餞、兼酌羣盜、酒酣彼此傾吐肝膽、席散、閩客拜謝而別、羣盜興辭、石仍出前金投贈、推讓再三、始受其半、羣盜旣歸、感石、謀有以報之、值石初度、因備珍異錦繡爲石壽、石大合樂、燕客三日、盜亦在座、有與石挾嫌者、密報邑令、令正患盜、聞言、亟督兵役馳往、圍其宅、並石與盜盡擒之、禁獄中、石與楊秀清故爲莫逆交、嘗貸楊金而不責償、陽旣爲僞東王、欲報石德、會石下獄、遂劫出之、稱爲僞翼王云、

里欒子曰。粵寇之變。雖曰天運使然。而人事究亦難逃其責也。我聞金田嘯聚。其初黨羽不過三百餘人。向使地方有司。果能設法化導。格其邪心。固善。萬一著曹執迷不悟。卽乘其勢尙未張。一鼓殲之。消患未萌。亦不爲虐。乃計不出此。卒使星。星燿火。燎及崑岡。涓涓沘泉。蕩成巨浸。迨順流下竄。竊據金陵。十餘年來。沿江一帶。民無完居。屠毒生靈。不可勝計。試觀其猖獗無忌。形同梟獍。不真令人髮指哉。

周長寧

周公諱于塋。同治壬戌。知長寧縣事。夏五月。石逆圍攻綦江。志不得逞。復爲官軍擊敗。遂竄攻長寧。公督團練登城。併力拒守。石逆圍攻數次。城小兵單。遂陷。公率勇巷戰。被傷。賊縛之。迫降。公大罵曰。我朝廷印官。城亡與亡。鼠輩何多言耶。賊怒。白刃交加。遂遇害。全家同日以殉。事聞。照直隸州。議卹。

余濟村曰。余讀公城亡與亡之語。不禁掩卷三歎也。夫賊焰正熾時。有城未亡而令先出亡者。有城將亡而令卽逃亡者。然則城亡與亡者。卽謂亡而不亡可也。出



亡逃亡者。卽謂不亡之亡亦可也。

丁高縣

丁公諱良俊，字虞門，山東歷城縣舉人。同治元年閏八月，知高縣事。時石逆達開，踞敕屬之雙龍場，僞宰輔李福猷率衆蔓延溟境之富官村。十月，石逆踞筠連。二十三日，分悍賊二萬餘人，由羅家坳徑犯縣境。公聞警，驟募勇丁，并錫玉林各團，往落潤坎堵禦。二十八日，賊大至，衆潰。公躍馬入賊陣，手刃數人，受重傷，被執。越明日，石逆遣僞先鋒李南率千人，竄據城中。臬司劉公嶽昭馳援，令鄒復勝、王有德分隊擊攻。賊棄城走，官軍追殺數里，斃賊五千餘人。公遂遇害。初，公之被執也，賊久耳公名，稱爲好官，不忍殺。勸降，公不應。日夜懷印端坐，意氣安閒，了無懼色。臨難時，從容自若。差役胡順隨侍，以身翼公曰：「縣主也。」賊以矛加頸，應聲而撲，見者哀之。十一月初二日，賊竄橫江，鄉民始獲公屍，喪其元。又七日，得諸廁中，面色如生，乃送入城合斂。事聞，照同知直隸州陣亡例議卹。又三年，知縣馬公佩玟詳請建祠，胡順亦附祀焉。

余許村曰。知縣雖職司守土。然有城無兵。臨時召募。訓練未精。而欲其如手足之捍頭目。子弟之衛父兄。豈可得乎。善夫明李千戶貝玉之言曰。曹關部以臨危受命。將士俱未識面。臨時召募之兵。皆烏合之衆。技藝未熟。號令未明。心志亦未歸附。且其中奸細頗多。安能成事。觀此則知新募之兵。不足恃也。然欲先事圖維。則餉費又無所出。無惑乎一聞強寇壓境。即藉堵截爲名。棄城而走者之紛紛也。朝廷雖責其不能盡職。而亦當諒其無由自拔之情焉。如公在官祇六十餘日。而冒陣衝鋒。以死勤事。可謂能盡其職者矣。然其志亦可哀也。又聞咸豐七八年間。高邑各鄉桐葉。多生刀劍形。蔓菁亦作尖刀狀。殆殺機之先兆者歟。

### 多將軍

多公隆阿。由黑龍江馬隊。從征皖楚。身經百戰。所向有功。授西安將軍。同治元年。滇匪藍大順。由蜀竄陝。與粵逆通。二年十月初九日。陷盩厔縣。留黨逆分踞洋縣。公於十三日。親至盩厔督攻。藍逆百計守禦。未得迅克。三年二月。官軍開地道。轟破月城。

丈餘、公率副都統穆圖善等、擁登城堞、城內尙築堅卡五道、正力攻間、公頭目受槍子、忍創回營、諸將欲趨視、公傳令曰、此城速克、重傷亦痊、如不克城、卽輕亦不欲活、諸將聞令益奮攻、是夜皆露立堞下、次日環攻至三更、穆都統傳令、三面緊攻、於黑暗中、向東填濠、拔椿梯、繼先入、四路齊進、克復縣城、藍逆率數十人、乘亂竄出、至新口峪、裹脅二三百人、欲竄寧陝、經佛手驛團練殺斃二百餘人、有死黨十餘人、昇之越險狂奔、至漢陰界、爲在籍主事管滂、帶練殺斃、生擒逆黨李登福、王老么、送往漢陰廳、驗明藍大順首級、餘匪均正法、將軍受傷時、內府發珍藥敷治、並命黑龍江將軍、傳其子雙全、馳驛往視、而其子尙居親友家、身無完衣、黑龍江將軍憐賚、資以行裝、始獲馳往、將軍受傷重、旋於三月二十三日、斃於盤屋軍中、其子至、已不及見焉。遺疏有不使家有長物、身有餘財之語、先是將軍於元年秋、銜命入秦、閏八月朔、以親兵七十餘人、解商南圍、初二日至初七日、調四營勁旅、破穎毫零股、擒匪姜臺凌等、五六萬衆、伏屍四十里、疏入、諭旨云、以少勝多、可云奇捷、平日愛士卒、如骨肉、而

威令嚴明、凡所指揮、湯火不避、葬之日、三軍雨泣、天下識與不識、皆痛惜之、

余濟村曰、或問將軍死事在秦、蜀變何以書、余曰、將軍雖死秦、而賊爲蹂蜀之賊、若之何不書耶、藍逆自咸豐九年、與李永和煽亂、全蜀受害、經賂文忠掃平、據生擒之李逆、供稱藍逆已死亂軍中、後竄陝之洋縣、實爲曹逆、但將軍迭次奏報、皆指爲藍逆、無論藍與曹、蜀人均深受其害、至此殲厥渠魁、當亦吾蜀人士、聞而快心者也、亦足見爲亂首者、雖狼奔兔脫、終不能逃法網焉、并誌之、以爲後之謀逆者戒、

蜀癸述略卷三

金堂余鴻觀淵閣編

孝部

死孝死忠。事原一理。國有忠良。家有孝子。世亂親衰。室毀狼豕。以身翼親。隕命而已。更有婦人。事親守禮。竭盡血誠。瀕危冒死。彼何人斯。陟彼岵岵。述孝。

王天鴻

什邑農民王和。性誠篤。妻楊氏。中年無子。虔禱於觀音前。是夜夢白衣人抱嬰兒與之。曰。念汝誠。賜汝孝子。醒而語其妻。妻亦同夢。未幾。姪及產。白衣重包。剖之。男也。命名天鴻。成童時。父貧。又值歲旱。饑殍不繼。廢讀爲牧。親偶病。侍奉眠食俱廢。愈而後喜。年十二。代父操作。父歿。哀毀慙甚。族隣賢之。相與博葬。母性烈。過哀損目。鴻爲人備。以母故。晏出晚歸。人責其曠時。鴻乃少貸業。麵食。與母依。如是三十年。母八旬。鴻年大衍。蓄積百金。將爲宗祀計。母病腦癱。奄息及年。藥罔效。籲天自代。口吮母瘡。旬

日痲結癰瘡、病痿、腸不節、鴻躬濯垢、竭奉甘鮮、自食粗糲、三年蓄金盡、母漸起、乃理舊業、母常患其貧、數却肥甘、鴻故節有餘以安之、有責其不娶者、鴻垂泣曰、貧惟食力、僅可奉養親、何敢言妻室、一孀婦挾厚覓醮、媒告鴻、婦喜、鴻却曰、彼富而我貧、佻作婦、男子且爲奴隸、况衰病替母乎、媒固告以婦賢、母意可、鴻跪母前、泣陳其不可、母不忍強、媒嘆去、母死、殮殮周至、人服其數十年用心如一日、識不識皆呼王孝子而不名、咸豐戊午、旱魃爲災、祈禱罔應、里人設壇迎孝子主其事、辭不獲、沐浴謁壇、從者百餘人、持香跪烈日中、將暮、雨如注、衆勞之、孝子走避、越二年、境內疫、鄉儻首列孝子名、災旋已、庚申、滇賊入境、孝子廬墓未去、賊退、孝子失所在、咸謂孝子死於難、久之、客從青城來者、云見孝子、同黃冠遊丈人峯下、

余濟村曰、刀兵、大劫也。如遊沸湯、烈焰中、無倖脫者、而惟孝子獨免。故入水不濡、入火不熱、豺虎不能食、瘟疫不能侵、非其智力之能出險也、天也。吾聞順治元年、獻賊擾蜀、張文端公父煊、平日事母至孝、聞寇至、偕妻唐氏、奉母避逃

入山同行百數十人，皆身飽虎狼，命戕土寇，獨娘母子三人，屢遭虎狼土寇，若實未見者，數年，達文端。是非天佑孝子乎。若謂孝子者，其存其沒不可知，而其事足以風矣。

### 高孝子

高孝子，崇慶州人，逸其名，有二母。孝子庶出也，其大母虛楊病咳，得肉即減。孝子七八歲，乞父市肉以奉母，父謂一粥飯猶不易，何以市肉。孝子跪叩不已，父允之。及市肉歸，父母呼共食，拈予之，僞作食狀，而藏肉碗底，私祕存之。次夜母咳時，以存肉烹湯進，母憐之不忍啖，乃跪而勸食，母謂家貧不常得肉，得猪膏潤吻差可。孝子私蓄一鴨雛，持入市，易錢三十文，用市猪膏，屠戶少之，不予。孝子哀乞，告以情，且曰：「多少隨割，不敢校也。」屠者異其孝，爲割一斤，又憐其忍饑也，贈以十錢歸。遇雨迷途，返舍夜矣，父母覓兒不獲，正焦急間，徧身淋漓而至，怒之，問其故，轉憐作悲，其幼齡純孝已如此，就傳僅一年，熱感應篇，逢人輒誦，有不善者，則大聲疾呼以戒之，不知嫌怨。

見吸洋煙者尤甚。因是人呼爲高風子。鄉有石貢者。少孝子。十餘歲。孝子謂其前世元也。遂兄事之。有堂弟某。孤而無行。孝子屢戒之。一日謂之曰。弟有雷劫。卽在今日。已乃炷香庭前。命弟跪其後。夫幾黑雲垂空。雷聲作矣。弟始懼。孝子以箔覆之。而稽顙於前。忽轟然大震。硫烟滿庭。人嚇欲死。俄息去。覆弟眩暈。蠢蠢然徧體焦臭。羣蠅附之。弟自是改悔。孝子異蹟甚多。不可殫述。咸豐末年。年四十矣。忽一日。入市大呼曰。爾衆宜急改惡從善。孝順父母。免遭大劫。市人爭罵風子。孝子返舍而悲切曰。人不悔禍。大劫不可免。奈何。乃焚香跪誦感應篇。冀救其一二。卽日移母妻他境。屬弟善事之。向母再拜辭曰。大劫臨頭。兒亦不免。未幾滇逆至。孝子杳然無蹤。或傳孝子已殉難。或又以爲仙去云。

牛省齋曰。此傳皆丁卯之冬。社庭計君自崇陽寄予。而予稍節之者也。社庭著作甚富。或詩或文。無非有關風化之事。此次客崇僅兩月。而所得如此。於以見善人之多。抑又嘆世之淹沒者殆不少也。



高誠古先生

高先生名雲松、崇慶州庠生、家貧力學、品詣端方、爲士林宗仰、教授鄉里、講踐履之學、居常必正衣冠、事親以色養、居喪哀設踰節、前後廬墓凡六年、州人士舉孝廉方正不應、後設教於州西天竺寺、咸豐十年、滇賊至、衆奔走、先生端坐學案、惟一子侍、揮之去、賊脅財、先生曰、朝廷何負爾等而反耶、吾安所得財、任爾肆所爲可也、賊或欲殺之、有識者曰、此孝子不可殺、賊初欲焚寺、繼又欲駐營、先生輒加呵斥、賊又欲殺之、其酋曰、此人孝子、又欲爲忠臣耳、殺之適成其名、先生兀坐、不寢亦不食、賊奉酒肉勸之食、先生唾之、賊黨相謂曰、我輩起事以來、未見如此鐵漢也、迨賊去而先生餓斃矣、衣冠端坐不踣、大吏以狀聞、廕一子恩騎尉、州牧石君會昌表其墓門曰、忠孝完人、所著有真孝錄二卷、門人梓行、

鄒武庠

鄒君諱廷超、金堂武生、性豪爽、平日篤於孝友、咸豐庚申、滇匪犯境、君負母走、母不

肯行。君亦不忍去。賊至。脫母縛。不從。脅以兵。君急抱母。背受其刃。遂遇害。始康處士曾師孔。輒以詩云。母聞寇至不肯走。兒從母命願相守。賊脫管環母不從。手舉長槍幾貫肘。佳兒亟赴抱娘身。自請甘心代吾母。矛戟交加血濺衣。可憐命喪賊人手。當時寇退母猶生。遂述真情告左右。今日母雖赴九泉。咸稱孝子堪傳後。臨危往往欲偷生。幾見亡身全孝友。武士何嘗讀史書。也知節義不容苟。至性猶留天壤間。誰言古道今無有。自今遙望馬平鄉。一點靈光長不朽。

### 嚴趙二孝子

嚴君恆順。大邑北二甲嚴坎人。年五十三。咸豐十年六月二十日。藍逆逼近悅來場。恆順奉八十二歲母趙氏。避於山中。賊搜及。以矛刺其母。恆順急以身翼之。呼號痛罵。賊憤碎其身。母子同時併命。同縣趙學君。濼灘子人。年五十二。六月二十日賊猝至。學君守七旬餘。父永年。不忍去。父子同時被殺。并焚其家。

余濟村曰。時有傳廷燦者。大邑西鄉人。家貧。父亡。母殷氏。兄弟析爨。燦任兄取之。

毫不與較、獨奉其母、數年如一日、後母疾久不愈、燦侍湯藥無怠、咸豐庚申、藍逆竄境、人皆逃避、母促燦行、燦泣不肯去、賊至、執之、燦願以死代、母老懇勿驚、賊曰、此孝子也、釋之、與以衣物、燦不受、賊大義之、戒其類、令四維二里許、勿焚燒民舍、恐驚孝子、所謂盜亦有道也、

### 陳武庠

陳履謙、大邑縣武生、其父卓然、大邑縣文生、咸豐庚申、滇逆竄境、卓然帶練禦賊、被賊履謙以父故、弗之去也、亦死之、一時同罹賊害者、宏興續興其孫也、黃登高等七人、其募丁也、舉人宴春霖具呈於當道、奏聞、卹雲騎尉世職、

### 附錄趙侯禦賊靈異一則

大邑縣東有漢趙順平侯祠、累著靈異、咸豐十一年、有自賊中逃歸者云、賊聞侯墓、覬覦有古刀劍、至則見銀屏一帶、遍插白旗、馬蹶不前、疑有伏、遂竄去、城賴以安、嗣何逆薄城、勢危急、適楚兵駐重慶、軍士晨起汲水、見一白衣人隔江遙呼救、

援楚兵遂整隊西行直抵縣東見沿山白幟以爲圍也卽繞城而西出賊不意敗之於鳳皇山賊遁旋知係之靈異所致醮金置祀田而去洪崖廣大令譔一廟聯云洗馬池近丞相祠堂荷主知在三顧之先論當日和吳伐魏忠諫猶有同心月旦允宜崇俎豆靜惠山爲將軍幕府留毅魄歷千秋不朽爲是邦黎災捍患英靈屢褫賊膽風雲咸見擁旌旗蓋紀實也

### 陳明新

陳君明新隆昌監生以達孫也少孤依祖年十五聰慧過人咸豐庚申夏滇匪猖獗其祖諭之曰吾老矣何懼賊汝年幼速入城避之新旣行矣途中念祖父在家恐遇害急歸視祖猝遇賊被縛不屈賊異其年幼不凡強之從行逼至再三終不屈竟被殺祖哀之亦疾亡

### 王德瑞

王君德瑞隆昌歲貢道亨子咸豐庚申滇匪入境道亨被執瑞見之急趨父難願以

身代乃自入賊營說賊弗許遂大罵賊賊重其孝不忍加害再三勸慰不屈仍大罵賊怒殺之臨死猶罵不絕口時年二十七

### 王崇高

大邑王崇高王曰明之子年十八性誠篤而多智慧咸豐十年六月藍逆率黨犯縣境崇高奉母米氏及幼弟崇業避縣北馬鞍山二十一日藍逆遣其黨搜山焚掠母子弟兄同陷賊圍崇高再三說賊請舍其母弟願以己身效力行間賊感其誠遂釋其母弟崇高計母弟偕行已遠乃變其前說誓不俱行賊初之罵益厲遂被戕同時有被脅逃出者言其事甚詳

### 李化全

李化全隆昌縣人其父某爲城上守礮夫庚申七月李逆另股張五麻子竄境城內將出師擊之時陰雨泥濘化全恐父不能勝任願以身代往勦賊於蔡家鋪賊衆猖獗諸勇潰散化全負礮而殿賊殺之

仁壽孝子

彭君榮謙仁壽何家場人年十六嫡母氏杜病危刲股療之愈咸豐庚申七月二十  
二日賊目何逆大隊突至榮謙鳴團未集手執旂鼓被賊圍攢刺十餘傷死後有人  
自賊中來云賊殺榮謙見門首一匾有孝動天地四字悔曰誤殺好人遂釋其母  
何君邦華仁壽人躬耕養親咸豐庚申八月十四日滇匪犯境衆皆逃邦華以父母  
衰老動履維艱不忍違棄被賊執脅之不從殺之臨死猶涕泣大呼父母云  
同里黃君戴喜當咸豐庚申冬滇匪復至時脅執其父萬壽行不從將殺之戴喜奮  
不顧身與賊格殺於八兒岩父乘間逸去後賊至漸衆戴喜走不及竟遇害

汪學祖

汪君學祖中江祖佛溝人距胖鎮十里許幼習儒讀論語至無求生以害仁有殺身  
以成仁乃慨然曰丈夫不當如是耶事親以孝聞因母病倩醫診脈投藥罔效祖按  
青囊試一劑輒愈由是服儒習醫咸稱國手咸豐十年張逆犯胖鎮汪被俘營中重

醫待以殊禮、欲死無間、賊駐鎮五日、起營至蓬邑河邊場、昶夜宿文昌廟、謁帝君、畢、佯作洩溺狀、至廟側、豚竝投環卒、賊義之、盛以漆棺、厝於廟後、囑廟僧大書汪某之墓、欲令汪族屬得識死所也、十一年春、汪兄弟風聞、使人往覘、屬實、貧不能改葬、外舅唐君福田、出貲舁柩歸、啓視之、賊殮以錦褥、面如生、爲之改葬如禮、福田誄以文云、勇士不忘喪元、匹夫未可奪志、留天地之正氣、雖死猶生、同日月以長明、其光迭曜、嗚、嗚、壯哉、

杜歲貢 江有超附

杜君諱文炳、字奎元、永川縣歲貢、孝友嗜學、見古人忠烈事、恆感慨歎、不能自己、咸豐庚申冬、張逆犯永、君督衆登陴、晝夜邏守、形神俱憊、城陷、巷戰受傷、裹創歸、跪辭父母、兼囑其家人毋爲賊玷、貽門第羞、言畢、從容自縊、年四十九歲、同時死者、母陳氏、妻李氏、長女謝杜氏、叔國欵、妻丁氏、弟文熙、文觀、妻二陳氏、熙女瓊英、皆服毒自盡、胞叔國華、胞弟文觀、堂姪元佐、皆罵賊遇害、父國翰、年七十二、亦不食死、一門

死節，共十有二人。子元杰，因事外出，數孫俱幼，得免於難。事上於朝，郵雲騎尉。世職，附祀昭忠祠。次孫象謙，列邑庠。同時有江有超者，賊至其家，將擄超，告以祖母老，未可遠離，賊必為超往，殺其祖母，超怒，與賊鬪，遂為所害。

### 劉順字

劉生順字，太和鎮人，粗識字，業醫。母歿家貧，因失愛於父，分爨異居。咸豐初，黃壽臣制軍督蜀，札令州縣士民一體宣講，劉生聽之心動，哀請於父，仍得侍同居，益力為善。周貧恤孤，不能縷述。好談忠孝節義事，每夕至闌，聞人集處，娓娓而談，聽者興起。暇則習拳勇擊刺。辛酉二月初，藍逆將上犯，胡公文魁在太和鎮，謂之曰：此城難守，汝曷奉父隨我去，商諸父，不可。覆胡曰：父留兒去，何以為人，遂不去。城陷死之。

余澣村曰：宋史太祖開寶元年，詔荆蜀民，祖父母在者，子孫不得別財異居。二年八月，詔川陝諸州，察民有父母在而別籍異財者，論死。太宗淳化元年九月，禁川陝民，父母在，為贅婿，可見蜀俗薄於情理。父母存而別財異居者，自昔已然。今川



中諸郡。其家稍裕者。早分金諸子。其父母分食諸子。按月計日。不得踰期。謂之輪供。死後殯葬之資。公出。有貧不能償者。至爭訟不已。俗之敝壞。不忍言矣。無惑乎劫運之頻仍也。若劉生者。不過粗能識字。因失愛異居。出於一時迷誤。既而聽講心動。哀請同居。其悔過遷善之心。甚於讀四子五經者矣。聞劉生之風。亦可以少愧乎。

駱張二孝子

駱君秉彩、仁壽人。生性孝友。咸豐辛酉三月二十六日。滇賊入境。招之去。秉彩曰。吾有父母。賊利其年幼。固強之。躍入水田中。罵不絕口。賊怒殺之。同時有張君克金者。素有孝行。聞賊至。負母逃。途遇賊。釋母坐崖下。恐賊驚母。指引他往。賊詰之。語不遜。乃與鬪。罵賊逐殺之。無完膚死。

黔江四秀才

黔江縣正陽貢生、劉君肇祿、其子際春、入邑庠。品學端粹。咸豐十一年。髮賊竄黔。執

肇祿際春見父被執請以身代弗許際春乘間抱賊令父脫逃父去賊怒殺際春以洩忿

三屯朱秀才廷珍性孝友咸豐十一年髮匪之變奉母伏近莊賊肆搜掠圍其莊母知不免率諸婦女焚室自燼廷珍欲救其母不能入遂投塘自溺死

殷秀才時中亦三屯人咸豐辛酉之亂奉老母避賊於大石峽賊搜得之將殺其母時中求以身代賊遂殺之而免其母

柵山秀才舒勝豐蓋文而武者也咸豐十一年髮逆過境勝豐隨其父逃避不及遂與賊遇勝豐恐父被擄因持矛拒鬪賊殺之其父逃免

余澣村曰此四秀才者事均聞於朝恩廕世職同時有尙家興國學奉母避賊羊頭山賊至母投巖死家興救獲不及憤甚率家衆與鬪皆死於賊男女共十一人惜未蒙恩廕然一門死難何其烈哉亦可以不朽矣

何冬兒

何冬兒、三臺東路人、年逾冠、以孝聞、辛酉春、藍逆入潼郡、父元祥被掠、冬聞父陷賊、痛不欲生、附近有關刀砦、扶母蕭氏、與女弟及妻、登砦以避、賊至索糧、衆畏、與粟數石、旋索軍械重寶、冬謂衆曰、賊貪婪無厭、難飽谿壑、不如擊之、砦長叱曰、賊鋒甚銳、誰能禦之、是時各懷潰意、無鬪志、冬復言曰、多聚矢石、循環固守、砦雖小、未必遽破、我願子身下砦、以理論賊退、聽我言、砦衆安、不聽、惟一死耳、衆聽之、泣告母曰、兒父陷於賊、未知存亡、母老矣、適逼處此、舉砦無扞禦策、有坐斃而已、兒欲掉三寸舌、以說賊、兼探兒父消息、母曰、去、勉之、母挑賊怒、冬應命、行抵賊營、說其酋不聽、驅之去、令速納食貨犒師、復以刀背擊冬肩、冬怒、奪刀殺賊、賊刃交下、遂遇害、旋攻砦、衆怯而奔、蕭氏與一女一媳、以絮裹身、從砦牆墜下、疾走、賊入砦、裹脅其衆、詢及前日遊說者、衆云、何冬兒也、因備述其顯末、賊義之、以土覆其屍、蕭與女媳、夜行迷路、自念平日嘗持奉觀音經咒、甫默誦間、忽見一縷白光前導、徹夜行百里、達梓潼界、寓妹倩伍貢生家、未幾由安縣還里、元祥自入賊營、憂思百結、暗禱於紳、如脫虎口、願持

誦三聖真經、身隸百長、隆昌梁某帳下、梁每見祥頂上隱約有光、異之、私約潛遁、祥歸、聞冬兒死難、大慟、爲之市棺改葬焉。

許寅谷曰、何冬兒一農家子耳、能挺身入賊營、欲說賊解圍、以蘇若人困、事雖不濟、而英風勁氣、直過人遠矣。

李尙陞

李君尙陞、彭縣鹿坪里人、咸豐十一年四月初五日、滇匪李永和、分股竄縣境、入山擄脅、尙陞獨奉母逃逸、賊追之、遂負母奔山麓、迎面一賊、持刀攔阻、尙陞赤手與鬪、後賊追至、遂爲所殺。

謝文學

謝君諱際豐、定遠縣廩生、純樸寡言笑、志操剛毅、見義必爲、家貧舌耕養母、以孝聞、與弟析產後、弟業不久凋零、復令合爨、咸豐十一年五月初四日、滇匪犯邑南之高灘河、君率闔堵禦、礮擊賊退、初六日賊入華家坪、君復禦之、親點大礮、斃賊十餘人、

賊率大隊竄清平鎮、團勇堵截潰、君猶手火繩立礮側、將欲斃餘賊於巷、賊抄殺之、力窮被執、大罵不屈死。事聞、入祀昭忠祠、同時團民約十餘人、俱守義不屈死。余澹村曰、海鹽錢鐵江先生、余丙子薦卷房師也。卒定遠時、招余往治足疾、因得悉采其地之殉難者、著之於篇焉。

### 陳貞順

陳貞順、樂至大佛場人、年逾弱冠、性孝、辛酉、張逆肆掠、順被擄、行一舍紮營、順念父母年老、思歸彌切、夜伺人寢出逃、被賊哨拉歸營、鞭背懲之、次夜復逸、後營依山危岩、順越岩擲地有聲、賊驚覺、縛之、黎明、張逆令鞭之遊營、使自呼逃營有罪示衆、順知不免、大呼曰、衆人莫效陳貞順、思歸省視父母、凡孝雙親者應死、張五麻子無父母生養、故不肯容人盡孝也、賊聞切齒、命速殺之。

余澹村曰、孝子不免於死、人多疑之、吾謂子之死孝、臣之死忠、其義一也、衛伋與壽、盜殺諸莘、豈天道無知歟、此其中亦似有數焉、然上爲日星、下爲河嶽、於人爲

忠孝其光日月。其氣河嶽也。以貞順之自呼。嘗賊身雖遇害。而賊氣潛奪。命速殺之。蓋恐動人同有之天良也。

### 李永壽

李君永壽。會理州人。幼業儒。咸豐十一年辛酉。滇匪陷州城。七月二十三日。城內降賊者復叛。其父長聰。叱令速逃。永壽守父號泣。賊至北街。父子同時隕命。

### 黃國學

國學黃君金煒。高縣可久場人。咸豐十一年。蠻匪擾境。其父被賊逐無蹤。或傳被擄。蠻營金煒聞之。痛不欲生。挺至蠻營尋救。被蠻捆殺。妻姜氏。偕其母并幼女逃。亦被擄。恐受污。母女齊赴水死。

余濟村曰。高邑自咸豐九年。李逆犯境。迄後蠻匪髮逆。迭次竄擾縣屬。紳士團練。捐軀殉難者。約有百餘人之衆。嗚呼。何其盛歟。

### 曾朝寬

曾朝寬、新都人、性剛直、咸豐辛酉流勇作亂、朝寬因母年高、不能遠避、遂母子相守、被賊虜去、次夜逃出、心甚惶懼、不能覓路、復爲巡夜賊所執、天明、用竹鞭杖兩手、身後數賊、鞭驅於市、令大呼於衆曰、爾輩毋效我逃營、罪至於此、匝一日、殺之於市、賊退覓屍、徧體皆傷痕云。

### 隆昌孝子

鍾君成棟、隆昌北鄉團總光廷子、咸豐辛酉九月、賊犯境、成棟隨父出勦、光廷見賊勢甚盛、命棟走避、棟曰、父在、子何敢去、遂挺身出戰、殺斃多賊、戰久力怯、爲賊所殺、張君樹華、隆昌監生、崇德子、德爲響石山團首、咸豐辛酉、德率樹華擊賊於檬子壩、德連殺老賊二人、戰馬失足、躓而顛、爲賊所殺、樹華率衆急奔父難、出入重圍、斃賊多名、力竭亦被殺。

余濟村曰、同時有段貴瀛者、因其父連城太學、爲賊所執、脅降不屈、罵賊而亡、貴瀛奔救莫及、身受鱗傷、頸後被斫寸許、頭覆撲地、賊意其死、棄去、有戚某過其旁。

聞呻吟聲。視之，爲之反頭合頸。鼻齟醫治，得不死。此又孝子而得天佑者也。

劉開駟

劉君開駟，中邑廣福場人，世居三穀灣，年四十許，寡色笑，性慈直，咸豐辛酉十二月朔，滇匪謝花妖爲大兵追敗，走廣福，駟飭舉家老少登堡避賊鋒，獨與病妻在家，是日爲駟家臘祭祀祖會，乃殺牲炮羔，以俟族屬，或曰：今賊氛密邇，奈何行此迂闊事？駟曰：烽煙在望，吾豈不知，第此禮不可廢，賊不來，吾達孝思於淵泉，賊來，吾從先祖於地下，敢貪生畏死，而忘尊祖敬宗之典哉？卓午，伯叔昆季無一至者，駟乃整冠登堂，拜獻畢，突有賊數十人操戈入，熟薦品物，飽噉一空，將入室搜括財貨，駟監門不允，賊說駟曰：君好身手，可隨吾建功大營，駟曰：汝等覩然丈夫，從一妖婦反，眞陰陽顛倒也，及早散歸鄉里，或可免誅戮之禍，賊怒，將縛之，駟持長矛刺賊，衆寡不敵，爲賊害，駟妻伏牀昏哭，罵欲與夫俱死，病不能興，賊若罔聞，籠雙鵝而去。

張映芬



張君映芬、興文縣人。甲長仁秀子。素以孝聞於鄉。同治元年春，張逆入建武。至知仁秀爲是鄉甲長，遠出防堵要隘。執映芬脅之曰：父來則免。映芬曰：吾父槁梓，視汝等如困獸，然行將食肉寢皮矣。賊怒，殺之，并火其室。

余澣村曰：同時有袁大必者，賊至，大必遣妻去，自負老母逃。賊將追至，母諭兒速去，勿以我爲念也。大必卒不忍去，被賊擒，跪請於賊，泣曰：可殺我，勿傷賊感動，兩釋之。妻亦免於難。一誠可貫金石，而况賊亦血氣心知之侶乎。

### 李興言

李君諱東華，字興言，會理州人。少有膽略，性至孝。十二歲時，父有仇家圍殺，垂挺刃衝圍入，救父出，已受重傷，右臂遂折，不能書，以左手代之。入雲南會澤縣，豐庚申之亂，結鄉團，劄寨以自衛。賊屢攻不克。同治元年，髮逆中旂犯州疆，君連營於隘口，賊百計攻之不能破，乃佯退設伏。君望賊遠颺，單騎出口探之，伏執，誘以僞爵，令招其衆。君厲聲大罵，賊知志不可奪，殺之。復攻其壘，仍不能下。

河由青基魯竄去

李瑞林

李瑞林、華陽縣人、甲長如桂之子、同治壬戌元年三月三十日、李逆餘黨竄擾西河場、瑞林隨父協同保正、督率團勇、與賊交戰、如桂爭先突陣、被賊圍殺、瑞林赴救、同時陣亡、

李女

李女、隸為清水溪人、年十六、母早逝、父在堂、咸豐庚申春、滇賊犯清水、執其父將殺之、女曰、妾雖窶陋、願相從贖父命、不然同死無益也、賊釋其父、曳女行、女潛服毒藥、行數里、毒發、罵不絕口而斃、

袁童氏

峨眉童氏、處士袁明龍妻、世居北村、咸豐庚申、藍逆之亂、村民半避山險、明龍以母老不能行、與氏共守、一日有人來告曰、賊至矣、盍避諸、氏曰、有母在、安忍離、賊至、擄

其夫去，并執童氏，欲污之。氏跳入廁中，賊又出之。氏急奔門外，投符文江以死。賊感動，釋明龍歸。

### 趙鎮二孝婦

金堂趙家渡船戶張國順妻龔氏，年二十，有殊色。咸豐庚申，藍逆突至，氏隨姑逃入米家河心。賊羨其美，追欲得之。氏即奔舟，賊尾其後。氏知不免，泣跪姑前曰：「不孝媳從此逝矣。」語畢，投水死。

同時有劉氏者，朱桂元妻也。藍逆竄趙鎮時，夫爲賊擄，其姑聞賊至，不知所之，號泣不已。氏含淚扶姑避賊，猝遇賊，欲污之。氏負一歲子、三歲女，奔江邊，泣對姑曰：「此清白江也，兒亦可借此明志矣。」遂攜子女躍入江中。

余澣村曰：大亂之世，婦女受污以死自誓者固多，迫脅而從者亦復不少。豈盡甘心於賊哉？無論爲賊匪、爲官軍，恣淫者必獲慘報，戒淫者必獲福報。聞鄉老何石帆云：趙鎮有楊貞琳者，慈信勤學，藍逆犯鎮，楊被擄，喜其醇雅，置帷幄中，與阮姓

賊共事。圍攻遂寧時。楊與阮同居一大宅。園中花木叢雜。玩好羅列。楊嗟賞不已。突有數賊至前曰。來看來看。廚下兔子甚夥。賊中呼女子為兔子楊至廚。見滿屋皆婦女。長者二十許人。少者十七八歲。有坐如癡者。有伏而啼者。然皆鬢綠垂雲。肌紅奪玉。左右垂涎者。魂飛魄蕩。楊心惻然。言於阮曰。彼皆良家婦女。強污之不祥。阮從其請。懸令門首。禁男子出入。於是無一敢犯者。來住宅中之賊。擁窺門外。阮苦之。派人護送衆女遠出。諭令各逃親族家。越數日。楊與阮暮遊郊外。見數椽茅屋中。有女如雲。逼視之。即前所送者也。詰之。僉曰。蒙恩派人送我等遠走。第縱橫數十里。大營層層包裹。安能免脫。楊復令從者送還故宅。時官軍攻甚急。賊棄營走。楊適病不能行。其僮迫之曰。水緊甚。奈何。賊中言官軍攻急曰水緊楊扶僮走抵大河。追兵後至。爭渡者船不能容。楊以病不能捨舟。僮遂棄楊於蘆中而遁。俄官軍至。未濟者悉被斬殺。枕屍沙洲。而楊獲免。越宿。賊以數百人渡河收屍。僮復至曰。蘆中人尙在耶。始扶歸賊營。後病愈。乘間逃歸。家人疑其已死。相見如夢。嘗自謂向非有禁淫善念。

安見不同登沙洲之鬼錄乎。今聞其人。已橐筆從某大令。入蓮花幕矣。

### 永川孝婦

永川羅開伸妻張氏。年二十八。夫故。撫子事親。孝慈兼盡。咸豐庚申之變。氏避難他徙。中途遇賊。懼辱。赴水死。

曾祥濱妻陳氏。世居永川城內。庚申城陷。被擄。給賊以辭。姑始行許之。氏入室與姑訣別。以頭觸柱。腦裂而死。

李振川妻黃氏。庚申永城陷。被俘。氏給賊曰。能保我姑與子。願從汝。但城中非姑與子久居之所。請送入鄉村。賊應之。姑子既送入鄉村。即服毒死。

趙廣城妻羅氏。事姑以孝聞。賊犯永川。執其姑。欲殺之。氏負幼子。跪地乞免。賊不爲動。並殺之。

余澹村曰。同時有貞烈女子張寅秀者。幼字劉國泰。庚申永城陷。仰藥死。賊至敬其貞烈。豎一旗於門。同居婦女數十人皆獲免。何與趙羅氏所遇之賊。大相逕庭。

耶。

### 仁壽孝婦

袁李氏、仁壽袁登華妻、年四十四、咸豐十年三月二十一日、滇匪犯境、舉家逃、姑病篤臥床、氏獨侍姑不去、賊入掠財物及姑所、氏力拒、賊怒、劈頭一刀、氏猶挺然相抗、賊力擊之、遍體受傷死、身負一幼子、刀傷額及手腕見骨、

董氏、壬淑元妻、仁壽人、姑氏奉、年八十餘、盲、氏朝夕竭誠侍奉、咸豐十年七月二十一日、滇匪擾安鄉、及涼水井、鄉民皆舉家逃避、淑元率其子姪、聯圍堵截在外、氏獨守衰姑居廬、賊人索銀不得、三焚其廬、火卒不燎、賊以刃試姑項、氏冒刃衛之、被賊斫傷、踰十二日卒、

### 灌縣孝女

田秀英者、灌人田金玉女也、母楊氏、女年及笄、事母孝、咸豐庚申、藍逆犯境、母女不及避、賊斃其色、欲強虜以去、秀英大罵不屈、賊以刀擊母、意嚇女、秀英乃奮力奪刀

刺賊、賊怒殺之、

張女雙秀、年十八、次喜秀、年十六、灌人張正元女也、平時二女事祖母孝、咸豐庚申、藍逆擾灌時、祖母攜二女逃避黑石江邊深箬中、賊窺見逼之、女泣曰、賊至矣、可奈何、祖母老、諒無害、姊妹必爲所辱、不可不共保此清白體、賊至欲執之、二女挽手連襟、投江而沒、

灌縣楊映藻女文蓮、年二十、未適人、事親以孝聞、咸豐庚申、藍逆犯灌境、父爲賊所擄、被殺、母聞亦自縊、文蓮泣不止、恐賊至受污、乃用石卵縫衣襟內、墜井而死、

灌民吳天友妻吳氏、常賊竄境時、氏荷戈衛翁遠避、賊遮於途、氏厲聲大罵、以戈擊賊、賊怒被殺、

譚趙氏

南溪譚趙氏、縣民譚德信妻、性賢明、言笑不苟、事孀姑以孝聞於閭里、咸豐十年十二月十五日、滇匪張五麻子犯境、擄其姑行、氏泣隨之、罵不絕口、賊擊以刀、身受重

傷投水死。

余澣村曰。吾聞南溪歲貢陳君春田。讀書講求實學。以孝友著於鄉。咸豐十一年。滇匪入境。春田兄春山被擄。春田痛哭於賊。願以己身求代。賊義而兩釋之。兄弟均無恙。縣大夫唐公炯。書代瘦推肥四字額旌之。此篤於友愛而不避鋒鏑者也。求之今日。吾見亦罕。

楊劉氏

烈婦姓劉氏。射洪文童楊玉泉妻也。性敏慧。祖姑陳病瘥。姑黃昏。劉事姑孝。番禺何公玉成。宰射洪時。出示宣講。聖諭。氏牽姑往聽。凡忠孝節義事。歸爲祖姑述言之。娓娓不遺一字。率以爲常。一日聽文生謝載朝講韓玫英遇賊投廁事。人弔以詩。有立志竟成千古潔。無瑕贏得一身香之句。歸謂姑曰。世亂至此。如遇賊。非學韓不可免也。姑笑曰。何至於此。咸豐辛酉二月二十一日。賊入射洪。舉室皆逃。姑令氏走。氏曰。媳婦走。婆餓死矣。須臾賊入扣門。氏度不免。投大澗中。先已投十餘人。皆不得死。



乃分開衆婦、鑽入池底死、餘婦皆爲賊出之、

胡炳奎曰、士女之貞烈、雖曰性生、夫豈不關教化哉、當咸豐初、宣講勸善之士、如蒙童受學、遠近同風、迄後以質亂真、邪教混入、兼有無識之輩、不善奉行、大吏心惡、既從而禁之、因噎廢食、甚可惜也、若楊劉氏者、豈盡性生耶、余嘗謂談吏治者、舍教化而恃才能、吾未見長治久安也、

### 黃大姑

中江黃氏有二姑、燕、諸生黃家儒之兄之子、及己之子也、大姑名長英、年十九、嫁馬友爲妻、二姑名二英、七歲、咸豐辛酉、滇匪抄掠邑東、迴水鋪、大姑猝不及避、扶母奔後山、賊追及、欲污辱、大姑誓不從、受傷而踣、賊去乃蘇、五日竟殞、賊之去也、涉河攻柏妙山寨、寨人驚潰、時象儒奉父居焉、賊轟入其家、咸不爲屈、賊將畢刃老幼、二姑抱其祖泣曰、我爺年老、如是呼者數四、聲愈慘切、賊憐其幼而孝也、遂相戒勿事淫戮、隣婦賴以不辱者、二十七人、

易銀蓮

易女小字銀蓮，中江縣易正祿之女，將嫁而壻死，意欲殉而中止。咸豐辛酉，隨繼母王氏避亂，巧值賊鋒，母女俱被虜。女給賊曰：家有幼穉，若釋母回家撫養，我當感悅從行。賊以爲誠，如其言釋母歸。甫行里許，女卽投水死。賊共嗟訝之。

余澹村者，凱江志載嘉慶庚申之亂，中江劉二姑隨兄被難，至清涼寺，均被賊擄。賊見其美，以一騎馱之。二姑無懼色，緩轡徐行。顧謂兄曰：前龍洞橋，妹死所也。兄當視情緩急遁去。口操粵音，賊愕貽不解。至橋，二姑果立馬躍橋下。賊怒見給擄刃水中。二姑已入深淵死。其兄亦趁是時得脫。及至咸豐庚申，六十年來，銀蓮給賊脫母之計，其時同，其地同，其事又同，能使鬼域墮其術中而不爲所辱，均可謂智而烈矣。

李戊英

李戊英，遂甯人，年十六，承母訓，略解字義。其時宣講之會盛行，女每偕母往聽，至聞

賴女投江事、心感觸、堅以節烈自持、咸豐辛酉、藍逆擾遂昌、女隨母避舟中、兩岸賊  
 如林、沙語喧闐、指江心一葉曰、彼可取也、遂免水薄、女舟、女恐污己、躍身波中、賊隨  
 拽起、女罵曰、狼子救我何爲、賊見女色麗、愛之、不忍加害、佯以刃加頸、女憤誓曰、殺  
 卽殺耳、我頸豈汝礪刃石耶、賊笑曰、女郎何事性烈、不我從、必先殺爾母、女泣曰、誰  
 無父母、忍加殘害、遂悲啼不止、賊曰、我姑試汝、汝眞孝女、可借汝母登岸、避沙嘴叢  
 篁中、可免、蓋給之也、女信其言、扶母舍舟、望叢篁行數百步、賊尾其後、若將野合於  
 篁中、女回顧知其意、乃掩泣向母云、母老矣、千萬珍重、母以兒爲念、兒今不死、難免  
 強暴之辱、乃撲焦石壩井中而沒、賊感動、釋母以歸、始縷述其事於族人如此、藍逆  
 自臘月圍遂、至次年二月解嚴、壩中死屍鱗集、羣犬爭食其肉、至附女屍者不敢近、  
 若有呵護者焉、賊去、里人昇屍改葬、貌如生、紳耆爲之請旌於朝云、

吳氏婦

咸豐辛酉、藍逆大股、竄樂邑分水嶺、入吳氏宅、男丁遠颺、家惟一姑一媳、纖弱不能

疾走，均被賊據。婦年二十許，色妍絕。姑媳二人，合手環抱不解。賊析之，牢不可開。尋以刃傷姑右手，婦號泣，仍抱合如故。賊曰：爾不畏死耶？倘隨吾去，尚有生理。不然，污吾刃也。婦罵曰：我素守清貞，與其失貞而生，何若完貞而死。賊怒殺之。姑以年邁免，每向人說亡媳事，未嘗不聲淚俱下也。邑茂才某弔以詩云：金石堅難破，冰霜潔轉清。姑傷姑尚在，婦死死猶生。大有鬚眉氣，終無窈窕情。珠沉千載後，闔閭擅芳名。

李瓊英 雷李二女附

李女瓊英，定遠縣廩生李成錦之女。幼許字貢生張瑄之子。咸豐十一年十月，郭逆竄樂善場。女年十六，侍母避居圓山砦。十五日，賊用火攻砦破之。瓊英隨老母墜牆下，母足折，瓊英守母不去。賊牽之行，女罵賊，撲一屨坎火坑死。又雷女瑞英，年十五，李女春兒，年十七，砦破權辱，俱與母胡氏 二女母家均姓胡 赴火死。

余澂曰：圓山砦中，婦女避居者衆，其破也，賊皆以長布逼交諸婦女，令從砦牆攀縋而下。且曰：不殺汝，與汝米物，各歸其室。婦女忿罵不從，悉赴水火，或以瓦石

擊賊面。或抱子投池中。蓋賊酷事焚殺。惟不殺婦女者。欲大肆淫污也。而婦女等皆青年。懼辱。舍命完節。何其烈哉。

### 樊氏

樊氏曾淵金妻。同治元年四月初三日。潰勇擾杜主廟。氏家隔數里。聞之。趨夫赴姑。遠避。氏艱行。恐賊竄入被污。遂自縊死。其姑賴以保全。

### 劉廖氏

劉廖氏高縣劉志勳妻。咸豐十年春二月。志勳在玉皇場堵蠻匪。身沒。氏事孀姑。廖以孝聞。同治元年十月。石逆入境。時氏年六十八。姑年已九十二。病不能行。賊至。脅以刃。氏衛姑同被害。一門孝義。鄉里榮之。

### 張郭氏

郭氏三臺蘆溪張炳坤妻。張故宦家子。忠孝節義。嗜若饑渴。父病。割股以進。病得起。性好利濟。氏讀書識字。事姑孝。伉儷稱同心。同治癸亥。粵匪石達開。由貴州入滇。窺

蜀、賴逆爲前驅、三月初十日、蕩竄至溪場、死者凡數十百人、氏有姑年七十八、掖之啓後、關登山避、甫行數十武、悍賊全壘、索姑金不得、刃其顛、喝云將此婦去、婦衛姑厲罵、賊殺之、次日大軍至、賊走、氏夫炳坤尋母、見妻抱母臥嶺上、急救之、妻斷吭死、母血流被面、氣綿綿不絕如線、鼻歸得更甦、母曰、媳爲我死、何忍遽離、以已棺殮殯、月餘始葬、邑人上其事於當道、得邀旌典焉。

# 蜀變述略卷四

金堂余鴻觀淵閣編輯

## 義部

普天之下。莫非王土。士兼四民。原無官守。本智而文。忽勇而武。保衛桑梓。身殉狼虎。亦有鄉紳。浩然正氣。率衆鬪原。肝腦塗地。見義勇爲。各有可取。方外九流。拚死禦侮。一例采收。豈曰小補。述義。

## 鄧文學

鄧公宗楷、字樹森、宜賓縣人、世居柏樹溪場、父應福、勤求學問、母氏楊、慈而賢、每課小學、循循不倦、公天姿穎慧、未七歲而通五經章句、弱冠受知於督學支公、補府學博士弟子員、嘗大書忠臣孝子四言於座右曰、吾將以是成吾學也、咸豐九年九月十九日、滇匪李永和竄縣境、水陸並湊、將犯柏樹溪場、公率練勇爲堵禦計、舟賊登、公奔之、殺賊數人、賊驚止、練勇乘而噪之、賊氣餒、逡巡就江岸屯焉、練勇猶逼其前、

而謀者報陸賊已入場，公遽反，挾  
華宮，乃單騎持劍入宮，宮故有文曰  
盧民慢神，乃公將礮若爲二神謝，公  
震，賊重傷之，出屍街中，猶喋血函  
十餘，聞公死，忻然曰：是其平日所  
年二月，給事中趙公樹吉奏請議  
祀成都昭忠祠。

吳伯傑曰：君有子銘恩，繼志讚  
振家聲。此千百世不衰之門祚  
言。小學於此初基，大學於此得

潘吏員

吏員潘君志華，大邑永興場人，感



出師戰於捷爲之箭板場父子同時陣亡。

文江兩武庠 宿璋附

武生文君安邦、江君騰光、洪雅人。咸豐庚申三月、藍逆竄洪境寶子寺、破其砦、未破之前、安邦、騰光率團勇禦賊、見賊仰攻山砦、二人持刀先驅、手刃數賊、賊披靡、截賊酋首、擲入寺中、陳列神案、勇氣百倍、次日、復督勇追勦、途中遇伏、戰死、團勇死者二百餘名、同時有文生宿璋、洪雅花溪人、賊至被擄、不屈、投水死、殉難婦女亦約有十餘口焉。

余澣村曰、庚申三月、賊破丹稜、蒲江、名山、直撲雅安、復竄踞周公山、分州隊下犯、一由麻子壩、犯峨眉、一由冷板碓、犯洪雅、寶子寺山峯高險、是洪雅門戶、團勇聯絡扼要堵禦、不勝、賊遂出寶子寺、團勇退保江岸、賊走柳江場、止戈街、過高巖、與洪城僅隔一江、而不敢渡、急趨他境、未始非二公督率團勇之力、有以奪其氣、歟。光緒庚子辛丑、余司訓夾江、嘗往來木城車岡間、爲人治病、於洪雅彭鏡、孫廣文

處得遇五峯山長費春澤老人言當日賊蹤所歷之處甚詳。並出示盧抱孫先生雅江新政一書。同尋雅雨樓故址。方知抱孫改字雅雨者。蓋以樓名名之也。先生積官至兩淮轉運使。其孫南石相國。嘉道中疊邀帝眷。天之報循良。抑何厚哉。又於曾偉堂觀察處。得見張帶江先生手書洪雅舊志。其續志文藝門載有唐東屏秀才於咸豐庚辛間。帶勇防城。著城門開閉兩詩。附錄於此。以備采風。

城門閉。賊鋒利。千人萬人隔江至。砲火如雷聲震天。刀鎗似雪光照地。山城斗大。不來攻。爲有青衣之水波濤凶。吁嗟乎。賊自南。以水固。賊自北。無遮護。地與丹稜。犬馬互焚劫。已在十里路。未見一人一騎敢近城。方知使君坐算神。

城門開。賊不來。賊雖不來猶疑猜。滿城兵勇不敢撤。日日橫行在四街。錢不足。糶倉穀。穀已完。派及田。四鄉之民半遭殘。食無一飽衣無全。地丁火急尙多欠。纍纍更有樂捐案。

先生每至一處。凡山川古蹟。險阻要隘。金石碑銘。與夫鄉先達著作。必游歷採訪。

雖偏隅瘠苦之區皆有可紀可傳之事也。受業幹書格謹識

### 譚幕客

譚君諱道腴、浙江烏程人、游幕來蜀、咸豐十年、榮昌縣李令肇基、聘爲刑席、到任不數月、滇匪擾境、縣城失守、縣令不知所往、君督飭勇役巷戰、登時陣亡。

### 李魏二武生

李生殿雲、名山縣人、邛州武庠、爲人剛直、疾惡如仇、咸豐十年三月二十二日、滇匪由邛上竄、攻破名山縣城、擄掠四鄉、殿雲大集團衆、保衛鄉里、賊至奮力堵禦、爲賊所擄、大罵不屈、賊怒、斷其舌、解其屍、投之河內、又有同縣武庠魏生廷陞、勇力超羣、三月二十四日、賊行掠至其家、廷陞持矛擊傷數賊、殺斃一賊、逾時、賊衆大至、火其宅、遂遇害。

### 大邑義士

湯君萬成、大邑監生、同武生唐君遇春、充和安團總、保、咸豐十年六月十八日、賊竄

縣西清源市萬成督團堵禦十九日團敗被賊脅降不屈殺於北鄉悅來場之河干棄其屍家人求之不得萬成從弟臣尹令其家舉衣冠招魂葬之

帥君惟信大邑西鄉團民咸豐十年六月十八日藍逆竄清源市信隨團堵禦被賊執脅降不從以戈指賊罵賊怒殺以權衆剖腹剝腸而去同時鄧君春和在清源市扶伯父意剛避藍逆難賊至逼脅不從亦被殺

余濟村曰聞咸豐庚申漢逆竄擾大邑時有邑人某者被賊裹脅至崇陽之元通場授以五十人令其管轄某觀營中老賊僅八人意圖盡殲率新擄五十人逃歸夜中賊俱熟睡以手刃遞刃之方刃五人餘者驚覺執之賊首嚴訊本末怒甚支解之同時有自賊中逃出者言之甚悉惜不詳其姓字

### 灌縣團首

徐君守先灌縣人由候補兵部差官回籍咸豐庚申春漢匪犯邑境知縣英公啓祥委回籍知縣高公溥何公汝源督辦團練君同嚴君思賢總理團事六月二十五日

禦賊於元通場、守先陣亡、思賢力戰、賊以鉤貫腕死、練勇戰死者六十餘人、  
武舉任君三元、灌縣人、咸豐庚申、六月二十七日、藍逆犯縣屬之柳街場、三元同文  
生孫玉藻、監生萬景春、帶團勇進攻、接戰驚鷲竹地方、遇伏陣亡、景春子世亨、貫陣  
負父屍格鬪、俱遇害、九月十八日、賊至張家樓、圍首傅懷松、及其子鵬飛、文生傅鳴  
謙、及其弟懷清、皆戰死、同時督團遇害、殺降不屈之團紳、約十餘人、陣亡團勇、至七  
八百人之多、嗚乎烈矣、

### 任勇士

勇士任姓、諱思鉞、小樓其號也、銅梁縣人、幼得岳武穆易筋經功、留心兵家言、時值  
滇匪蠢動、常以兵法部勒子弟、連封團練、多延爲教習、受業約數千人、由是忌之者、  
遂流言小樓蓄異志、咸豐庚申七月、張藍諸逆渡江東來、當道各縣皆倚小樓爲長  
城、札委督團堵禦、扼大足之玉口壩、遏賊東下、調各邑諸團未至、同事者因而妬之、  
小樓孤立、惟率及門子姪數輩、枕戈殺賊於唐家壩、二十一日、偵率值雨、謊報賊他

去小樓樹臥村店中。賊冒雨大至，兵勇瓦解，及門伍雲樓啓關中，烏銃小樓倉卒覓一矛，刺殺數十賊。次子長超持短兵隨，衝突賊中，賊目張三千歲鄧五百勛者，驍悍素著，小樓已刺殺張賊，鄧賊恃勇拒戰，小樓矛連刺不入，知裹重甲，乃盡力一矛貫透後心，而鄧甲係竹片，滯矛不脫，遂腳擊屍飛，帶矛墮地，惟持一柄，羣賊攢攻，柄又數折，白賊奪補，久之，從者死逸殆盡，子亦傷亡，大雨如注，目不及睹，田陸崩坍，小樓陷泥淖中，身中矛死，賊亦潰走，鄉人覓屍歸葬，已逾十日，顏色如生，賊震其名，不知已死。一夕大風，聲如萬馬騰嘶，賊營爭傳任小樓至，自相踐踏竄去，銅梁賴以安堵，其弟子協團剿賊，以軍功著者甚衆。

余許村曰：近聞邸抄，光緒二年九月，御史吳鴻恩奏稱咸豐十年十一年，賊匪三次竄撲四川銅梁縣城，自經解圍，當賊圍城時，望見城上旂幟林立，定有神助，請旨飭查，預發關帝廟匾額，並加該縣城隍神封號，奉旨著四川總督查明具奏。然則賊聞風聲馬騰，自相踐踏竄去，雖由小樓之餘威有以懾之，不可謂非神助也。

按永川續志、小樓生長永川。移居銅梁。死難大足。今子孫現居丁家巖老宅。沒後、諸紳具報請卹。已崇祀銅邑昭忠祠。而永川實爲所生之地。論者謂小樓不死。得行其志。以之辦賊。或不至如此猖獗也。

陳仙槎 子炳春附

陳仙槎、成都縣人。咸豐十年秋、攜子炳春往丹稜訪會親友。適值藍逆犯境、圍攻丹稜。城陷、父子同時被擄。罵賊不屈。死之時八月十六日也。

余澚村曰、庚申三月、賊破蒲江。連陷丹稜名山。其氣燄殆不可遏。由於承平日久。人不知兵。涓涓不塞。遂成江河。善乎、劉幼丹觀察有言曰、牧令不知有民。將校不知有兵。一盜和呼。前無重阻。喋血僵屍。賊殺之耶。官殺之耶。同時禦賊陣亡者。如苟文炳、王朝俸、羅成德、諸人均能殺身成仁者也。

趙迂

趙君爾治、中江申雄溝人。家貧樂施。動拘古禮。不合時宜。人目爲趙迂。咸豐庚申秋、

張逆据胖鎮、衆懼登岩、爾治靜鎮不爲動、慮之怡然、及烽燧照耀、長子闡泣請速避、賊鋒爾治叱曰、安有清年世界、而掠殺人者、必自火耳、闡乃將合家婦稚暨文契、寄存岩上伯父家、仍歸侍父、九月十三日黎明、賊突至、圍其宅、爾治端坐不動曰、爾輩持刃、豈欲反耶、賊憐其老且驥也、漫應之、曰然、則又曰、汝食毛踐土、敢肆大逆、縱人禍不及、恐天誅難逭、賊方稱天以愚民、聞之大怒、擒其子闡、及陳郭二佃戶、爾治乃憤誓不休、賊愆怒、擦其衣、飲刃於腹中、以殺之、年六十一、復火其居、陳郭二人旋遁、闡被俘至永川、夜夢父云、三日後賊必渡河、爾可乘此逸、至期果如父言、中途爲鄉練所獲、疑爲賊偵、一人橫刀欲殺之、刀墜地陷泥中、急切不得出、衆異得不死、有李姓者、留闡俯於家、歲暮乃歸、同治三年、梟鳥鳴於屋角三旬、其聲不斷、闡暗禱於父、改葬高原、鳥始飛去、

余濟村曰、繁上張秀才塚之、年十七、入郡庠、家貧、賣書課徒治生、秋試十三科皆不第、常戲作哭秋闈詞、可歌可泣、傳寫殆遍、藍李之亂、避安縣、已而賊掠城



鄉。張方握管寫生。見賊至。徐曰。清平世界。羣豸胡來。吾方作畫。勿溷我清興。言已不顧賊。以爲怪。去之。嗟乎。張與趙同一迂也。張以詭譎而免於厄。趙因憤誓而及於難。豈非有幸有不幸耶。

### 余成鳳

余君成鳳、崇寧縣團首、年五十一、咸豐十年九月、滇匪竄境、成鳳將率團禦賊、辭母以死自誓、母曰、爾非素食糧餉者比、何爲若是、成鳳曰、食糧餉者不擊賊、欲擊賊者、又因未食糧餉而止、惟人皆作如是想、賊是以橫行無忌耳、母聽其言、諭之曰、兒竭力爲之、母以我爲念、成鳳泣拜而出、遂於二十日、率團勇擊賊於竹家船、衆寡不敵、登時陣亡、

余濟村曰、成鳳對母之言、實激於時弊、其忠勇之氣、殆不可遏、使斯人而見於世、功業豈在向鮑諸公下哉、而乃擲身於團首也、不其惜乎、

### 晁子俊

青神鬼子俊妻耿氏生一子名己兒甫四齡感豐庚申秋漢逆竄邑境垂子俊家俊  
橫矛出厲聲喝曰鼠輩敢爾連刺二賊立斃賊驚顧失色呼衆縛俊殺之耿氏責己  
兒出救誓不絕口賊又殺之擲兒於地將貫以槩鬼僕有度貴者幼傭於鬼爲娶妻  
生子改習越人術與鬼比屋居見之泣懇於賊曰兒何罪主人止此一塊肉請留之  
以續鬼氏族賊曰不殺此子汝意何爲貴曰此兒既無父母身何所依容吾養至某  
堡交鬼氏族屬畜養再投營効牛馬走並請以妻孥爲質賊義貴從之貴遂貫己兒  
登堡交鬼宗族收養速反故處命妻攜幼子亦入堡且囑善視己兒運隨賊去賊感  
貴樓誠不加束縛行二里許見賊夥擁一女郎來年可十六七貴識之乃同里桂家  
閨秀也女見貴亦識便呼庚哥救我貴搖首以目示意將及大營掠女者忽患目疼  
坐憩於地問有能療者酬百金衆皆束手貴進曰吾有奇方可愈此疾賊懇請試貴  
云疾愈吾不受金願卽一事請之適探來女郎非他乃吾妹也妹幼時就撫外家故  
從桂姓請勿加污辱賊從之貴探藥未少許點背內痛卽止賊德之迤邐到營女隨

貴處視若同胞、夜則別寢、晝與共話而已、賊令貴掌庖薪水事、出入不禁、半月餘、途徑已熟、一夕解衣履謂女曰、衣我衣履我履、詰朝同逸、次早、女隨貴汲河畔、見蘆葦中土窟、深廣四五尺、驅女匿窟中、授以餒餌、撥蘆葦障其外、囑曰、俟吾三日來、女諾之、貴仍運水入營、故令連日乏水、常早汲、越三日晨起、煙霧漫天、尺步外莫睹人影、貴乘間至窟所、攜女走下流石灘、負達彼岸、至一村莊、青楓繞林、黃花夾路、有叟出見曰、適從何來、貴具述顛末、並言比鄰桂女、尙未字人、被擄時與余相遇、權認爲兄妹、冀免強暴侵陵、叟邀至家、殺雞爲黍、貴訊叟姓氏、叟曰、吾燕姓春名室人、艾氏、有子燕翼、年十七、讀書就外傳、前三月被賊掠去、昨夜夢神告我、言兒今日當返、吾是以倚門而望耳、正絮語間、燕翼從外歸、叟見子、悲喜交集、翼瞥見庖貴桂女、詢父爲誰、父云、此亦賊營逸出者、暫寄吾家耳、命翼進揖、女亦答拜、翼退啓父曰、兒前祈關帝廟籤、詞義猶未解、今請釋之、詞云、舊愁新恨幾重重、去舊移新喜再逢、一葉紅流君宅內、手攀丹桂暗香濃、翁繹籤詞、喜謂翼曰、吾兒納采錢門、聞此女已爲賊辱、

不知所終。昨來桂女，尙未受聘於人。籤內詞意，神固明示之矣。吾今爲汝謀一佳耦，卽日具穀酒招貴飲，以塞修託之費。以意告女，女曰：燕郎不以刳灰見棄，一惟兄命是從。但宜走告慈母耳。貴偕女辭歸，以所遇白桂母，母喜，旋復燕叟卜吉成婚，貴返至晁堡，已見及妻子均無恙。晁族亦德之，桂晁兩家，議各分田五十畝，以報貴云。

余濟村曰：庾氏子不過猥瑣一細民耳，因久傭於晁氏，故委曲以存孤。因比鄰於桂女，故詭謀以脫難。兩家兒女，均賴一人之力保全之，可謂賢而多智矣。以視食人爵祿，未能遠謀者，又何啻楹之與筵耶。其各分田以報也，宜哉。嘗考獻賊蹂躪時，惟嘉眉受害最輕，而滇逆之亂，惟嘉眉受害最久。絡文忠奏疏有云：川南自滇粵各匪蹂躪以來，遍地瘡痍，然則刳連之遭，其輕其重，亦各有循環之理乎。青邑一彈丸耳，賊常三至其地，卽此一隅而論，則絃南可知矣。余因閱續修青神志，得悉滇逆三至情形，今節錄於左。

咸豐九年九月，滇匪李永和等起於滇蜀交界之老鴉灘，其時僅三四十人，不數

日。遂累百千。直走筠連。慶符逼敘城。是年冬。蔣逆上竄五通。厥十年三月初七日。犯虎渡溪。文縣君帶勇堵禦。同陳愷人大令炮船。併力轟擊。賊不能渡。遂沿上游。觀音灘渡河。團勇紛潰。有某總戎者。前一日帶兵到縣。官民皆恃無恐。乃聞賊至。卽遁。城無堞堞。傍晚卽陷。焚毀百不存一。一晝夜。卽上竄眉州。此賊初至之情形也。是年八月。蔣逆復由丹稜回竄。邑圍堵於鴻化堰。二十二日賊至。團勇接戰。退二十三日。蔣逆沿江下。復踞縣城。縣令蔡公率家口並監犯。避于四十里外之三峽口。賊於二十五日。由西路竄夾江。十一月。李逆遣其黨李玉齋。竄擾縣東羅家灣。二十二日。縣君德公督團會合楚勇。與賊戰於河壩場。首逆就擒。此賊二至之情形也。十一年三月。逆首李永和率全股由牛腹渡來犯。適提督蔣公玉龍統兵至。邑人泣懇留駐城中。以資捍衛。蔣公不從。次日黎明卽行。無何大兵甫去。大逆突來。卽用兵船渡江。攔入縣城。聞蔣軍有後行者。皆被戕。踞城後。李逆直攻眉州。大股紮眉之西南路。紮青神者。係滇人周長春。結號周濫腦殼。其營曰北井營。周

逆之下。有統領四人。東宋。南蔡。西文。北王。境內肆掠無遺。旬餘始出。僞示安民。自三月至於八月。賊出城挨戶打糧。城鄉樹木斫伐殆盡。周逆自稱青神主。春秋於各廟行祭祀禮。以城內爲禁地。令百姓城外集市。十月。官軍到眉。連日進勦。賊大潰。十二日。李逆收合餘燼。下竄縣境。官軍躡勦。總兵唐友耕。陳祥興。黎鴻化。堰十六日。即逆由青神出隊。攻唐陳兩營。營棚被賊焚十餘處。唐總兵與卯逆交鋒。彼此互傷。幸蓮花場團練接殺追勦。卯逆遁走。其時縣君魯公。住河東唐氏宅。因勞成疾卒。州憲委前任蒲江縣楊公。代理縣篆。督飭團民。於東岸紮堵。前署縣德公。亦奉州札。帶眉青團練。由太平場相機進勦。楚勇紮護家壩。奇勝軍紮梁家山。其江岸皆係青邑及眉井仁團練。總計數萬人。近城東門關。關上游河壩。係陳祥興營。營門外鉅城里許。則唐友耕營在焉。其繞城紮營者。蔣軍門兵也。唐陳兩營。旋奉路觀察札調撤。汛官范興榮。在西南北三路。調派團練接應。南路距城二十里。之瑞峯場。本係賊匪逃竄之路。蔣軍門令吳嘉春住紮。以防賊逸。又於城外周圍

繫。漢傍漢爲營。賊用木樁竹筧。實以土石。依城爲壘。連攻不下。十二月十九日夜。李逆率大股。由南門直冲官軍營。至瑞峯場。圍吳嘉春營。朱桂秋聞警往救。殺賊數千名。李逆潛竄漢陽鎮。由關子門竄去。城內尙有周逆北井營。及周裁縫之老前營盤据。二十八日。王縣君於國防接印。川兵圍攻無效。同治元年三月。李逆自鐵山派賊數千。來青邑接援。紮營石羔岩。城賊恃東岸有援。於初六夜。潛出燒營。川兵撤圍。楚軍蕭慶高。黎得勝等。於是日追到東岸。初七日黎明。楚軍分三路進。勦賊大潰。墜岩死者數千。奔至水打林河岸。撲河死者無數。城賊膽喪。率衆東渡。緣石羔岩西南北皆懸岩。高數十丈。下臨小溪長江。惟東南接山。官兵從東路進。勦。故賊一敗塗地。此三次賊至之情形也。

先生附錄防守諸紀。凡山川隘口。必備錄原文。不厭繁冗。誠欲使閱者如披地輿圖。用兵自有把握。故不以文之簡老爲貴也。受業徐國書謹識

高公子

公子姓高氏、廣漢增廣生、魯齋公之子、長名德亨、三名德棠、魯齋公六歲失怙、善事  
孀母、母蒙旌而逝、盡哀盡禮、倡修星元橋以濟人行、培植東粵館以聯桑梓、滇匪入  
川、奉札練團、竭力盡心、任勞任怨、諸子督率團丁、與藍逆相持決戰、冒險冲鋒、親犯  
矢石、奮不顧身、長子德亨、轉戰死之、三子德棠、被脅不屈、亦死之、

### 李汝榮

李汝榮、新都縣人、性樸實、滇賊犯秦興場、汝榮被脅去、割其髮辮、馳行里許、回望其  
居、被賊焚毀、火光燭天、由是氣憤而狂、復行至西河場、賊疑其佯狂作偽、遂刻薄磨  
厲、苦狀難堪、身受重傷而死、後覓其屍、於曠野得之、汝榮初至西河時、將腰間所帶  
文契、零金、封志完善、暗藏旅次壁間、寇退、主人歸見之、往詢於家、然後往取、無一失  
遺云、

### 隆昌庚申義士

鄧君忠厚、庠生忠國兄、少讀書、明大義、咸豐己未秋、滇匪寇郡、邑大夫肅公慶、嚴設



防衛、以教義團屬厚管帶、庚申六月、賊犯響石山、厚從肅公督剿、賊衆我寡、肅公遇害、厚謂同人曰、爲人不死、君父之難、非知義者、與賊力戰、格殺數人而死、其弟忠卿見厚死、急赴兄難、有挽之避者、卿叱曰、吾兄既死、難、吾何得生還、轉與賊鬪、亦殺數人而死。

陳君以遵、隆昌宿儒、世居西鄉龍市鎮、生平沉靜寡言笑、咸豐庚申、滇賊擾境、入龍市、強違行、不從、賊逼甚、遵正色曰、吾先世以來、爲清朝二百餘年清白良民、豈從賊耶、時遵長兄以達、亦被執、賊命達勸之、遵曰、賊能釋我則歸、否則有死而已、登時遂遇害。

陳君世勳、南鄉人、年二十、精武藝、庚申夏、響石山之役、因父思茂爲甲長、挺身代勞、鎗斃二賊、後衆潰、勳以子藥未罄、殿軍反擊、爲賊所殺。

葉發生、南鄉人、傭工自給、庚申夏、賊至響石山、邑令肅公慶、親臨督勦、令近團助戰、發生念主人力弱、願執戈代勞、臨敵趨衛中軍、遂殉肅公之難。

會長禎、南鄉人、庚申響石山之役、禎因父爲甲長、挺身代勞、奮力併勦、軍敗、爲賊所擒、逼降不屈、被殺。

耿君高明、同弟克明、甚相友愛、均有膽力、庚申滇逆圍城、弟兄被擒、高明奮罵不食、賊將殺之、克明跪泣代求、不獲、賊竟殺之、克明潛瘞其屍、遂逃歸。

許君海珊、拔貢、乃昭弟、爲人倜儻不羣、游豫章、依戚郭彭澤、後從耿光宣勦粵匪、以戰績記名六品軍功、光宣死難後、奉欽使曾滌村命、護柩回蜀、三閱月歸抵里門、其所贈賻黃金百、白金千、暨生前來往聘札、歿後哀輓詩文、緘芥悉交光宣胞弟、一無所私、咸豐庚申、滇匪亂蜀、富順童家寺栗砦、聘往教習練丁、是年秋擊賊被殺。

喻君允忠、字均堂、訓導崇頤子、幼業儒、應童子試、常列前茅、日濶武藝、庚申滇匪犯郡、忠爲團練教習、是年七月十八日、奮隊禦賊於富邑王家堰、適賊衆蜂擁至、允忠斧劈數賊、柯斷、賊慕其勇、誘之降、不從、復奪矛殺數賊、力竭被害、身無完膚、時年二十六歲。

陳崙山、增生廷瑞弟、庚申冬、賊犯境、崙山見賊、擊以瓦石、罵不絕口、爲賊所戕、臘月賊復至、其母劉氏罵不已、亦被殺。

### 鄭廣文

鄭君諱嘉謨、字策之、漢州人、性仁孝、有膽識、讀書明大義、稍長、游名孝廉張臨川先生門、目其文、光明磊落、以氣節許之、旋以州試第一、補博士弟子員、屢試鄉闈、不遇、例貢成均、注選訓導、以母老未赴銓、咸豐庚申、滇匪竄蜀、勢張甚、州牧奉大府檄辦團防、以事屬君、君遂捐穀募勇、潛設戎備、而賊已擾新繁、彭縣、寢及州境、避難者君悉止於家、人心恃以無恐、越日賊鬻集、君將率勇出禦、顧瞻老母、泣下不忍行、母毅然曰、義難兩全、爾其速行、猶可一戰、事之濟與不濟、固未可知也、君遂督衆出巫家寺、與城守相犄角、賊偵知有備、不敢逼州城、而肆出焚掠、君激衆誓殲賊、衆感君義、咸奮勇追賊、道經東禪寺、寺僧爲炊飯、出釜而賊突至、君投箸持矛、整隊迎擊於晝壁山下、殺賊數十、先時賊披猖、所過數百里、莫敢撓其鋒、至是爲所阻、憤甚、聚益衆

君率勇環攻。壘用巨礮轟擊。斃賊無算。乘勝督衆酣戰。自午及申。賊勢已蹙。會天大雨。勇饑疲。君振臂一呼。創痍皆起。奮勇直前。所向披靡。賊盡擁回攻。君轉戰被創。失足陷於淖。勇曰。胡作榮。鄭明達。負以出。欲亟遁。君厲聲曰。事不可爲。與其遁而俘。不如戰而死也。鏖戰薄暮未已。衆各潰散。君猶手刃數賊。被數十創而歿。年四十有一。胡作榮等死之時。咸豐十年九月二十五日也。州牧徐公君照。以君死事聞。制府崇公樸山。手書盡忠報國字表之上。其事於朝。得旨。議卹。贈國子監學錄。給雲騎尉世職。入祀昭忠祠。飭國史館纂入忠義傳。

方希孟曰。鄉士大夫身無軍師之責。遇難而去。非有悖於義也。苟當其任。則一城一邑之安危所繫。與守土吏無殊致焉。禍未至則攬其權。變已亟則逃其死。謂之何哉。軍興以還。士大夫鄉居伏節。指不勝縷。其間以倡義興師而隕身者。事尤烈。節尤奇。彼無他。蓋衷於義者久也。廣文君以土著未練之卒。當逆焰方張之寇。戰無後繼。守無強援。成敗勝負之數。不待再計。卒能奮芻冒刃。以擗其怒而致其死。

至於再三而後并命於捷勝之餘。匪特忠義爲有餘也。其知勇亦迥乎不可及哉。  
附錄李念祖孝廉題鄭廣文死事詩

沙場疊聽將軍歿。

提督馬天貴總兵王嘉賓張萬祿相繼戰歿賊勢遂張

賊勢披猖據上游。刁斗驚聞忙戰壘。軍

書紛速滯行舟。

時賊據弔黃樓被郴州縣告警迫甚派軍門督師進剿三日舟始抵雷神祠賊來問墓延各邑勇遂不可遏

朱旗隊裏無長策。都尉

旗幟服飾統用朱色未臨陣而逃餘黨悉爲圍擒

白髮堂前有遠謀。

策之母孀子出賊寶說母也

曷若儒生能戰事。旌旗貼處

賊他投。

余濟村曰。蓋聞鄉兵禦侮。爲堅壁清野之謀。衆志成城。合寓兵於農之義。立法美矣。而行之者。則有善有不善焉。夫合數百家爲一團。聯數團而爲數千家。與鄉里有才智名望者。俾爲統率。尊曰大團總。數千家之丁男。悉歸調遣。無事則類聚一堂。持矛習技。有事則分領各隊。執受前驅。誠足以衛室家而靖暴客也。然大家之子弟。投筆荷戈。或因此而廢學。無聊之惡少。成羣結隊。或藉事而作奸。而爲團總者。受衆人之擡舉。細事不無縱容。與官府相往來。論功復加保薦。威權過於守令。

聲勢震夫一方。號令三申。萬衆來集。堂上一呼。堂下百諾。當此之時。幾不知己身爲何如人焉。由是則妄懸告示矣。僭擬硃單矣。私設公堂矣。自具刑杖矣。貫人之耳。箠人之膚。焚毀富民倉廩。報彼往日私仇。估派土肥銀錢。多於公家正額。甚至凌虐官長。殺戮無辜。慘目傷心。莫能殫述。而猶自以爲得意也。不知身無朝廷尺寸之柄。人皆鄉黨親族之儔。當干戈擾攘時。固任其肆行無忌矣。一旦烽烟頓息。傀儡收場。回視己身。依然故我。而乘間抵隙者。挾平日之小怨。雪舊冤於公庭。干百家團勇所爲之事。皆歸咎於團總一人之身。狡兔已死。走狗可烹。其禍可勝言哉。蓋因練團而捐驅報國者。固難能而可貴。有因練團而致身仕路者。亦才畧之可嘉。若夫不能殉國。不能榮身。而徒逞一時之殘酷。試觀賊平後。以擅殺羅法網者。可更僕數哉。余故曰。立法美矣。而行之者。則有善有不善焉。或問治團事者。必如何而後善也。余曰。除勦捕格鬪殺斃勿論外。倘拿獲真正賊匪。不可私行殺戮。宜送地方官處治。卽本團團勇滋事。小則憑衆責罰。大則集衆送官。仍不可私加

刑戮。如是足以殄戢萑苻之威。亦不失敬恭桑梓之誼。暇因感於鄭公練團殉國一事而類書之。彼治團事者。亦知所戒法矣。

### 施文光

咸豐十年九月二十七日、滇匪藍大順、何馬蟻、逆婦謝花妖、竄擾什邡。時有儒生施文光者、率鄉團禦賊於永安鄉之觀音堂。賊衆圍潰、光被執、脅降不屈、賊焚其居、迫之光仍大罵被害。

### 張明經

張公致齋、諱能用、綿州貢生、教於里、及門登科者甚衆、在家時每聚室中、男婦長幼、講古今忠孝節義事、子弟出外、咸恂恂端厚、滇匪之亂、藍逆逼綿州、人勸之避、先生曰、自先人隸籍來、享承平福數世矣、余雖未食祿、亦草莽臣也、今鬻矣、恨不能殺賊、吾戴吾老頭巾去、得罵賊死幸矣、命子壽麟、率家人暫避、已則端衣冠坐、賊至不屈、死年八十八、時咸豐庚申十月四日也、辛酉李逆復至、壽麟痛父死賊、義不忍生、亦

不避賊死、妻黃氏赴水死、子世瑄被執、世照奔救之、皆死、孝友節烈、萃於一門、綿之人以爲皆先生教也。

### 湯貢生

簡州施家壩貢生湯君三徵、年六旬、精神矍鑠、聞滇逆擾蜀、乃先集本境數百人、教習摩壘陷陣之法、時州牧葉公、聯絡鄉團、約有千隊、以徵練勇爲冠、咸豐庚申、賊目彭統領、自胖鎮犯湧泉寺、葉公諭團勇四路進兵兜勦、徵與秀才張某、率四百餘人先驅、後隊不繼、賊用火攻、靡有生全者、葉公奮勇之士數百人撲入陣中、亦被戕害、衆聞敗俱潰、賊衆揚言起營、鼓旗前導、後隊亦捲帳徐行、砦上男婦望見、咸魚貫下走、欲回故居、賊忽返旆包抄、裹脅者無數、而砦亦攻破、事後揀徵遺骸、半屬灰燼云。

### 張朝金

張君朝金、金堂雲峯寺人、世業農、生平武勇好義、善搏擊、鄉鄰有鬪者、輒以身排之、然終未嘗以力陵人、咸豐庚申、藍逆由趙鎮竄懷口、居民攜眷逃雲峯寺一帶、不下



千百戶。君隻身守隘。手刃數賊。因寡不敵衆。被害。賊畏山路險阻。疑有伏。旋退。一方賴以保全。

余濟村曰。王公設險以守其國。有守土之責者。不可不詳悉輿圖。金堂雲頂山。一名石城山。宋余玠所築。舊堞猶存。藍逆犯境。團總楊臨江明經。築堡於上。率團民居此。賊畏其險。卒不敢犯。則地利顧不足重哉。巴縣羅偉臣學博。有復上崇督憲一書。詳述川北地利。瞭如指掌。節錄於左。以備觀覽。

敬復稟者。爲申明進兵要路。斷續扼險。聚穢醜類。以全大同事。竊維軍興以來。紱嘉雅邛資眉諸屬。雖迭次滋擾。究能保全。賊所以不敢逞志於省垣者。恃有此也。萬一潼城有失。被賊佔踞。必遣一股由鹽亭入保甯。一股由蓬溪入順慶。則川北三府。已失犄角之勢。復遣一股由中江據三王廟。則省垣之援路已絕。再遣一股直犯綿州。肆擾德陽羅江諸縣。則省垣亦震動矣。爲今之計。與其後爲人制。不如先發制人。卽以賊意中所欲爲者。占其先手。轉而攻賊。不惟可以立解潼圍。直可

將此股匪聚而殲旃。何也。賊無糧而自潰。乘其潰而擊之。不敗何待。凡賊蹤所至。俱以擄掠爲資。北路西路。均爲晉省大路。尤關緊要。北路仰懇檄飭綿川唐牧。督帶該州練勇。由豐谷井。葫蘆溪。劉家壘。青山驛。興峯寺。而進。直抵距城十五里之北黃蓮壩。近逼賊營下寨。則北路之糧道絕矣。西界兩路。俱調建中營進剿。正西路。由中江回水鋪界牌。建林驛。樂安鋪。而進。直抵距城十五里之西黃蓮壩。近逼賊營下寨。則正西之糧道絕矣。旁西路。由建林驛場外左手轉入觀音場。峨螺山。古井壩。新廟宇。而進。直抵距城五里之黑窩子。近逼賊營下寨。則旁西路之糧道絕矣。調川北道劉督帶本道練勇。由大橋富村驛。鹽亭縣秋林驛。而進。駐紮高山鋪要隘。調川北中營游擊常。統帶本標官兵。直抵東河外接官廳下寨。扼賊東竄之路。則東路之糧道絕矣。復調督辦順潼團練捐輸之前成都府楊。督帶順慶練勇。會同蓬溪縣李。所練潔勇分紮。蓬溪諸隘。嚴爲防守。調安岳縣李。樂至縣劉。各帶該練勇。卽於該縣險要諸隘。駐紮。四圍截堵。免致偷逸突竄。調鄭游擊防堵新

都之兵。移紮興隆場。山王廟。半邊山。要害之地。兵法所謂據險而守。勿使賊得入平地者此也。自山王廟以下。地太平衍。無一紮營之區。復調唐副將。駐紮大礮磴。一軍由魯班橋。景福院。樂嘉場。而進。另遣部將。分股移駐射洪縣。唐副將親率一隊前往。層層埋伏。逼距巖洞十數里之楊家壩。板橋鋪。一帶。裹而擊之。扼其歸路。則南路之糧道絕矣。再調黎副將。督帶駐紮姚家渡一軍。由胖子店。大礮磴。間道疾馳。繞出太和鎮後。直襲太和鎮賊巢。再調隊寧射洪兩縣民團。擇隘埋伏。以爲後勁聲援。再調重慶鎮舒統本鎮兵勇。由合州遂寧一帶。遮道而來。不徒交鋒。已足懾賊之魂。雖賊營綿亘百餘里。然俱佔踞民房。已犯兵家大忌。且聲勢不能聯絡。無異散處。我軍如此布置。將賊截作數段。首尾不能相顧。進無所掠。退無所歸。不過旬日。藍逆之頭可致麾下。此孫子疾走魏都。批亢搗虛。形格勢禁。埋伏桂陵馬陵諸道。以解韓趙之圍。而收其敵之上策也。迂腐之儒。罔識忌諱。用敢辱塵清聽。若此策用之不效。伏俟斧鑕。無任迫切待命之至。

王國英 德申附

國英彭縣北縣永定里人王君德山次子德山生性剛正尚節義咸豐庚申滇匪竄境集子姪兄弟諭以大義無為賊汚既而國英與兄國忠禦賊均被虜至金堂趙家渡謀刺賊酋藍二順事泄兄弟俱遇害德山弟德申同團眾禦賊釣脚碾眾潰獨然礮轟賊亦被殺

峨眉義士

峨眉縣廉生童訓字學古咸豐庚申滇賊犯境訓屢帶鄉勇禦賊中礮死

文生張兆霄字瑞樓峨眉人設館於城北之石壩賊圍峨眉城兆霄率鄉勇來援力戰死之

童生李洪照於賊攻峨眉縣城時率眾赴援被執不屈賊殺於符文江岸越十數日面色如生

武生張化鵬峨眉人世居城南十里山庚申藍逆犯境化鵬年已七十矣怒髯如戟

操矛迎殺數十賊，矛被賊奪，猶空拳相搏，力竭被害。賊衆皆驚曰：此老鐵漢也。峨眉縣監生楊俊臣，爲青龍場團正，庚申滇逆至，俊臣率勇抵禦，賊爲之卻，踰嶺窮追，賊設伏以待，身中數十創死。

童生歐陽泰，館於峨眉縣南苟家溝，賊至被擒，不辱死之。

余濟村曰：余嘗游峨山，夜宿伏虎寺。晨起，偕寺僧果善登樓看雲。長沙雷瘦梧秀才，爲余作峨眉樓看雲圖一幅，懸佛舍東壁間。題語有天際一危樓，倚欄人並坐之句。然俯瞰峨眉縣城郭，不過一掌地耳。其山川雄秀，甲於天下。鍾毓人材之盛，不特武夫赴桓，卽文學之士，亦能投筆荷戈，親冒矢石，臨難而不求苟免也。

### 傅熊二老人

傅君諱秉忠，字存誠，瀘縣宿儒，能詩，工畫。咸豐庚申，藍賊竄瀘邑，君家居不去。賊至，分股肆擾，君罵之，被害。年七十有八，賊退，揀君屍，襟懷中得詩句云：一生正氣歸泉壤，半點丹心報聖朝。伯兄秉常，曾以詩弔之，同時宿儒熊君萬壽，年八十，賊至其家。

罵之亦被害。

余濟村曰、瀘西七十里。岷山之陽。有老人村。李雄僭祚時。人多避居於此。民家多有五世孫者。人不喜食鹽醃。溪中多枸杞。盤根如龍蛇。飲其水故壽。其山多牡丹。間有松柏人癩。其地僻遠。縣吏不到門。或終年無人迹至。真武陵桃花源也。問津深入。似亦可避亂矣。何傳熊二老人。甘以毫畫之身。而膏賊刃也。豈非具蠶桂之性者乎。

永川義士

胡君坤厚、字見龍、永川監生、有膽略、亢直任俠、能文不售、乃習擊刺技、戟重二十餘觔、運掉如風、族某素武斷、鄉人畏之如虎、君獨條其惡款鳴於官、人以是重之、咸豐庚申冬、張逆圍城、君率團民百餘往援、初戰斃賊數十人、賊突大至、團胥奔、君獨殿、賊見其驍勇、欲生致之、窮追不已、至火燒廟投巖死、賊去、家屬殮屍、猶挺然立、顏色若生。

江從九繼賁、字巨川、永川人、性倜儻、篤信因果、嘗集諸友設宣講會、咸豐十年、賊擾鄰邑、奉縣札帶團堵禦、冬十一月、賊犯永圍城、率鄉勇赴援、斃匪多人、逾日、賊大股至、力竭陣亡、燬其室、子女五人皆遇害、兄繼富亦同時陣亡、

康君明忠、字嵩山、永川增生、舉孝廉方正、鄉試屢薦不售、遂家居教誨子姪、咸豐初、髮捻煽擾、東南騷動、乃鳩工就大松林爲堡、號友助砦、十年冬、張逆犯永、縣君馳檄飭帶團救援、君行至半途、聞藍逆在爐、將東下、乃命姪炳奎分練丁代往、自率衆回砦堵禦、十一月初八日、賊至、見砦當其衝、不敢進、次日用木梯仰攻、初戰頗利、會姪孫代文陣亡、衆驚怖、遂失守、康氏殉難者、內外數十人、君曰、吾家不辱如此、死無恨矣、飲鴆衣冠而逝、

康君立峯、字確軒、道光癸卯副貢、咸豐初、聞粵匪猖獗、爲豫防計、以王家坪當孔道、勸叔明忠倡修砦堡、會李逆起川南、其砦適扼賊來路、爲邑藩籬、復操演丁壯、籌辦器械、奉明忠爲砦長、率衆居之、十年冬、藍逆由瀘入永、野無所掠、進攻其砦、君佩劍

登陣固守、賊於砦下誘降、不許、用礮石擊殺數十賊、砦破被害、妻戴氏、以幼子付兄德軒、投池水死、女辛姑亦隨之、

康君炳奎、字莪峯、永川廩生、報捐縣丞、貌魁梧、素有膽識、咸豐十年、張逆犯永、奉叔明忠命、率團丁赴縣救援、因入城參與軍事、賊圍攻十一晝夜、親冒鋒鏑、登陣督衆、略無懼心、會有暗與賊和者、遺以硝磺、資爲地道、轟開石垣數丈、城遂陷、君率族丁立壽、立江、代龍、代翠、代祿、代來、代禎、代祥等、巷戰、身受重傷、猶斃數賊、力盡、同時遇害、賊去、家人檢其屍、顏色如生、

羅團總世璧、字禮南、賦性剛直、見義必爲、咸豐八年、匪黨倡亂、奉札督辦東路團務、上稟狀、情詞懇切、庚申冬、張逆圍永、禮南與李文富等、率團守鐵嶺關、議進攻解城、圍、無何賊衆來犯、張兩翼蟬聯而進、圍衆不能敵、遂潰、禮南陣亡、文富後至亦死、邑貢生何增彬輓詩云、走馬東來認戰場、直存浩氣振綱常、至今憑弔人何在、鐵嶺梅花獨自香。



張君錦、字肯堂、永川監生、報捐縣丞、曾經分發、因措資在籍、庚申賊至、避難城中、晝夜督團防守、城陷巷戰、衆潰、奔回館舍、家人勸改裝逃匿、不從、整衣冠北向拜、將欲自縊、賊至被執、不屈死。

阮君志省、字立堂、永川從九、咸豐庚申冬、奉委帶團、在縣屬單石鋪防堵、張逆大股至、力戰陣亡、繼室張氏、與子女數人、亦於城內闔家殉難。

王君定福、永川瀘龍人、庚申冬、率團丁援縣、遇賊於鐵爐溝、奮力接戰、衆潰被擒、罵賊死、子舒崇奔救、亦被殺、里人輓詩云、竄永來逆賊、蜂擁誰敢截、君獨統援師、奮怒殺狂孽、狂孽擒其身、難辨常山舌、壯哉此丈夫、不愧臨大節。

謝君文炳、年八十矣、庚申藍逆擾永、入其家、問此地辦團者居何宅、文炳答曰、汝欲焚之耶、無良至此、天理難容、賊怒、遂罹於難。

洞中人

永川監生鍾國璋、咸豐庚申、滇逆犯境、國璋避賊孟佛寺洞中、賊至、國璋用礮轟斃

數人賊以煙薰河、舉家三十二丁口同時俱亡。母張氏守節四十二年，並罹此禍。余澹村曰：李藍之初起也，富厚之家，依山而居者，往往謂城邑難鑿，誅求若堡，靡相統一。於是陰賄石工，作爲石室，上不至頂，下不履平，腰鉅鑿，一綫天梯，旁通氣孔，中設籠榻，外閉石扉，自謂爲狡兔之窟，可以坐閱塵劫矣。不知其有入而無出，穹室熏鼠，詩已明言，奈之何弗悟耶？後之避亂者，可以爲鑒焉。

### 吳寶戰

吳公巫山人，談者忘其名字。當藍逆躡蜀時，吳公自練義勇千餘人，追賊援勤。凡賊犯各州縣境，公卽帶勇馳援。紫城外要隘，保護城池，賊來與戰，賊退城完。守土者派銀若干兩，送犒勇士，謂曰：寶戰不費國帑，屢有捷獲，賊憚其名，犯銅梁時，縣官某招公往援，營於城外之斗溝，賊來攻城，公率勇士大戰兩晝夜，衆寡不敵，全軍覆沒，公被擄，大罵不屈，賊恨公深，用蒸酒地甌，生蒸而斃割之。今瀘州孝廉屈君達冠時，年十餘歲，被擄賊中，親見其事，慘毒心悸，乘間逃出，爲鄉團所獲，將受刃矣，適遇陳君

昌向君時菴兩秀才在旁見屈君儀容文雅詢知爲讀書幼童釋而資之路費始幸生還時斗溝吳公殉難義勇千餘人皆積屍橫野陳向二君爲之募錢具棺收瘞遺骸而去同治甲子鄉試二君赴成都應試同寓旅館主人每於夜靜時遙見二君寓室門外有無數無頭人環守近復不見老嫗幼童所見皆同主人不獲已面語二君疑有命債勸勿入闈二君自揣生平無過或果前世冤孽雖避無益乃放膽入闈榜揭二君皆中式始悟無頭衆鬼卽吳公義勇報掩骸之恩者也今陳向二君已捷南宮入詞林矣屈君亦登辛卯鄉薦司訓吾邑親爲予言之

余濟村曰吳公亡勇報恩事侍御吳春海先生亦嘗爲人言之可見冥冥中自有布置也。

高織屨

會理州高尙洪住南鄙櫻桃溝年四十餘織屨爲業素愚直無他技能咸豐十年冬十一月朔八日滇洞桂德富攻州城內奸應之三更陷其黨歐慶揚柳先鋒統萬餘

誠爲後隊、十四日、踞黎溪站、紮大營於湖廣館、迤南震怒、十三營統領、張自洪、劉會雲等、率練三千人討賊、尙洪充練目、二十日卯刻、抵黎溪、賊已領大隊出、尙洪著短衣、赤雙足、棍不掩胫、手舞大刀、飛奔直前、趙春泰等繼之、鎗礮林中、斬殺如意、自山麓殺至街衢、衝賊大營、殺賊百七十餘名、往還數次、屍積如山、三千餘練、無傷亡者、戰畢、尙洪委刀酣臥、明日、尙洪欲前進、阻於衆練不果、蓋鄉練素無紀律、得勝後、各以財物歸也、延至二十四日、尙洪怒甚、騎顛足馬、執松枝如塵、身佩短刀、憤然前進、冷老十、林起龍、荷叉以隨、趙春泰、趙聯科等繼其後、入慶山營隘口、賊數百、踞兩旁、高埠、石雨下、擊不能中、冷林二人、挺叉刺賊、春泰等亦至、賊弗能敵、棄隘奔回鹿敵、尙洪踵至、拔其營、殺賊數十餘、敗入城、二十七日、率冷老十、林起龍、趙春泰、趙聯科、張自唐等、由鹿敵直抵南城門、門閉、逆首桂極富、登城瞭望、知鄉練大隊未至、暗傳東山西寺賊、抄截其後、自領千餘人、陡開城門、驍賊鐵有金先出、趙春泰於橋頭刺之、倒地桂逆率衆齊上、春泰戰退橋下、同趙聯科等二十餘人、戰賊千餘人、一時東

西兩路賊抄至、圍二十餘人於垓心、時尙洪滿身污穢、鄉練大隊卒不至、春泰聯科等奮勇連挑十數賊、奪路退保金帶橋、聯科失足墜澗塘死、趙春泰、張自唐等且戰且走、尙洪身中數鎗、至頭道橋陣亡、

三才圖會

# 蜀葵述略卷五

金堂余鴻觀瀾閣編輯

## 義部

李貢生

李公華治字安貞合江廩貢候選訓導授經楊慶伯觀察署庚申秋觀察爲順潼團練使冬賊攻遂甯急君率練勇援之辛酉正月十五日直逼賊壘戰死之一子名新珏

劉庸夫曰夫士人讀聖賢書心存君國卽窮而在下苟可以利濟民物雖蹈水火捐頂踵而不悔蓋普天之下莫非王土率土之濱莫非王臣君臣之義固無所逃於天壤間也公之遵 自治團靖萑苻以衛桑梓此固公慷慨任事之初心非拘墟小儒所得知也世之人往往處承平無事之秋談說忠孝一若任艱鉅而有餘泊乎變生肘腋卽束手垂頭如木偶人甚或先去以爲民望反藉口留有用之才

不冒昧於一試。而竊笑喋血疆場者之輕生、噫可悲也已。君家貧而好急人難。讀書好爲深湛之思。授生徒每講忠孝大節事。娓娓不置。楊重倫、毛鄰、楊儀成、楊學成、楊觀成、皆其高弟子也。歸元日。觀察爲經紀其喪。復周卹其寡婦孤兒。余嘗與公諸弟子遊。每言君死事狀。諸弟子未嘗不泣然泣下也。

### 什邡義士

李君增厚、字載之、什邡新甲人。世業儒。負氣任俠不羈。貌魁梧。望之疑疑如武士。讀書中夜。嘗置警枕自勵。是以周孔外兼通孫吳。爲文下筆立就。豪爽如其人。年二十。游邑庠。後因議公與有司不合。被褫。游學至彭。彭令馮公奇其文。召與語大悅。遂爲納粟入監。趣令從軍。以貧故不果。咸豐十一年正月。通山會匪朱二九倡亂。擾縣屬。君奉札帶團。堵剿於慈母山。數里外。遙見火光燭天。居民紛紛逃避。君直向山前。追捕獲數賊。收隊還。頃之賊大至。團且潰。有促之去者。君曰。我等若去。慈母山民房悉成焦土矣。遂率所部百餘人。與賊力戰於山右石牛壩。殺斃賊目一人。統斃賊夥十



數人。衆寡不敵。與子衍墜。及團丁三十餘人同遇害。邑廩生周冕。五帛以詩云。魂歸碧落。冤難白。血洒青山。淚亦紅。蓋深惜之也。是年四月十九。陳李二賊從彭邑石洞。堰漏夜突至。天未明。團民未整。賊闖入什加之徐家場。鄉民張建祥。年二十七。素有膽氣。持矛大呼。率衆禦之。賊約有數萬人。數十里內。火光熒熒。建祥深入賊中。刺死騎馬賊。矛折。拔刀殺數賊。身中銃傷。力竭遇害。團民被裹脅者。目擊心傷。潛壅道旁。後改葬誌石焉。

淡齋氏曰。載之當東髮之始。刻礪讀書。氣概已殊庸衆。入泮後。喜於有爲。益復不羈。使由此受知當代。得善御者指使之。其建樹豈可量哉。惜乎其不遇時。乃竟因公被襪。抑塞窮愁於彭什間。奉令才無所見。僅以帶團堵匪。戰死荒山。其數之奇。可勝惜耶。然臨難不苟免。亦戛戛乎其難哉。

余濟村曰。光緒辛卯。什那令常熟楊實甫明府。招余襄校。試卷試畢。偕諸同事謁雍侯墓。游羅漢慧劍兩古剎。聽垂白老僧說咸同間兵事。因得悉采其地之殉難

者而並書之。

李聯芳

李君聯芳、永川民也、咸豐庚申冬、滇逆陷永川、據城三日、移攻榮昌、巡檢郭崇本與賊和、獻馬輸金、賊乘隙陷城、崇本以法論死、圍攻壁山、守土張公煥祚得心民、出奇制勝、次年正月、賊復犯永川、焚殺數十里、屍積城等、日日剝截生人皮肉、戲名擺十殿、李君憤不惜生、率數百人、衝殺入賊陣、既出復入、賊衆民寡、力盡覆沒、弟桂芳、倡義報仇、力竭亦死、由是永民激發、遠邇響應、又賺賊數千於仰天窩圍殲之、賊魁張五麻子、親率拒戰、敗歸、僅以身免、賊相率以去、

郭秀才

郭秀才名謙、小山其字也、射洪縣人、平生善易、推演河洛理數、輒驗、又能射覆、多奇中、歲辛酉、藍逆圍遂甯、烽火相望、射人閉城自守、邑令劉某愛渠信、令司管鑰、二月十九、太和鎮破、射城旋自潰、衆往取鑰不與、時建中營首領三臺李永衡、率八百

人駐城中、斬關去、渠不知也、賊入、脅之從、不屈、厲罵死之、壬戌正月初三夜、舉人胡文魁、夢偕劉生順字來、心知其死、問來何爲、曰、乞先生爲壽文耳、醒異之、午刻、有許貢生貽穀、寄書爲請卹事、其時邑主事羅錦城初至京、上其事、得 旨附祀昭忠祠、由部行查縣中、人尙未知也、

### 蔡廷熬

蔡廷熬者、襲侯楊公烱麾下勇目也、咸豐十一年三月初八日、藍逆遣何偽統領逾資州、竄陽縣、犯萬壽場、分股由老鴉山踞南津驛、張貼偽示稱順天二年、時楊襲侯烱、領忠武軍、自崇慶赴富順大營、以道梗駐城內、十三日、楊侯遣勇目鄧雲往調賊、邑紳楊銘釗等、集團千人、在飛虹鋪扼守、雲帶勇至、令助聲援、遇賊數百、合攻之、退、十六日、楊侯傳令、兩岸嚴堵、令鄧雲廷熬帶勇往攻、先遣雁江勇登火峯山誘賊、雲率勇潛由江家溝進、賊隊適至、急攻之、賊奔百忍堂左山回抗、忠武勇駐右山抵禦、殺賊多名、驛賊來援、過午、雲見雁江勇接應不至、始麾勇自水觀音山頂撲下、且戰

且走、廷熬暨勇丁王某三人力戰死之、賊至飛虹橋、見勇團整列、始退、

余澹村曰。自咸豐十年以來。滇逆三竄資中。相持於蘇灣者九十日。東北場鎮俱遭蹂躪。城西羅漢寺。相傳有王居士者。於資溪中得石羅漢十八尊。因建廟祀之。舊有鈐記云。馬祖留下一蓮池。延壽街前挂紫衣。聖泉湧出阿羅漢。書臺重整狀元梯。至光緒朝。駱君公麟。果得殿撰。公麟與余同學尊經書院時。言當日賊事最詳。

### 平安寨三寨主

平安三寨主。諸生李治襄、孫春鏞、邵德棻也。寨在資陽縣萬壽場東北五里。獨自滇匪竄擾。輒以焚掠誅求爲事。逃徙者預陳米穀銀貨於庭。以媚賊。蓋懼其燬室追躡也。賊知其故。愈藉此爲要挾計。李君治襄謀於春鏞曰。鄉愚賄賊。賊何以平。爰擇山坡之陡險處。築平安寨以避賊。近寨李邵孫爲著姓。衆議治襄春鏞德棻爲寨首。挑選精銳。延魯京道教之擊刺。魯年八十。合寨稱魯八師。咸豐十一年三月初七日。滇

逆何僞統領自牛腹渡來犯踞萬壽場初九日有賊數十至寨外索銀米寨人婉絕之移時復來百餘賊謂不如約必破寨盡殲之卽有爬牆架梯者作欲登狀德棻年七十六甚矍鑠卽分佈壯丁拋石斃數賊治襄子昭國亦諸生發烏鎗連中三賊始退初十日賊千餘更番攻寨礮石交下斃賊多人賊怒圍攻不息各守丁頓飯掬食目不交睫者三晝夜寨內丁不滿千難數分防東寨巖壁較峻以婦女守之賊覩破十二日辰刻賊誑曰破北寨矣各婦女回頭驚顧賊乘勢梯附而上殺數人遂奔潰昭國在北門語衆曰事急矣我輩宜死戰膝不可屈也持短矛刺賊三人賊中丁海查急以飛叉刺之遂遇害治襄故善彈能中飛鳥彈斃一賊旋受傷見昭國死恐汚賊手投巖自斃次子暄國三子隴國痛父死衝殺一賊均死之春鏞事孀母以孝聞經理寨中支發見賊入與弟隆斌舉刀賊二賊死之邵德超棻堂弟也年七十二與子湘同守西寨超孫光治有勇力湘見寨破令光治負父且戰且走殺七賊力竭命隕賊知德棻爲寨首將生擒之子一襄率襄子五往救斃賊十餘人賊圍愈厚均被

賊狀、德棻罵賊被害、壯丁李連開、襄族也、善長矛、大呼殺賊、連刺十一人、一大刀賊從腦後削其半首、既死、猶執矛僵立、作刺賊狀、數日不仆、弟連開及賊七人遇害、治襄姪孫緒國、年六十四、飛石斃二賊、其二子隆杜、刀劈六賊、四子隆桓、鎗斃二賊、與次子隆植、植子運湖、力戰同死、緒國有女孫梅英、年十三、足疾不能步、見賊攻寨急、請於母曰、脫至不守、兒豈可受污辱、我將引被覆臥草舍中、速火之、勿令墮賊手、寨破自焚死、魯京道同李應緒守南寨、應緒棍斃五賊、京道刀斫八賊、力竭死、統計賊賊僞先鋒一、餘賊三百四十有六、寨中男女死者一千零二十五人、

余澣村曰、平安寨之破、老弱男女、持械拒鬪、無一降者、向使甘心餽賊、詎如斯之無噍類哉、其毅烈之氣、有足風者、余以爲大亂之世、凡附近州縣人家、宜入城避賊、離城較遠者、固宜築寨聚糧、使賊野無所掠、糧盡自去、然必擇山勢之高險者爲之、又必邀集鄉人、分築三寨爲犄角、相去不過一二里、賊攻此寨則彼寨出丁援救、更宜於隘口處、先掘坎陷、撥丁扼守、斷賊來路、出寨能戰、始能閉寨自守、不

然區區一案。孤懸山頂。官印俱無。縱有蠟丸。何處告急。內無統屬。外亦不能號召。援師。賊即不攻。只坐困數十日。如籠雞網魚。無繙自斃。然則各寨之破。其慘哉。固可哀。未始非人謀之弗善也。

張安一

張安一、號明魁、中江雄甲溝人、大父信春、乾隆丙午科武舉、安一昆季四人、一居長、幼好學、不求甚解、性忠亮、重孝友、家窮廢讀、力穡養親、膂力過人、尤精矛戟技、己未冬、聞賊猖獗、倡修義豐山砦、聚眾習武藝、辛酉春、藍逆薄潼郡孔亟、太守阮募兵援城、安一偕諸弟捐貲募勇三百名往援、營於城外之牛頭山、凡援兵之來、皆營於此、賊大至、破鳳凰山、轉撲牛頭寨、諸營人人自危、安一督勇堵擊、矢石鎗礮如雨、賊死無算、自中至戍、賊不能勝、眾志稍固、明日賊欲夾寨而壘、安一探確賊情、率眾下寨力戰、揮刀連斃三賊、賊稍卻、遂率眾直撲賊壘、礮傷左手大指、奮擊逾時、整隊歸、賊不敢逼、太守嘉其功、授六品軍功、賊解圍後、安一手創益劇、將死、猶大呼殺賊者三、

卒時年三十四。同時有楊青山者，隨安一援鳳凰山戰死。楊年三十八。

余濟村曰：三呼殺賊，與三呼渡河之心何異？此其所以爲烈士也。夫牛頭山者，去城不百步，俯瞰城中，賊所必爭之地。山破則城破，安一之功大矣。三臺學博羅君偉臣，有上崇督憲一書，大情言牛頭山逼近城西，山高城矮，賊易窺擊，雖有鄉團堵禦，實形單弱。嗣聞陳祥興帶兵馳赴城外，殺退賊衆，站踞牛頭山，旣得形勝，人心稍定，似保潼之功，專歸於陳。而王少卿尊聞錄似又歸功於建中營。光緒乙酉秋，余馳往潼城，爲三臺學博李君小燕治病，寓潼數日，暇游東山琴泉，觀雷轟鐵塔，訪求唐人王鱣祥所書妙勝蓮花經，父老爲余指鳳凰山戰事處，碧草青燐，不知埋沒許多忠魂義骨，望之令人感慨噓歎，不能自己。今將尊聞錄所載節錄於後，亦守土者所宜留意焉。

附錄王少卿明府尊聞錄一節

予守中江，退賊後，因稟募建中營，奉大府案准，卽專留此軍保衛川北，因以五百



人爲一營、初成三營、終日操練、予以守城專重鎗礮、熟演金鼓進退之法、必使眼尖手快、純熟而後已、其時、賊圍潼川、奉大府檄、以賊入川、向未攻破府城、該員既隸在府屬、如能力保潼郡、論功當在諸將上、倘潼郡不守、該員當同干重律也、因思潼之存亡、以牛頭山得失爲存亡、先時卽諭派李縣丞永恆、帶勇五百人、往守牛頭山、臨行戒之曰、牛頭山緊靠城門、山後可無過憂、專顧山前、賊來然火以待、賊去勿下山道、能守足矣、我勇紮山二日、賊果大至、初到卽攻此山、不利、復計圖賄誘、皆不得售其術、忽賊呂公車、攻山急切、凡破呂公車、俟其將近、對車門以火箭射入、車與人全燒、我營得法、大破賊車、賊知是山不可攻、卽是城不可攻矣、遂撤圍去、李以是功晉大令。

龍劉二團勇

龍占雲、漢州三水關人、應募團丁、蕞逆犯境、隨五福大團團首劉清宇勦賊、咸豐辛酉、應候補道宣鹿公調、進勦彰邑通山會匪、占雲奮勇當先、陣陷、爲賊所殺、賊忌其

勇、割首去、

劉占洪、占雲同里人、逆犯境、食勇糧、隨五福大團、應先鹿公調解、綿州圍、占洪先登、礮斃賊首四人、賊敗、直衝賊穴、殺斃多人、賊援至、我軍稍卻、占洪乃執礮殿後、賊尾之、返戈力戰而亡、

余濟村曰、咸豐時、滇匪擾蜀、惟廣漢鄉團甲於諸郡、與賊相持、屢有捷獲、然其中有老人童子、被賊戕害可慘之甚者、十年九月、賊犯漢境、如廖桂喜、黃沐榮、均四歲、拋入水死、張懋崇、令狐開益、令狐開俊、何子建、均七十餘歲、被殺、令狐開亭、令狐開信、令狐元炳、唐紹楮、韓明富、劉金元、黃永裕、黃永志、黃朝用、卿啓祿、韓明士、均十餘歲、同在畫壁山陣亡、合十一年三月十一日陣亡團勇、不下數百餘人、嗟夫、若而人者、生未膺尺寸之榮、沒難邀蔭卹之典、白楊芳草、燐已成紅、黑塞青林、冤仍莫白、纍纍大塚中、不知許多忠義骸骨、安得一一而盡書之哉、

光緒辛丑季夏 家君在雲吟學署、排纂此書、稍加刪節、以便付梓、夜間於燈下

校閱至龍劉二團勇傳後、意欲削去附錄、可難諸人、方拈管時、忽來冷風吹滅燈火、其時夜已三鼓、星月在戶、窗櫺俱閉、何有風來、豈非冥冥中亦有相之者耶、家君於是遂仍其舊而備錄之、男訪羅注

### 陳博士

陳博士諱傳、安縣人、錦堂先生長公子、初錦翁家貧甚、教授鄉里、以養親讀書爲事、敦倫好善、士人重之、年六十、始膺鄉薦、主講益昌書院、邑令傳慕其品、與聯姻好、嘗問政事、公取其便於民者告之、有戚某訟事、受屈求伸、許金洩關說、公拒之甚嚴、陰使人善治之、滇賊之亂、犯安境、執公索銀、以刃脅公、公曰、窮士何銀、殺則殺耳、繼配黃伏地代哀、公斥之、賊乃斷公鬚、忽金光一掣、卽斂手去、公亦不知其所以然也、公遂偕孫避於田氏庄、賊內有知公者、遺之米肉、公悉以予人、田亦義形於色、不屑食也、時長子傳、以廩生率義勇勦賊、賊敗死之、子逢春殉焉、朝命入祀昭忠祠、孫運隆、運昌、皆文生、運昌襲雲騎尉、

余濟村曰、君子之居鄉也、爲閭里所矜式、爲子弟所樂從、由是望氣者、驚爲賢人之聚、聞風者、爭以識面爲榮矣、如陳翁者、有司慕其賢、鬼神欽其德、盜賊重其名、含光醇德、爲士作程、其今之陳太邱乎、克家之有令子也、宜哉、

劉大刀 王忠義附

中江劉先固、劉開駟族子也、偉軀幹、能左右射、善使大刀、咸豐辛酉、從軍援眉州、時主兵者明參戎耀光、將以戰爲守、五月初六日、與賊交戰、官兵小敗、先固以大刀斷後繩、踣見獲、賊愛其勇、欲降之、先固曰、汝亦聞有大刀劉而貪生者乎、遂見殺、年二十、同時有王忠義者、亦中江人、從軍援眉、五月初六日之敗、官軍登時收隊、諜知營壘、願津者、賊之中堅也、忠義約同軍夜斫賊營、賊驚擾逾時、執忠義而斃之、自是賊有分竄之志、

陳煙客

煙客陳廣益、住會理州城外火廠壩、賣煙爲業、庚申滇匪攻城陷、廣益率家逃新橋

村、明年辛酉五月二十三日、賊犯境、被殺、年七十三、妻李氏、次日撲三元橋河死、女亦隨之、子二、朝相、俱業儒、

### 唐傘匠

傘匠唐姓、不知何許人、亦不著其名字、流寓會理州迷易、家數口皆業傘、素談髮逆狀甚悉、繼聞賊至、歎曰、吾受此賊害深矣、向以迷易險僻、故避居此、今賊又至、意者其命耶、倘遇賊被擒、則死晚矣、遂與妻子投河死、

### 王井紳

王國學余垞、富順鹽井紳士、咸豐庚申九月、賊陷榮昌、永川、逆黨何興順、以萬餘人逼富順、隔河施礮、向城飛擊、瓦屋皆鏗然有聲、九月下旬、分擾各處之賊、皆嘯聚牛腹渡、衆號二十萬、四鄉焚掠、搜竹木梯百餘架、將攻富順城、知縣彭公名湜、遣團練由北路古佛坎、乘夜奪梯回、明年辛酉正月、楚軍常與賊接仗、三月、賊復四面分竄、六月、周逆攻井地大安堡、井紳王余照、同余垞等、督團練擊卻之、賊徧塞鹽井、盡焚

天車車房、余陀追賊、沒於陣、未幾四路團練畢集、賊乃自西而南、沿井河擾鄧井關而逸。

### 銅鑼寨四寨主

彭水縣銅鑼寨寨主四人、監生蘇森然、陳元柏、李維友、李正鳳也。咸豐十一年八月、髮逆竄縣境、森然等率團拒賊於郁鎮銅鑼寨、運負土石築堡守險、扼賊來路。十三日巳刻、賊衆蜂集團攻、森然等督同團民擲石放鎗、奮呼擊賊、斃賊多人、惡氣稍遏、未刻、大股鬻至、悉力仰攻、層層而上、肉薄相逼、寨破、四人各受數十鎗、力竭戰死、團民陶令澤等三十人陣亡。事聞、分別旌卹。

### 彭縣義士

文生劉君諱楨、彭縣錦田里團總、咸豐十一年八月二十八日、藍逆由縣州竄什邡、五珠池、君奉縣札督團、由紅岩子進勦、臨白虎頭山截擊、衆潰、君力戰不退、賊斫其首、剖腹焚屍。事聞、卹典如例。

彭縣舉人劉君諱世敏、仁風里團總、咸豐十一年十一月十七日、藍逆由丹稜敗竄濠陽、君倉卒集團、扼金鳳橋禦賊、賊前隊死戰、後隊抄圍、衆欲護君走、君怒叱之、賊逼衆潰、公獨橫劍罵賊、賊攢殺之、割其首以去、越二日團衆獲逸賊、訊得棄首處、取之、面如生、縫合以葬。

吳君萬銀、彭縣永定里人、身長大有膽力、藍逆將入境、萬銀磨利刃以須、且與兄弟約曰、賊奴塗炭生民、所向蹂躪、由無禦鬪者耳、吾弟兄當戮力同心以擊之、兄弟聞之、咸懼其禍家、共縛之、置暗室中、未幾賊果至、萬銀脫縛、頭戴木升、持挺擊賊、被殺、同里有宋童子者、遇賊持刀奮鬪、斃三人、賊衆圍殺之、弱弟二人、見兄被殺、俱投水死。

隆昌辛酉義士

何慶楨帶團禦賊、咸豐辛酉、何逆竄大筆塘、楨身先團衆殺賊、被擒不屈、賊縛於樹、寸磔之、同時陳金聯、陳金陞、俞三喜、共二十餘人、均鬪死。

劉昭明、驪子灘人、辛酉隨團衆禦賊板板橋、被擒、誘降不屈、罵不絕口、賊斷其首、以屍倒插泥中、

馬祖恩、北鄉人、年四十八、辛酉九月、賊至黃家場、圍團往禦、祖恩留營經紀錢米、衆潰、賊衝逐之、祖恩感國軍乏用、重負奔走、爲賊所獲、剖心抽腸而死、賊退收屍時、諸簿記猶在懷中、

謝文聰、太平鋪人、辛酉九月、因姪某投賊、聰捕而活埋之、賊聞其事、率衆縛聰至巢、聰罵曰、吾寧死爲清白民、不肯生爲害人賊、賊磔殺之、後其子章洪等、圖報父仇、奮勇殺賊有功、給予六品軍功、

彭裕綸、黃家場人、年二十九、膽氣過人、辛酉九月、賊至觀音巖、諸團出堵、以行營重件屬綸、賊突衝前進、蟻附而上、已入營壘、綸厲色叱之、賊縛至牛腹渡、逼降不屈、殺之、

雷正星、黃家場人、年六十、素性忠誠、行爲不苟、辛酉九月、賊入境、圍團迎擊、正星留



營造飯、衆潰、賊衝追、正星負餽奔、其姪某請棄之、星曰、食、衆所賴也、無餽何以食、無食何以力戰、賊追殺之、收屍時、餽猶負身、

張監生崇德、爲響石山團首、辛酉秋、率子樹華、擊賊於標子、搥堅搗銳、轉戰不塌、連勝老賊二人、戰久失脚、爲賊所乘、被害、樹華急奔父難、斃賊甚衆、力竭亦被害、鍾茂才名超、爲東鄉團首、咸豐辛酉、帶練勇紮核桃壩、堵賊、被執不屈、擊殺之、

余澹村曰、滇逆擾隆昌時、李太學成寅家、男女死難者共十六人、吳太學斌家、男女死難者共八人、其餘則書不勝書矣、時有李君蓮父者、其父湖北人、因幕游、遂家於隆、性風雅、工吟咏、著有嚼雲吟草、李西澗太史極賞之、滇逆之亂、自滇旋隆、聞輿者云、賊至矣、君曰、汝等且去、吾止此、俄聞賊呵叱聲、出與拱揖曰、吾目瞽、素不相識、輿中衣囊可持去、勿以菲薄爲嫌、惟詩稿一卷、君無用、幸擲留也、賊共笑曰、是老酸也、不顧而去、後以無子易道裝、自號三三道士、卒時自撰墓聯云、空留死後詩千首、不放生前酒一杯、亦亂世之奇人也、

陳羅二生

陳君濟光、南部監生，素有膽識，爲鄉團首，訓練有方。咸豐辛酉，藍逆遺彭僞統領，擾縣屬之小元山。濟光帶團堵禦，奮不顧身，殺賊甚衆，力竭被擒，賊縛之，受酷刑死。同時庠生羅炯，偕兄心田，避賊於宇家寨，寨破被擒，不屈，兄弟俱遇害。

余澹村曰：辛酉之亂，南部士民多聯團築砦，爲堅壁清野之謀。如清平寨、宇家寨、達摩寨、富村驛、黃連埡、趙柏埡、小元山，先後均爲賊破，鬪死者約有六七千人，嗚呼烈矣。

吳毛二團總

吳宗榮、樂山人，充西門團正。咸豐辛酉，滇逆警至，宗榮帶團禦賊羅光山，戰不利，亦傷及首，罵賊死之。同時毛煉斌，亦帶團勇堵截山下，與賊格鬪，手刃二賊，賊憤甚，協力殺之。

劉文童

劉中煥、興文縣文章、代胞伯吉昌治團事、咸豐辛酉冬、張逆竄炭廠場、中煥督團往拒、賊敗退、天忽大霧、賊復乘霧圍攻、中煥獨當一面、格殺三賊、竟被擒、鬻割而死、事聞、增祀石孝廉祠。

### 中江義士

張時富、世居中江縣牛場、咸豐辛酉冬十一月二十八日、滇匪竄縣北、斜趨迴龍場宿焉、翌日黎明、自迴龍場渡河下牛場、將由羅板橋犯太和鎮、是時學使者按臨方畢、不虞有是賊、寨居者遷還家、幾一年牛場忽聞賊來、衆無所措、時富獨執槍立於場外、洞一賊胸、旋斃、餘賊共執時富殺之、賊因是畏場內有人、卽時遠竄。

林君道麟、中江鄉賢青山先生之曾孫也、年七十餘、方領矩步、以五經教授鄉里、從游恆數十人、賊之宿迴龍場也、經其精廬、弟子奔散、林不及避、出見賊目而不爲屈、賊矜禮之曰、吾營中亦正須前輩以率羣小耳、林不欲行、賊中之少黠者、以槊揮之曰、先生年已老、曷不任彼歸乎、林應手而倒、蓋賊以殺人爲遣歸也、賊目不憚者移

時、

呂君振冷、中江人、父兄皆爲儒林祭酒、振冷獨好武、宿迴龍場之賊、亭午經馬鞍山寨下、衆饑求食、振冷獨輕之曰、敗亡小醜、易與斗、不與食、而以一礮相遺、賊旗一揮、賊衆四集、寨人立潰、振冷猶當門撐拒、受傷乃仆、

中江農人冷逢春、咸豐辛酉冬、聞賊且至、入蕭姓洞以避賊、用藥煙熏灼、衆不能堪、仍出從賊、逢春獨不出、甘悶憊其中以死、

余澣村曰、光緒戊戌歲、中江明府陽湖趙達泉先生、招余襄校試卷、暇日偕幕友陳君小帆、丁君文卿、游萬柳溪、登元武山、觀石刻吳道子所畫真武像、并訪唐人王子安聖泉宴處、因得備采咸豐時殉難諸君子而彙錄之、善夫、中江志續編右言曰、大人先生、身名俱泰、而一家八口、咸被美譽、至於幽閨孀弱、部屋齊民、勤一世以薪望、名末簡而不可得、然則探幽隱以平民氣、非立事立言者之與有責哉、謹按彭氏蜀碧一書、記明末獻逆之亂頗詳、而中江僅附見長祥記一條、至被賊

年月死難姓名並無紀錄。由見聞有詳略故也。余此次親至其地。故於咸豐庚辛間殉難者收采較多。惜乎拜鵬山人聞見實錄。紀明末蜀亂事實。不能與費氏荒書。歐陽氏遺書。並存於世。使其書尙存。未必中江遂寥寥若是。此又傳與不傳之分也。可慨已。

### 何克強

何克強中江人。咸豐辛酉季冬。謝寡婦逆黨。爲官軍追勦。敗走中邑龍泉場。有賊數十來。克強家索糶。強乃變人子。個人茅舍栖身。本無餘積。賊欲入室擄掠。強當門而立。手執柴斧揮霍。賊見其武健絕倫。望不敢卽。遙謂速供軍餉。如不應。大隊紛來。立見身成醬粉。強厲聲曰。鼠輩多言。聞天兵旦夕至此。恐逆黨無噍類矣。賊怒。以火焚廬。強卒不出。焚死後。屍立不僵。色如煤炭云。

余澹村曰。按中江縣志續編。亦載此事。大略相同。惟克強作克長。大抵因字之聲韻相近而偶誤耳。

劉文學

劉君簡州人，諱鳳圖，少讀書，穎悟過人，弱冠補弟子員，好孫吳兵法，每讀史遇敘述兵事處，輒反覆詳求，所以勝敗之故，及當日輿地之學，因成兵鏡輯略一書。咸豐辛酉，李藍二逆蹂躪，各屬騷然，君首倡團練，號令嚴明，爲鄉勇冠，里中賴以安謐。壬戌三月，流勇乘機煽亂，君率勇禦賊於新簡接壤處，賊隨竄簡州黃土場，各鄉團相與聚謀，君建議曰：「今賊氣雖盛，脅從半良懦，乘其未集，可一戰破也。若避其鋒，是示賊以弱也。」聞者壯君謀，君分其勇爲三，自率所部出中路，繞出賊前，據險而陣，賊蜂聚來犯，戰方酣，左右兩路鎗礮轟擊，衝賊陣爲兩，賊敗遁，是役也。君以鄉勇數百，敗賊數千，斃賊黨百餘人，君勇負傷者七八人而已，聲威由是大震，羣賊憚之，隨遣悍酋二人賈君書，乞限三日撤去，弗許。時共事各團總，皆意與君違，君恚甚，翼日獨率所部趨賊，意速其去，賊易君勇少，出大隊抄擊，君知衆寡不敵，揮大刀怒馬馳驟，戰甫合，刀折而賊矛已貫君股矣，遂墜馬死。左右與難者十餘人，賊去，家人得君屍，喪其

元、以麵省公貌殯焉。後數日、鄉人得君首於醬甌中、易棺葬之、事平、合請於朝、賜卹有加。

曾秋坪曰。劉君。余祖舅林公之姻黨也。總角時。余游宋家廟。廟左則劉公木主在焉。因得詢悉死難大略。當時黃土西河各場。設無劉君。蹂躪不可問。君沒不逾日。賊即撤營去。則君之餘威。固有以怵其膽而奪其魄矣。獨惜共事諸君。不能一心戮力。以捍護家國。吁。可慨已。

#### 田潘二商

田起秀。陝西高陵人。商於蜀之敘永廳。同治元年四月十六日。髮逆石達開攻破廳城。起秀陷賊被縛。脅降不允。復大罵。賊怒。捱矛刺數十傷。猶罵不絕口。遂遇害。同時有渭南縣商人潘興讓。亦被賊擄。仍罵賊被害。有陷賊逃出者。自言親見其事。

#### 鄭陳二管帶

鄭君文順。隆昌胡家寺人。鳳凰山團管帶。壬戌三月。漢匪何逆入境。順帶團奮勇爭

先殺賊、戰於江家壩、力竭被執、不屈、賊斷首裂屍、剖心抽腸、後五日、覓其頭以歸、面色如生、

陳君能聰、隆昌嚮石山團管帶、貌魁梧、饒技勇、每臨陣必奮勇爭先、擒斬甚多、壬戌、率衆攻賊於天洋坪、已破賊柵、賊披靡、突有流礮中聰脅死、衆咸惜之、

### 興文義士

薛鳴岡、興文保正崇禮之子、隨父辦團、同治壬戌、張逆屯梅洞、鳴岡督團往堵、賊大隊至、衆驚潰、鳴岡殿其後、衆寡不敵、被擒、不屈死、

楊君映樑、興文庠生、性孝友、娶任氏、生四子、同治元年四月、張何兩賊犯境、諸子皆爲賊擄、映樑夫婦被執、不屈、禁錮之、不食死、逾七日、諸子逃歸、啓視、面如生、鄰里咸悼異之、同時有武生夏象基者、遇二賊於途、奮力擊之、賊不能勝、將遁、後一賊發火鎗中其足、斃割而死、

陳君廷銓、興文文生、孝友篤誠、不苟言笑、工書法、家貧、訓徒自給、同治壬戌仲夏、張



逆犯境被擄、令降不從、數日不食、賊爲之動、忿而卒、事聞、增祀石公祠。

興文文童、謝君安貞、同治元年五月、張逆入境、安貞被擄、脅降大罵不從、被殺、同時有文童謝正倫者、張逆至被擒、罵賊不屈死之、其妻王氏聞之、亦哀憤而卒。

張思義、建武營字識、當賊至時、官紳兵民四散、思義獨立營、誓毅然曰、吾家三代入伍、世受國恩、此正吾報效時也、厲聲罵賊、賊剖殺。

龐光佑、興文貢生大品子、年十二、能誦五經四書、又嫻習武藝、從衆堵賊、壬戌五月、髮逆至被擒、令降不從、殺之、黃家壩、同時武庫蕭駿邦、軍功趙綯、亦被擒、並殺之。

余濟村曰、龐光佑十二歲童子、能從衆堵賊、爲賊所禽、不降、甘蹈白刃而不恤、可謂能執干戈以衛社稷矣。比之汪疇、有過之無不及焉。雖欲勿書、烏得而勿書。然此十數人者、均不與草木同腐矣。

### 樊孝廉

樊公諱包、字鐵瀟、名山人、幼英敏、讀書日數行、下年十三、入邑庠、咸豐戊午舉於鄉。

性好武、工技擊、貌豐而巨目、每談兵、則娓娓不倦、思以功名自奮、粵寇興、武備廢弛、君有隱憂焉、嘗集子弟部署營伍、教以戰陣之事、時蜀方承平、鄉人非笑之、君曰、是非君輩所知、己未、李藍煽亂、公練團里中、常破數萬賊、大小數十戰、功最多、鄉邑倚爲重、大吏未之知也、會宮保賂公督蜀、聞君敢戰、檄募勇勦賊、公以千人赴召、軍至簡州、卒有取民蔬者、立斬以徇、一軍肅然、時賊擾宜賓之八卦寨、公直搗其巢、賊逆戰、大破之、殺賊數百、越二日復攻之、遇伏、公躍馬殺二賊、賊披靡已而圍復合、賊矛刺君股墜地、君瞋目疾聲呼殺賊、賊亂斫其首、遂死之、部卒死者十七人、同治元年五月十五日也、宮保以狀聞、天子篤念死事、詔贈卹有加、

劉庸夫曰、余聞李西澗宮贊曰、樊鐵墉固文而武者也、公讀余古文、急見余、與論時事、目光灼灼射人、咆哮大呼、如不欲生、余灑然異之、及捧檄治軍、余作書論營制甚悉、次日公遙見余輒踞曰、謹受教、余固知其能軍、詎料其前挫凶鋒、竟身先賊死哉、嗟乎、君治軍千人、未及三月、遽以身殉、以視今之擁節旄、握重兵、至數年

之久日糜餉糈。養賊自重。曾不以公家事爲其事。死生榮辱。爲何如也。人亦有言。士爲知己死。宮保於是能得士矣。

富順志略云。同治壬戌五月。名山舉人樊包。率團過富順。由花鼓場仰攻之。歿於陣。先是春間李逆自鐵山八角寨。分支過青桐林。官兵襲破之。賊盡棄輜重。尙擁萬餘人。四月中旬。李逆乘隙遁回八角寨。賊夥謝花妖等。擾涪州。被官兵圍練。殲之。鶴遊坪。餘賊亦先後就戮。秋間。八角寨賊竄龍孔場。官兵躡追。四面圍練。星羅棋布。圍之數重。賊連日衝突不能出。是時布政使劉蓉亦至軍。李永利投誠被擒。餘賊數千人盡誅之。械李逆至成都。訊斬之。滇匪李股平。

### 馬立堂

廣元馬生立堂。富於貲。年甫弱冠。入文庠。父迎龍。聞滇逆猖獗。預掘石洞避亂。壬戌冬。賊目曹統領。謝金蓮。犯保寧。欲渡河。彭汎同縣佐某。帶鄉勇數百。沿河防禦。賊至不得渡。僞作軍士。稱某官前隊。隔岸呼舟子甚急。彭不答。賊乃造筏逕渡。守河者膽

落潰走、賊乘此紛紛共濟、戕分縣官於龍門、彭亦死之、賊至乾溪、馬生里居也、知其巨富、圍石洞以火攻之、洞破、一家老穉被掠、迫生入營、尊爲幕賓、是時逆黨肆行、裹脅、約有十萬餘衆、旋至望倉壩、附近黃家砦多富戶、蓄積饒裕、賊僞作鄉人狀混入砦堡、劫奪燒殺、死者無算、婦女被掠者甚多、中有一女、姓祝名雲英、色麗知書、亦被掠、曹逆見女端好、即以妻生、蓋欲其戀新婚而忘去志也、是夕女謂生曰、妾舉家煨燼、僅留殘軀、苟合從君、惟有一死、生曰、卿欲全節、我豈貪生、憶自被俘以來、日欲求死、其所以不卽死者、父母靡得贖依、妻弟未知存亡、故欲苟延殘喘耳、昨聞營中言二親遇害、妻被賊污、已矣無復望也、今願與卿同死、見二親於黃泉、乃題詩於襟、有漫傷時命擲掄鬼、同是天涯淪落人之句、吟畢相向而泣、更闌漏盡、皆刎頸死、曹逆檢二屍厚葬、詩傳營中、未幾賊移營走全灣、王教習帶鄉勇截殺、賊懼尋走木門陰陽河、復爲官軍所敗、遂奔儀隴去川矣、

夾江殉難義士

咸豐辛酉、至同治壬戌間、滇匪分股竄夾江境、武生幹時魁、督團勇禦於新場、戰死、武生周衛清、戰於獅子橋、陣亡、同時有鄭文運者、平時住縣城內察院街、削竹箸爲業、投充團勇、禦賊出力、賞給八品軍功、隨周衛清在獅子橋殉難、其防堵新場陣亡者、劉萬盈、彭士賢、彭士鈺、王起星、周之禎、戴大興、張元魁、龔桂春、幹閏喜、幹榮開、王大有、王有成、張洪順、張萬喜、邱永仲、楊萬忠、呂元章也、其防堵甘江場陣亡者、江永和、劉文玉、文金全、彭國永、江汝倫、宿占魁也、其防堵金井壩陣亡者、史君富、鄭興倫、黃宗喜、羅世貴、江開成也、其防堵界牌陣亡者、幹貴先、黃錦春、張國材、朱占魁、彭士裕、劉海峯、幹仁富、萬占先、龔治斌、徐朝連、萬家全、江元順、薛居俸、蕭明魁、翟盈貴、劉嘉春、楊枝秀、江永林、朱萬先、曾啓容、江耀龍、楊玉高、文金鈐、楊萬鍾、宿占奎、徐朝位、羅奇叫、蔡萬喜、黃錦容、黃步雲、宋占貴也、其防堵馬家場陣亡者、胡應尊、胡貴朝、胡貴乾也、其防堵童廟子、鐵甲廟、葉家山、馬冲口、石面渡陣亡者、葛慶志、黎心田、葉大朋、楊積玉、雷馨和、鄭萬瑤也、其防堵劉家場、東路河田堰陣亡者、杜永瓊、李鎰廷、李

德謙、車崇榮、沈萬元、費世錫、田康字、周錫甫也。以上咸其防堵土龍冲陣亡者、李先

萬、萬奇祥、李良仲、李仲良、梅朝福也。同治 壬戌

余澣村曰、咸豐末年。羣盜半天下。有能掉三寸舌。諭降千百悍賊者。誠匪易事也。

辛酉十一年。滇匪分段段偽統領啓閑率千餘人犯夾境。盤踞離城二十里之甘

江場。烽火相望。縣城危在旦夕。縣大夫楊公塏、玉泉乃能匹馬摩賊壘。招撫諭降。

賊皆投戈伏地羅拜。公始下令曰。汝等悉願投誠。各解甲移駐近城之壁山廟聽

候區處。羣賊唯唯從命。於是酌予資糧。分給路牒旬日之間。遣散盡淨。惟段酋願

為夾氓。其時大兵之後。骸骨暴野。邑紳王公起焜春山。捐金掩埋。縣君楊公善治

軍。常親冒矢石當賊衝。此次招降。又單騎見賊。故當時婦孺均稱之為楊膽大云。

此書開彫後。有沈香圃者。踵署求醫。自言家藏有夾江紀亂一小冊。係關中趙維

仁寓夾時。值寇亂所著。刊刻成本。紙皆霉蛀。余借閱之。紀中皆言庚申閏三月八

月兵事。盛稱楊縣君保城功。及當時因果事。又言夾人有自賊逃出者云。八月破

丹稜後。竄夾境藍二哥坐的綠轎子。後一乘是丁大嫂。年三十許。前後有騎馬穿龍衣者。直抵迎春樓攻城。衆見城樓脊上有兩條黃牛。賊中諺虎爲牛紅霧沉沉中。老鷹旂飄起。楊公坐游揀的兄弟不少。賊中諺死爲揀是夜遁走云云。惜是編已成。不能增入。因於夾江義士後。刪節附錄而略補之。

### 黃文學

黃公諱以宣、字魯齋、夾江人。幼讀書、有智略。道光十三年、黃學使按臨科考、補博士弟子員。咸豐十年三月、藍逆犯境、公奉縣札辦團練堵賊、同團首貢生李焜、生擒偽隊長周洪順、送縣正法。十一年十一月、李逆分股段僑統領、竄踞縣屬之甘江場、公同團首孫廷發等截勦。十四日、與賊戰於場外、公左臂受矛傷、團勇奮殺、賊氣奪、退入場、公整隊回營。次日、公裹創匹馬入賊壘、諭令投誠、賊感公言、允降。歸報縣君楊公玉泉、復遣紳往說、賊堅志請降。楊公乃單騎見賊、解散黨羽數千人。縣君上公功、得五品軍功。復以訓導、保薦。十二月二十四日、因傷殞命。制府崇公樸山、奏請議卹。

奉旨給雲騎尉世職世襲恩騎尉罔替。

余濟村曰。吾聞夾江縣君楊公玉泉。能治軍。多智謀。當賊近縣城時。守陣者譁然不能禁。公諭之曰。聞賊攻城有煙藥。入鼻受毒即死。惟人人口含酸梅子二枚。可預避之。語畢。各給酸梅二。舍入口中。一時皆寂默。賊夜探城中虛實。見城人皆僵立無語。異常靜鎮。遂畏不敢攻。而勦降一事。解散多人。爲此次軍興所僅見。楊公之功。不在殉難者下。此書編刻將成。黃文學孫炳奎。始持狀來謁。乃次其節略而補錄之。

### 琪縣十二團首

咸豐辛酉。至同治癸亥間。琪縣土匪何金龍。及髮逆石達開。疊次竄擾縣境。其陣亡團首。如貢生屈盛洲。文生劉子玉。唐立賢。屈昌榮。武生汪鳴崑。汪鳴開。唐占鰲。監生屈昌時。軍功徐萬鉉。范興武。鄧文魁。學攢皮勳。共十二人。其陣亡團丁。共四百八十六人。其遇賊殉難紳士庶民。共二百零六人。殉節婦女。共三百二十九人。邑令姚公



作霖造報制府奏聞奉旨准入忠義節烈祠春秋致祭

余澹村曰。珙縣本古西南夷地。號曰蠻國。後爲夜郎屬地。漢武時取夜郎。始置南廣縣於此。至明洪武初始改爲珙縣。

國朝因之。以爲敘屬。距京師六千二百餘里。距成都省城二千四百餘里。僻小之地。與土府爲鄰。而生其間者。咸知親上死長。至數百人之多。有較他邑而更甚者。非聖朝仁政覃敷。安能如是之盛歟。時李貢生步璋參辦城防局。有口占律詩。末四句云。幾處諸兵星火急。千家避難井田荒。重門緊閉嚴魚鑰。戍鼓聲聲斷夕陽。其人民之流離轉徙可知矣。又有李文學仙蓼者。當賊攻城時。日夜防守。危城獲安。積勞成疾而卒。衆共悼之。按敘府新志云。咸豐十一年冬。南溪張四黃地。正洲何金瀧。吳家壩。蕭廣德。糾合滇匪戚維新等萬餘人。盤踞高縣之沐愛。正洲。圍長寧。破建武。擾安寧。橋。趨珙縣。復回正洲老巢。時張四黃地與何蕭二逆分股。二逆知無能爲。遂受招撫。張逆竄黔。誘石達開入境。遂於同治元年五月十六日陷長

寧。僞將李宰輔紮巡檢場。是年十月。遂開由滇之鎮雄。竄入筠連。二十八日。高縣知縣丁良俊。出禦死之。遂陷高縣。時何蕭二逆。雖受招撫。其黨羽在正洲。沐柔。吳家壩。時害良民。癸亥二年。胡軍門中相。移楚師分紮筠高各路。八月。按誅蕭廣德。而何金瀧恃正洲洞險。負隅不出。間往安尾壩。會合滇匪。十一月。檄楚營搜勦金子溝佛龕。各洞。金瀧遁去。獲其家屬。黨羽正法。境內遂安。

### 僧壬癸

高縣禹王廟僧壬癸。性警敏。咸豐九年。李藍寇警。禹廟在縣城內。地宏敞。縣紳設防堵局於廟中。李逆陷城後。逼令僧指尋軍火器械。僧恐賊得火藥。重爲民害。乃私藏火於袖中。引賊至藥局。燃之。傷賊三人。僧亦燂死。

### 巫山道士

咸豐庚申。張逆竄蓬邑河邊場。有一道人。衣飄鶴羽。帽結熊鬚。扶藜杖行。賊掠見。張酋。道士傲不爲禮。張詢以修煉之所。答云。巫山。張責之曰。爾游手廢業。天地贅疣。今

若投誠宥汝一死、道士云、吾伴隨渠鶴、逍遙雲水、塵緣久絕、刀鋸不驚、張色稍霽、又問爾知生死成敗否、試言吾今日起事、何時成事、道士云、譬諸幕燕釜魚、生亦不久、安能成事、何不解散、吾從、隨我隱遁、雖不飛昇、亦可延年、切勿倒行逆天也、張怒曰、爾知爾之壽算乎、曰知之、吾數止今日耳、張曰、今不汝殺、將令爾言不驗、旁一隊長、踴請於張曰、此左道也、留之恐箠惑軍心、道士凝眸視之曰、爾遲吾明日、亦難免也、賊怒揮刀斫之、顛落無血、祇見一道青煙、沖霄而上、次日張逆督衆攻寨、忽寨上放劈山大礮、中隊長頭顛死、賊遂收隊向川東而去、

許寅谷曰、道士酷似左慈、

從鶴道人

道人名從鶴、高縣吳家場萬壽宮人、素嫻武藝、方願大類、高談傾坐、聲震瓦屋、人皆敬憚之、咸豐十年、蠻匪入場、殺人如刈草、一時居民盡避廟中、從鶴領壯士十餘人、出村野間收瘞遺骸、遇匪於途、互相格鬪、斃匪多名、力竭受傷死、匪恐廟中伏有精

壯遂去、居民獲全、

遂寧和尚

遂寧廣德寺僧坦然、名貞靜、成都文殊院戒子也、幼嗜武、咸豐辛酉、藍逆圍遂寧、當事者廉知其人、延致守陴、與賊相持六十餘日、賊用地雷轟城數丈、蟻擁進攻、守者無措、多失人色、坦然率其徒雲菴諸人、併力堵擊、賊屍填城濠、坦然亦受礮傷、賊退、或曰、賊中見城上不知許多僧人也、或曰、廣德寺普門大士顯靈也、當道以僧綱司都綱官坦然、因應、後因傷發圓寂、雪堂僧遂寧歌、其畧云、藍逆攻城城已傾、城中雞犬相次驚、守陴膽落失人色、此時誰復能攬城、坦然一怒戒刀吼、賊乃枕藉填濠平、本來菩薩慈悲面、幻作金剛怒目漢、不忍坐視生民災、手拖禪杖一酣戰、蓋紀實也、余濟村曰、浮屠氏之學有爲而爲、與不得已而爲、皆非也、施絕大神力、救無量衆生、放下屠刀、立地成佛、如坦然而者、其庶幾乎。

義勇僧 二則

隆昌天峯寺僧、多贊揚者、幼嫻武藝、長入空門、平居禪榻、茶煙蒲團入定、聞有不平事、輒怒發衝冠、精悍之氣、現於眉宇、咸豐辛酉、滇匪竄響石山、贊揚手提月斧、率衆大呼入賊陣、揮運風生、五花八門、所嚮無敵、截首級二、拋擲空中、墮地有聲、挺身復鬪、冒入重圍、被殺。

定遠圓山寺、一名獅峯岩、明萬曆時建廟於上、咸豐十一年五月、賊目彭紹福、率黨千餘人、搶渡河東、經黃統帥純熙、大破賊於東岸、賊竄二郎場、與朱逆合股、故河東得免於難、是年十月初二日、郭逆率衆數萬、由管家渡過江、初十日、營樂善場、場外二砦、一日圓山寺、賊於十五日午後、以火攻破山砦、寺僧應果、率其徒登彼岸、與賊鬪於寺門、皆死。

僧昌榮 三林郭聯陞附

僧昌榮者、興文縣武廟往持也、年九十、性直體健、同治壬戌夏、髮逆竄入廟中、欲毀聖像、昌榮力阻不可、賊怒殺之、其徒三林、年七十矣、見師被殺、太誓、賊又殺之、賊退。

後邑令郭公得其情實，命首事爲僧建碑，以昭志節。時有守倉廩之郭聯陞，賊至，斥令開倉，弗許，賊怒，去其兩耳，又弗許，與僧同被殺。

余濟村曰：興文爲敘府屬邑，士樸民純。雖方外之人，臨難亦不求苟免，烈矣哉。然興文雖遭塗炭，猶敘屬之小邑耳。自咸豐九年九月，滇匪入川，連陷慶筠高三縣，進窺敘城。賴徐都戎崑山督辦城防，動中機宜，城賴以完。按都戎諱璋，雷波廳黃鵠人。時任敘馬營都司，當賊逼城時，公布置嚴密，屢攻不下，乃賄通禁犯百餘人爲內應，乘夜放火奪門。公立時督兵擒斬數十人，并搜其黨，駢戮之。羣賊氣奪，十一月十四日夜遁青山，凡五十餘日，城圍始解。敘人以此益賢公。於郡城西豎坊，以表其功焉。此事余聞諸郭君玉珊云。

鄭萬堯

鄭君萬堯，夾江人，有膽力，咸豐十年，滇逆擾蜀，縣屬文生張君世臣整練鄉兵，同教職張玉成、知縣張履龍、舉人蓋洪璋、監生王載道、宋百齡等共事，籌辦防堵，萬堯充

南安團勇目、未幾賊由丹陵竄雅州、道憲飛調南安團守飛仙關、張君玉成帶勇五百、馳赴保關、甫抵關、賊即來攻、玉成與戰、身受礮傷、團勇奮力嚴守、賊攻不克、繼謀知賊衆由雅下、犯世臣、親督團勇防縣屬之石面渡、分咐沿岸船筏、依營停泊聽用、賊於三月二十三日抵三寶場、聞石面渡防嚴、逗留兩日不能渡、賊乃賄地匪爲鄉導、於二十六日辰刻、一面分股挑戰、一面令悍賊暗由七星溝蜂擁而來、世臣兩面受敵、身負重傷、團衆賈其餘勇、生擒賊匪三人、斬首二十七人、礮斃二人、幸遇對河天寶團勇來援、世臣乃麾勇丁、蟬聯橫渡、萬堯酣戰、未及渡河、衆寡不敵、被賊刺喉、支解而死、斯時木城人、盡逃避南安、閩壩賴以全活、二十七日竄去、邑增生張君樹勛、弔萬堯詩云、境內聞氛恐後行、殿奔殺賊恥偷生、時人莫道尋常事、爲國捐軀是俊英。

余濟村曰、鄭君死難情狀、並張君等勤勞受傷事實、由張生太芝處得傳太遲、斯時刻版將竣、故補錄於義部之后云。

田字康

田君字康、夾江田堰人、性純孝、家貧好學、少應童子試、屢列前茅、未售、常舌耕以養親、咸豐庚申秋、滇逆犯夾境、康父文炳、時正臥病、命康逃避、康守候哭泣不忍去、賊至、文炳命康匿他舍、賊搜得之、康罵賊不屈、身被數鎗、投池死。

余澹村曰：此傳得之王君環如處。其時義部刊刻已成，故附錄於此。



# 蜀彙述略卷六

金堂余鴻觀瀾閣編輯

## 烈部

殉難婦女貞烈同傳。塗山鍾靈，正氣幹旋。紅羊劫換，恥爲瓦全。賢媛命殞，閨秀軀捐。至死不變，大節昭然。述烈。

### 徐周氏

高縣徐周氏幼從兄讀通經史。善吟詠。咸豐己未，李逆犯境，氏被俘，李悅其色，欲取以充後房。氏佯許之。至夜，投簪井死。檢身旁獲一黃紙，上書七律云：燄火雷飛墮女牆。閨中少婦九迴腸。見危致命夫先死。蒙難艱貞妾未亡。願作鳴鴛栖拱木。詎隨飛燕入昭陽。青山安得同埋玉。化作冤禽繞塚旁。李逆厚葬之。後同邑有自賊營逃歸者，傳其詩，指其葬處，族人哀之，遷其柩與夫同葬城南。

余濟村曰：咸豐七年，高縣吳家壩桐樹結子，大如升，圍六寸，或似刀劍形，長尺許。

八年、居民多聞戰鬪聲。牛犬夜號、

戴朱氏

健爲戴朱氏、子壻人、性貞靜、不苟言笑、咸豐庚申二月、滇賊竄五通橋、氏偕夫攜女逃避、中途相失、至楊花渡、賊迫近、婦女匿小艇中、爲賊所逼、驅三女於河、共沉水死、

尹烈婦

大足縣民尹仁全妻譚氏、仁堂妻楊氏、妯娌也、咸豐十年、滇匪攻縣城急、譚語楊曰、若不能避、惟死爲上策。七月入其鄉、譚偕楊赴池中死、五日賊退、家人檢其屍、貌如生、

摘錄大足城防記

咸豐庚申五月、李逆踞牛腹渡、遣王僞統領由榮昌逼縣西界、城中震恐、署邑篆吳通守文嘉、乃籌防具、二十四日、竄三溪鎮、二十九日、燬三驢場、七月朔

抵城外較場、踞演武廳、賊大旗爲雷、擊倒。初三日、賊移營去。初四日、竄龍水鎮、至玉龍場、銅梁團總任思銓戰敗。二十一日、饒知縣爾靖接事、仍籌防練、饒春榮者、都司祝良芳逃勇在縣、饒縣君有練勇三百、屬伊管帶、春榮協團堵禦、見賊先奔。十九日、賊竄中鰲場、城中戒嚴、官紳皆登城守禦、春榮獨置酒狎獵、爲汛官張登魁營兵檢執、局紳排解不獲、春榮縱勇百餘、持刀索殺登魁、經局紳叱退、旋掠汛署一空、饒縣君以賊近不問、登魁疑不直已、次夜乘醉入署、刀傷縣君頭額、斷其拇指、各團勒勇鎮壓始息、次日張逆抵城下、督衆圍攻、春榮已暗投逆、印官因傷臥牀、汛弁蔽法在獄、城如累卵、幸委查保甲之李大令、接署汛事之馬正剛、力爲部署、守備得以弗疏、越日圍解。十一月十一日、永川陷。二十九日、榮昌復陷。十二月朔、藍逆親率悍隊來攻、不利、張五麻子力持大足難破之議、移圍遂寧。初九日、彭紹幅踵至、外恃奸民、內通練勇、決意圖攻、賊屢分隊擊諸砦、罔不敗、武廟逼近南門、醉鼃之夕、有人聞廟內磨刀霍霍聲、次日、有無知男

子忽仆廟門、甦語衆曰、好爲善、勿畏賊、吾爲汝等殄滅之、語畢仍仆、人咸知荷武聖默佑、氣愈壯、明年元旦、賊縛燭龍、繞西門稱賀、語狎意汰、初二日、縋三百人背城搦戰、毀賊礮臺、初三日、札諸團峇刻期赴援、四城縋團勇出戰、大破賊巢、賊棄輜重、婦女宵遁、前後閉城六十餘日、堅守兩月、圍解、惟時丁勇餉源支絀、悉議撤去、乃按團每百戶出護城丁一名、每戶日給一錢以養丁、分四路管帶統轄之、

余濟村曰、大足棠香之國、爲古昌州地、庚申之亂、民團得力、甚於招練、則其人之勇悍可知也、至每戶日給一錢以養護城團丁、亦法之至善者也、又聞同治癸亥、大足倉粟、盡爲蟲蛀、甲子、斗米價至千五百錢、川中州縣、凡屯積蠶豆、外皮完好、而內已生蟲、爲從前父老所未見、至今猶然、論者以爲蠹賊內訌也、

縣令侍妾

丹陵縣令、劉運開之妾鄭氏、於咸豐十年八月十六日、藍逆陷城時、懼爲賊辱、借教

諭溫恭之母許氏、溫恭之媳康氏、均投水死。

榮昌縣令李某、於咸豐十年十一月二十九日、藍逆攻陷縣城時、不知死所、或云、雜糶入中、逃出、病歿壁山、其侍妾某氏、懷印投入井中、賊退、出其屍、面如生、此事係屈君達冠、親爲余言。

余濟村曰、州縣雖有守土之責、然有城無兵、情有可原、不幸城陷於賊、朝廷亦不重治、以失守之罪、縣令雖埋名病歿、而其妾之大節、已昭然天壤、是巾幗而丈夫也。豈丈夫而弗如巾幗也哉。

### 南安死難婦女

咸豐庚申、藍逆由洪雅寶子寺、走止戈街、過高岩、趨夾江境、八月二十五日、賊逼夾城、城中早已有備、守陣者施放大礮、賊先鋒大旂、應響而折、遂不敢攻而去、余過南安渡、遇垂白漁翁、言當日賊至時、婦女被逼投水者、不一其人、惜夾志無續編、談者又不能詳其姓氏、良可悼歎。

余濟村曰。夾江踞嘉州上游。人物山川。秀異魁絕。自漢費詩至明宿進。忠臣義士。代不乏人。民俗勤儉。有唐魏遺風。兼以五兀參差。千佛險巖。上捍長江。下蔽諸縣。苟扼要守關。雖萬夫莫開也。明季獻逆擾蜀。賊帥劉文秀。由丹稜洪雅入夾境。壁青衣江爲營。構浮橋濟師。周邑人鼎昌。樹木柵爲營。編亂草爲筏。伏人於中。順流而下。斷其浮橋。賊不得志。奔回。南安賴以全活。故至今猶多元明土著之家也。聞庚申藍逆未至時。北街有羅氏女。幼字明氏子。未婚而卒。羅氏矢志守貞。撫子承嗣。侍翁姑。生事死葬。盡哀盡禮。後歸母家。掃除淨室。日惟焚香誦經。母病。割股療愈。庚申之亂。氏於後園。朝夕焚香禱天。祈免闔邑劫數。五月二十七日。預囑家人曰。我將歿。三日後方殮。乃入經堂。焚香易服。端坐而逝。三日殮。面如生。異香滿堂。後於此壇屢著靈異。并示以八月二十五日午時。滇匪臨城。至期果如其言。幸城中先有準備。賊不得志而退。人民賴以保全。事平後。有人降乩。濟顯大仙臨壇。爲羅氏作讚。其辭有云。琴未彈琴而絃斷。不字守女子之貞。節以鍊而彌堅。成貞列

仙家之籍故都人士咸稱爲羅仙姑云。

### 峨眉烈婦

峨眉雄峙川南。鍾坤維秀氣。其形高峻。梵宇常自燬於火。故浮屠氏稱爲火山。縣屬婦女。類能以節烈自明。咸豐庚申。滇逆擾境。同時婦女殉難者。如傅文烜之妻羅氏。赴水死。董明生之妻某氏。自縊死。歐陽泰之妻林氏。罵賊死。又有傅羅氏。馮張氏。董王氏。薛袁氏。袁童氏。暨烈女熊清秀。均投河身死。不受賊辱者也。

### 黃彭氏

黃彭氏者。彭縣葛仙山民黃炳乾之妻也。咸豐十年九月二十六日。藍逆焚掠縣屬之艷陽場。逼葛嶺。氏束裝欲逃。甫出門而賊已入室。氏賺賊殺雞爲炊。自度不免。乃縊殺十四歲女。自刎於室。賊以衾並掩之。囑鄰媪曰。此烈婦也。我不焚其居。亦存汝室。賊退。炳乾歸。媪告其故而瘞之。

余澣村曰。江津有悍婦鄭氏。素不貞。忌媳礙目。逼令改節。媳堅不允。箠楚終不屈。

一日復逼媳。媳怒語相觸。婦縛媳褪下衣。烙鐵鉗刺隱處。登時斃命。媳家控治論坐徒。旋遇赦脫罪。時髮逆竄入縣界。婦被執。羣賊輪姦已縛柱上。以火柴貫陰戶。糜爛而死。以視黃彭氏之貞烈。爲賊所敬禮。何啻霄壤之別耶。

### 李唐氏

金邑趙鎮李德宏妻唐氏。家貧富有。咸豐庚申。藍逆竄趙鎮。宏令妻攜幼子渡河。匿族人家。氏甫渡河。誤聞賊殺其夫。痛不欲生。即欲投河。同伴有以家貲止之者。氏曰。生人之所重者義耳。貲財何爲哉。衆不及阻。遂攜幼子返投於河中。

余澚村曰。唐氏誤聞夫死。即投身清流。舍生何其速哉。然此猶曰烈婦殉夫耳。當時並有誤死於團勇之手者。不可勝紀。同邑萬安鄉沈氏子。世業農。年五十餘。因母喪蓄孝髮。長寸許。百日已屆。求櫛工剃髮。工云此孝髮也。宜取喜錢四十枚。沈吝不與。遂不剃。閱半載餘。長益甚。藍逆犯境。沈逃避縣城。門卒見沈長髮盈頭。疑爲偵信老賊。縛將殺之。沈嚇極。噤不能聲。適中表彭淡如秀才過見之。曰。沈某係



余爪葛。非老賊也。乃道其蓄髮之由。衆始笑而釋之。噫。當此之時。關勇殺人手滑。使彭過稍遲。則沈定作無頭之鬼矣。此可爲過吝者戒。而當日之誤殺者。恐亦不少矣。

又甲子蜀圍。有士子某。夜半從號舍躍上瓦脊。復登明遠樓。大呼曰。軍興以來。我爲團首。擅殺人。然皆誤聽關丁言。非我一人罪也。今寃魂索命。如催債然。何以償之。巡綽官聞之。命號軍縛臥樓下。放閣扶出。噫。可畏哉。又儀隴孝廉蔣山字靜軒。於壬戌郭逆犯境時。紮鐵帽砦以辟賊。時圍衆獲賊中裏脅數十人。將殺之。靜軒力救得脫。同治癸亥成進士。授安徽太平令。人以爲不妄殺之報。

張氏

金堂藍家店董長庚妻張氏。子二。長娶唐氏。生子絨。洪絨開。次娶陳氏。生子絨彰。咸豐庚申冬。滇賊犯邑境。踞藍家店。氏夫偕二子先逃。氏與媳不及避。賊至。度不得脫。恐受污。舉火燔其室。二媳三孫俱灰燼。同時藍家店徐玉芳妻張氏。賊至。拉去三子。

氏大罵賊怒斷其臂撲河堰死

莊淑英

淑英金堂人莊君國瑚之女穎敏工吟咏嘗賦孤雁句云舊侶情深難自遣江潭羞共影雙飛年十八歸凱江泳祚吳氏伉儷甚篤一以女紅爲事故其詩罕有傳者咸豐庚申滇逆寇蜀川南半壁皆爲賊巢泳祚貿易邛雅間半載絕耗相傳已陷賊身故女聞誓不欲生父母再三勸諭謂翁姑既沒吳氏宗祧責汝一身不可過用悲悼女因節哀徙家依母十月藍逆擾趙鎮避亂人家咸以婦女爲累英乃私市酒脯夜設泳祚位於室祭之作絕命詞十首雉經焉其女姪慧珍常次韻弔之云藁砧南望路漫漫金鼓聲喧蜀道難遺恨不須嗟薄命磨笄山下首重看螺黛拋殘淚眼傾鈿釵重合誓他生春風野祭無人管腸斷孤墳傍女貞而淑英原作絕命詞不傳於世惜哉

懷烈婦

烈婦姓劉氏、金堂吳發士妻也、世居懷口鎮、鎮爲宋時懷安軍故地、倚山臨水、人煙輻輳、百貨叢集、咸豐十年冬、藍逆由橫渚關下竄懷口、氏家人先避去、氏以有身未及逃、賊猝至、曳氏裙欲辱之、氏誘賊入後林、推之圍中、滅頂幾斃、躍起大怒、以佩刀擊氏、負重傷死、

同時有范氏者、亦鎮人、卓成榮妻也、聞賊至、偕鄰婦走避、賊邀截欲污之、氏不從、躍水死、

余濟村曰、婦女之美者、賊欲逼污、非善激賊怒、賊必不忍棄置、鮮有不被其污者。昔聞明季時、某郡破後、某先達入城收葬遺骸、見一女子、赤身縛柱上、偏體俱受烙、一無完膚、乃歎曰、女子何術、能令賊怒若此、嗚呼、若劉氏者、其庶幾乎、不然卽如范氏計、投諸清流亦可、

### 王氏女

烈女姓王氏、金堂土橋溝民陳衍貞之子、來清養媳也、聘未成禮、女年十五、平時言

笑不苟、聞警、即語人曰、賊至有死而已、名節所必全也、庚申冬、滇賊何逆犯境、女隨舅姑避居山岩、賊破岩、女從岩塚高數丈捨命撲下、得不死、奔赴大佛寺河岸、遇賊、斃其色、甘言誘從、女罵而唾、奔愈急、賊怒、戕其背、女負傷奮身投河死。

余潘村曰、去金堂治西二十里牟池鎮、明楊升菴先生祖塋在焉、有寺一區、中塑燃燈古佛、甚靈應、同治壬戌暮春、滇匪犯秦興場、鄉民大恐、莫知所嚮、咸集寺中、禱佛救護、次日賊果遠颺、一鄉無恙、遂於是年冬、醵金重修梵宇、刊碑以紀其事云。

### 鍾李氏

鍾丹桂妻李氏、幼字淑貞、永川李君學柏女、同邑舉人鍾君烜長子配也、氏未字時、川疆倭擾、家人深以弱質爲憂、氏方手亦切鞋、因誓曰、賊不至幸甚、至當以此亦死、家人咸哂頷之、咸豐八年、於歸鍾室、克盡婦職、孀姑愛惜之、十年冬、張逆陷永、氏避居城中、知不免、引刀自刎、氣未絕、蛇行入宅後穴中、十有三日、掬穴中泥漿飲之、賊

去二日始出、泥首穢面、衣血模糊、姑至不識、氏呼曰、兒在此、母何來、相向哭、痛不成聲、繼乃嗚咽備言其狀、旋冒風創發死、年二十三、事 聞得卹、祀節烈祠、

陳家修曰、士大夫讀書時、動言以身許國、一旦猝遭變故、多苟活自全、烈婦何人、乃克踐其言如此、此非義激於中、百折不回歟、其行足愧世之居官而忝臣節者、匪獨巾幗無與倫已、

嚴氏母女 姜氏附

烈婦嚴陳氏、南溪縣職員、嚴君其沛妻、賦性溫恭、通曉大義、咸豐十年十二月十五日、滇匪張五麻子、竄擾縣屬之留賓場、時其沛帶團勇守境堵禦、賊猝至、擄婦及其女二姑、賊逼污之、婦女二人、大罵不屈、賊怒、殺二姑而支解之、婦亦投水死、同時邑民有楊天陞之妻姜氏、聞賊至、避匿炭祠、賊招之不出、被烟薰死、

余濟村曰、南溪不過戎州一小邑耳、當咸豐滇逆之亂、紳勇死難者二百餘人、婦女殉節者三十餘人、足見我朝教澤覃敷、不遺遐壤、誰謂十室之邑、不有忠信哉、

又按富順志畧。咸豐十年七月。五里瀘賊出竄井地。南溪知縣唐炯截擊之。營於天池寺。僅二千人。賊以數萬攻之。唐壁堅甚。不能撼入。夜間。唐公潛令所部。自山後數里外。佯呼楚營兵至。人人持一火燭。問唐知縣營。賊疑楚軍至。遂不攻而去。

### 任楊氏

楊氏。彭縣川禾里民任貴元之妻也。咸豐十一年春。土匪朱爾玖。結連封團作亂。氏隨夫遠避。中途遇賊。脅夫去。並逼氏行。不從。乘間抽賊刀自刎。同時避連封亂者。孟天元之妻強氏。偕一子一女。罵賊投井死。周辛娃之妻廖氏。負幼女亦投井死。王尙文之妻朱氏。自縊死。

### 附錄彭縣續紀通山會匪事一則

朱爾玖者。崇寧人。以妖術技擊惑衆。勾結崇寧二縣民。立私團曰連封。黨羽蔓延。遂於咸豐七年十月。燒竹瓦舖。爲亂不果。大吏亦不問。九年冬。督憲曾公。因滇匪

入川訪求諸縣材傑、賞給朱爾玖、及彭縣附生周光謨、監生劉鑒章、並四品軍功、頂戴縣民譚隆魁、初入連封黨、隸白旗、十年六月、大憲調連封團衆禦賊崇慶州、之元通場、郾縣衛伯林戰死、譚隆魁始統白旗、九月、賊渡河、連封團衆挈老幼奔避彭縣之西山、掠難民軍械、殺無辜、遂生蟠踞志、十一月、邑紳周濂、劉鑒章、周光謨等、於永定場練同儻勇、呂調陽、胡洋等、於瀝春場立正義團、易象、劉楨等、於西山立通山團、皆爲連封團備、而通山多連封黨、且多匪類、十一年、官差捕連封黨、寘劉興於獄、連封懼、遂反、正月二十一日、殺通山團總劉大經、廖體嚴、執劉楨、欲川之、尋逸出、與易象俱逃、二十四日、胡洋率正義團擊賊仙居里、爲賊躡敗、二十六日、縣幕柴均率練勇擊賊牛蹄橋、遇害、二十七日、新繁汛江思山帶勇、遇賊於彭之北門、反走、二十八日、賊圍彭城、索劉興、予之、守陣皆下、遂調同儻勇入悍城、劉鑒章、周濂、請令城中民畫地自守、分所統作游兵巡城、捕內應、衆志始定、二十九日、賊攻城、城上開礮、斃賊數十人、賊驚潰、初生員某、走謁新繁令程公祥棟、陳

三路平賊策上之制府。二月初二日，黎統軍率楚勇敗賊北關外。絳州牧唐公炯率播勇駐縣竹。十二日，唐軍聲言攻紅崖子，返旆從高境關入，直搗河壩場。賊巢十三日，賊分路南竄。一劫濠陽，爲官軍擊敗。譚隆魁率餘黨竄郟之花園場，署令李公吉壽乘窮盛招之，諸譚縱殺隆魁，戮其屍。越五日，候補直隸州恆公泰搜獲朱爾玖於崇寧，殺之。東路賊俱就撫。

張封二烈婦

張向氏，中江興隆場張賢壯妻。咸豐辛酉三月，藍逆踞場，氏逃匿石泉場之朱家崖。賊至欲污之，赴崖死。又有舒氏，本漢州人，適中江封全宗。賊至，與向氏同時併命。余濟村曰：中江有涂魯氏，榮夫孝早死，魯青年守志，事姑撫穉，仰十指爲生。世居王家砦。藍逆至，執兒去，魯投於池，幸淤淖得不死。比賊去，亟起省姑，姑已畢命，魯大慟投纜，或解救，且謂之曰：姑露不葬可乎？乃爲掘土成墳。此時十歲兒雖從賊行，性頗慧黠，暗取道旁紅石，縱橫鑿劃，默誌歸程。晚宿魯班橋，卽混入倉竇中，與



犬子同臥。天明賊失兒，知必自匿。以矛亂搗倉竄。聞犬噪，乃掃糞去。見出，跨賊棄牛以歸。母子相見如夢。遂移居西寨山下。

鄒氏

鄒氏，中江人。朱秉堂之妻。咸豐辛酉三月，藍李賊至，氏恐被辱，奔立門首池岸，爲可死可生之計。已而賊果斃其美，挑以穢語，氏知不免，忿誓投池，氣絕。三日後，朱歸取殮，貌如生，年僅十八。

余澹村曰：中江南鄉吳興基。乾隆末年人，幼好拳勇，得少林宗法。嘉慶初，蓮匪作亂，僞稱官軍，突入大縣，斃一人於市。將焚炙焉。興基挾弓矢入賊營射，賊辟易，或墮溝中。賊請兩無所犯而去。自是名噪遠近。凡思保鄉里者，均遣子弟執贄焉。諸大帥皆慕興基名，爭欲羅致門下。久無所就。時作道人裝，與人談忠孝事，焚香禮佛。以禱母病。或賣藥滇中，伏熊於金沙江，土竊余姓，爲患行商。服興基一言，卒爲善士。晚年喜靜坐，尤精醫術，好施與，活人以數十百計。壽七十二歲，無疾終。藍

逆犯中江時。邑南智勇之士。練團殺賊。皆興基之遺技也。

### 曹李氏

中江胖鎮李氏。曹大興之妻也。咸豐辛酉。張逆犯鎮。大興被俘。李預登砦得免。一子年甫毀齒。提攜不離左右。賊退。偕子歸家。人言夫已被害。李聞號泣。痛不欲生。一夕浴竟。禮神自縊。卒。時年四十。族鄰哀之。厚其殮葬。撫養其子。是年冬。大興自賊逃歸。聞妻爲己死。慟甚。每對人言。猶泣然流涕也。鄉先生某輓詞云。乾綱秉義爲重。坤德安貞自持。殉難從夫志不移。清風亮節誰匹。宗承斷臂爭烈。操守投巖甚奇。玉碎珠沉死得宜。人間再醮無恥。

余澣村曰。烈婦殉夫。猶忠臣殉國。三綱之所以繫命也。聞賊將犯境。而郡守縣令皆先出。遂使名都大郡。相繼淪亡。求其如李氏之殉而不可得也。噫。

### 無名氏

太鎮破。有無名氏女。爲賊所得。不從。厲詈百端。賊剝其衣。以巨竿倒懸城上。死。有文

士以詩弔云、未必生存也、有節、可憐、做鬼尚無名、胡炳奎先生、爲短歌以哀之云、太鎮城西有烈女、罵賊不三、瞋目視、賊褫其衣、竿殺之、露出本來清白體、肝腸片片、鑄成、妾心豈止古井水、斷舌抉目只一死、泉下笑賊技窮矣、

### 酒妓

太鎮舊有酒妓、相傳始於明官紳至、召以侑酒者、有某氏家貧、爲母所鬻、及成人、商賈爭致、中歲從良、年踰五十、恆如三十許人、黛眉山遠、媚眼波橫、風姿頗不惡、太鎮破、一賊見之心動、將脅之、婦罵曰、賊奴子何妄哉、汝爲我子可矣、賊殺之、得旨建坊、胡炳奎曰、或謂女初爲酒妓、似不宜勒名綽楔、余曰、唯如此故可傳也、妓女從良、卽以凡論、渠能如此、則知以前所業、非本心也、

### 劉玉瓶

辛酉春、賊入射洪、邑令劉某、走潼川乞師、夫人李氏、及女玉瓶死之、先是賊破太和鎮、距射城七十里、烽煙相望、勢甚猖獗、民無固志、玉瓶與母夫人逆知城不可保、前

一夕沐浴焚香於大士前。作絕命詞十首。錄存其半云。纖手焚香泣告天。阿嬌底事委花鈿。掃眉未遂閨中願。虛度韶光二八年。默默無言暗自猜。蛾眉何罪竟罹災。未曾修到梅花福。薄植如同千葉摧。三年素履步官衙。詠絮吟風寫物華。無那文章惜命達。殘紅狼籍海棠花。瓜期屆不賦歸來。每望山家淚滿頰。長別故園諸姊妹。香魂縹緲赴蓬萊。頂禮慈雲大士神。今宵百拜詎無因。他生誕降奇男子。不羨西方善女人。城潰投繯死。母夫人亦赴池死焉。

余澣村曰。此段抄自采葑集中。原詩十首。字多錯訛。疑傳寫之誤。故僅錄其五焉。

### 遂寧烈女

遂寧某烈女。談者忘其姓氏。咸豐辛酉。藍逆犯邑境。有賊徒四人。掠一女子於山店間。欲輪汚之。問其姓氏。女佯應曰。諸君但辨妍媸足矣。何行問名禮。賊喜女善謔。各懷和服之戲。行將野合。女紿曰。俟夜盡歡。盍取酒肴來。妾願謳曲爲諸君壽。賊喜。三人赴市辦取酒肴。一賊監女。倚翠偎紅調之。女曰。願爲君配。彼三人者。吾不願也。宜

乘醉圖之。賊悅，少頃，三人飲食備至，女含笑提壺頻酌，三人在迷沉醉，一賊殺之，抱女求歡，女復勸之以酒，令先登牀，卽自解衣相就，賊從之，女解衣滅燭，隱抽賊所佩刀，刺賊於牀，洞胸而斃，天甫明，女卽投岩死。

余許村曰：此女智勇深沉，比之銀瓶一擊，尤稱快事。

### 周蔣氏

蔣氏女，彰明人，性慧，幼讀書，通孝經論語。適同邑周瑞雲，茂才，伉儷甚篤，生子二，女二。咸豐十一年，藍逆蹂躪江彰，瑞雲屬蔣氏曰：汝婦人孱弱，早攜子女避西山，我荷戈守城以禦寇。氏壯其言，從之。三月二十八日，賊破彰城，瑞雲被擄，氏未聞耗。是日賊遂分股抄山，獲氏，迫與偕行。氏知不免，向母族兄嫂叩頭私啓曰：吾兒逃去，生死維命，吾女尚幼，長成待嫁，瑣細煩代營之。我義不受辱，淚泫泫下，強拭。反身與賊同行，約數武，過板橋，躍身投觀音灘巨浪中。賊駭極驚散，婦女獲免者數人，瑞雲之被擄也，脅往縣州，不知氏死耗。賊令采薪不從，令當識字，亦不從，以文弱未卽殺，遂憂

憤成疾。值賊拔營棄之石馬場沙礫中。遂匍匐赴水死。與蔣氏死節同年。而瑞雲在六月中也。

余澹村曰。古有相約以死者。雖死猶相知也。今蔣氏之死。瑞雲不知。瑞雲之死。蔣氏又不獲知矣。悲夫。

### 陳張二烈婦

灌縣陳作州妻董氏。辛酉滇匪犯境。氏隨夫攜子一女二。避難越七條山。過渡不及。賊追迫之。將夫與子脅去。氏偕二女投水死。同時張世平妻劉氏。奉姑避難。行至郫屬之雙毛廝地。恐污。投身廁中死。

余澹村曰。咸豐庚申辛酉間。滇逆屢犯灌邑。其時民間婦女。有被殺者。有自縊者。有自溺者。約計百餘人之多。藉非得坤維正氣。安能如是之舍命不渝哉。

### 耆姓二烈婦

耆姓二烈婦。一耆乘川妻張氏。一耆乘忠妻楊氏也。居什邑徐家場。世業耕。兩家街

字相望。二氏年十六七，歸壽爲妯娌，甚相愛，居常事翁姑，潔膳問寢，必相偕，及生育子女，又相等，里中嘖嘖稱二耆賢。咸豐十一年四月二十日，李逆竄徐家場，鄉人紛然逃避，川忠兄弟倉皇負父母出走，囑二氏隨行。二氏曰：「可急奉二親去，無虞我輩也。」我輩及逃則逃，不及逃，死而已。於是各攜一子一女出郊，他適，遙見烟焰彌天，旌旗蔽野，知賊已近，二氏度不能免，乃並坐蓄水塘岸以俟。俄賊至，遂各攜子女自沉。死及賊退出屍水中，已三日矣，顏面如生，觀者咸嘆息之。

### 李秀秀

咸豐辛酉，賊長周辟子，竄鶴遊坪，據一處子，姓李名秀秀，周逆賞與隊長，席坐隅爲妻。席在賊營，掌火藥，同事合婚之夕，女暗藏利刃於懷，先寢。俟席登牀，抽刃洞其小腹，大叫而絕，旋引燭燒局，火焰冲天，賊咸來撲火，女趁火外逃，爲巡賊所執，自刎死。

### 什邡兩烈婦

什邡農人鄒正揚之妻程氏，年二十許，性幽靜，咸豐辛酉，圍賊入境，劍孔子於背，同

民婦十餘人，避荒野，遇賊於途，俱被擄。賊逼淫諸民婦，將及程，指賊大罵，賊利其色，叱曰：「從則不殺，且與爾金。」氏厲聲曰：「殺便殺，豈從爾作狗馬？」賊怒，先斫殺背上兒，氏拾石擊賊，兩賊持氏臂曳之行。氏力扳陌上桑，拒且罵。賊斫桑倒，氏仆罵益厲。賊怒，刺其喉，支解之，賊去。衆婦脫歸，悉道氏烈於其夫，覓屍瘞之。

同時農人王玉京妻鄒氏，被執不屈，罵賊遇害，賊掩其屍，血書好婦人三字於壁。

附錄茗餘新話長毛怪一則

什邡王家祥，年十五，被擄於賊，身有團號，將磔之。有紅衣賊蔣姓，喝止，收作子，派隨某醫，一日擦巨鎖，獲藥滿筐，色製精美，以之治賊，立斃。值蔣病，藥之亦死。賊首怒，斬醫，藥多人皆無生者，無病者試之亦死。自是無敢用肆中藥，下令采生料，以此病多不治，死亡日甚。王仍供使他醫，數逸不得隙。至綿州，賊截水灌城，日久防疎，王竊逃，至天曉，仍在壘中，不敢歸舊所，伴雜打糧賊，竄入一大宅，釜中雞豚方熟，室空無人，羣賊就食，王方握盞，腹疼如廁，既返，廚食者多死，或奄息於地，大駭。



奔出、匿身墻隅荆棘中、抵暮月出、來十數人、剝死賊衣裊、全體摻括、拖棄大廁內、覆以草、仍入廚、少間各去、王饑甚、入廚、雞豚畢具釜中矣、懼不敢食、徘徊出戶、見一怪從廁中出、頭大如五石甕、面黑目赤、閃閃有光、遍體毛長拖地、高不三尺、蹣跚而行、毛掃落葉、獵獵有聲、口噴噴鳴、似猶咀嚼、王駭極、伏楹下不敢動、怪趨牆東、久之寂然、家祥始出狂奔、天明始脫於難、後披緇爲沙彌焉、

余澗村曰、此怪不知何名、較獻逆蹂蜀時、抹臉魔、大頭瘟鬼、更足異焉、要亦戾氣爲之者耶。

### 黔江辛酉殉難婦女

黔江從九朱尙傑妻劉氏、於咸豐十一年八月、粵匪自彭涪竄黔境、尙傑全家避賊仰天窩、賊至、氏舉火自焚、子媳、廷楨妻陳氏、廷瑞妻向氏、及其女朱妹、均焚死、事平、縣大夫張公銳堂、旌其慮曰一門奉義、

同時白自芳妻黃氏、賊至先縊死、二女始自縊、李屏書妻支氏、避賊八面山、見賊至、

投崖死。貢生李田、輝母朱氏避賊槐香榿，罵賊被殺。程德藩女、姚開壽女，賊至俱服毒死。約計殉難婦女六十餘人。

余濟村曰：凡劫運將至，或前數年間，即見災異。咸豐四年秋，有白虹見黔江城。中縱橫無數，直入民舍。踰時乃滅。六年夏，地大震，鄉山崩。九年春，晝晦。民間俱掌燈。午食，冬豺入城。十年春，地鳴有聲如雷。十一年春正月，有物如虹，現於城廂。旬餘乃止。夏五月，有星質如火，光芒數丈。六月，慧星見西南。是秋，粵匪陷城。

### 胡二姑

安縣田家碾胡二姑，年二十，許配國學康步雲爲妻，伉儷甚篤。辛酉八月，藍逆爲大兵，戰敗，竄入康宅。其夫扶父母疾，避荒野。二姑蓮步不能行，賊至被掠，欲污之。二姑罵曰：吾身如白玉，豈受汝污，爾等淫暴。神人共怒，譬如魚遊釜中。雖生不久。賊曰：汝不畏死耶？二姑罵愈不止，賊殺之。康生輓詩，有莫謂紅顏傷薄命，獨留青塚重荒邱之句。

彭縣殉難婦女

咸豐十一年秋，藍逆竄入彭縣之仁風里，里民封正榮妻周氏有子懷德，有女秀英，氏聞賊至，謂夫曰事急矣，速攜子行。吾母女決不遺封氏羞。夫與泣別，遂攜子遠避。賊去夫歸，見氏及女俱死塘內，面色如生。氏年三十九，女年十四。同時廩生沈清源妻楊氏，年五十一，賊至率其媳沈樹軒之妻馮氏，孫女玉蓮同投井死。馮年二十八，玉蓮年十一。

永定里民歐陽裕鵬之妻，年二十八，同叔祖母黃，避賊瓦廠溝，賊入山擄掠，知不免，牽幼子俱投山塘水中，淺甚。氏以一手按子，俱淹斃。同時歐陽榮斗之妻，年五十二，見鄭氏母子均斃，亦自投塘水死。

鹿平里民某之妻姜氏，於咸豐十一年四月，因夫已陣亡，撫幼子居守，賊至，負子投河死。

禾川里民劉德生之妻，年二十四，賊入境，德生同團衆禦賊陣亡，氏聞忿不欲生，越

日負幼子避賊、望賊至、解子臥於地、投水死、

同時曾文壽之妻某氏、年二十四、從夫避賊於城西十五里之羅漢寺側、突遇賊至、不及逃、見夫被殺、攜幼子投水以殉、

鳳樓里民葉維錫之妻、年三十五、賊入境、氏負幼女隨夫逃母家、途中猝遇賊掠夫去、氏忿、投穆家泉死、

同里羅應普之妻、年五十五、賊入境、氏同子正蛟、婦朱氏、攜幼孫逃避、賊突至、正蛟被殺、氏同婦並孫宣娃、福生、孫女滿英、代英、俱投羅家泉死、

敖家場歐陽榮開之妻陳氏、賊至、其夫被殺、罵賊遇害、氏投母豬泉、賊援之起、復投娃娃泉死、

華園里民胡志仁之妻羅氏、年三十二、賊至、擄辱、攜二女、長九歲、次七歲、同溺死、張金富妻陳氏、金貴妻樂氏、賊入境、俱負幼子弱女、同金貴逃、行抵朱家車塘、賊猝至、金貴被執、樂氏陳氏擄辱、各攜子女投泉死、金貴、給賊綏縛、俱溺焉、王文興之妻、年

三十四、賊至被掠、行五里、過觀音泉、乘間躍入泉中、賊怒、用矛刺死、廖振元之妻李氏、年三十八、賊入境、氏攜二女遠避、行至漢州中興場柳擔堰、遇賊擄辱、母女三人、俱赴水死、唐吉隴之妻年五十、攜一女避賊馬槽溝、女被擄、氏挽之不釋、賊並殺之、周紀全之母、年五十、賊至、紀全被殺、氏忿、投水死、趙世喜之妻、年四十、同子婦萬祥之妻尹氏在室、賊突至被殺、積草駢兩屍焚之、監生焦應錫繼母、年八十、亦焚死、同時烈婦投水死者三十餘人、自縊死者十餘人、烈女死者亦十餘人、

### 廖王二烈女

咸豐十一年十一月十六日、滇匪自丹稜敗竄、郫邑漕溝壩、廖姓舉家俱逃、一女年及笄、欲走而賊已及門、賊睹女少艾、迫之、女笑曰、此非枕席地也、因給之屋後、屋後一大塘、遂投水死、陳家場王姓一女、亦待字未嫁、賊至料不能脫、投屋側大河死、比賊去、其家人各得屍斂之、皆容面如生云、

### 王烈女

咸豐辛酉十一月二十一日、官軍敗藍逆於彭邑濠南、賊勢窮蹙、回竄什邑永興場、團首王君璽、督團丁追勦、維時霜月盈天、指僅欲脫、五鼓直指場頭、賊已遠竄、入場招撫、見店中偃臥一女子、年可十六七、髮漆膚脂、呻吟欲絕、詢之、不能辨、視其頭顱、血流凝髮、二刀痕如蒸餅裂十字、深可見腦、項後一刀、長幾二寸、深亦如之、乃呼室內老嫗問之、嫗曰、此女來時、自稱姓王、邑之李家灣人、賊至時、合室俱逃、女避不及被擄、乘間投水、賊拯之、逼其行、女大罵、賊忿、連斫其腦、撲地死、移時復甦、午後、賊昇至此、面腫如瓜、予畧詰之、爲賊呵禁、至夜賊欲污之、女罵益厲、賊以不遂所欲、復斫其後頸而去、王君聞言、急呼隨團醫士調理、囑老嫗善視之、是夜竟死、街民爲具棺、葬於場後義塚、嗚呼烈哉、

徐嵩雪

徐嵩雪者、保寧人、新寧學博徐公松坪女也、父卒、奉母暨從弟春官居新寧、性聰穎、自經史外旁及詩詞、能識古今大義、事父母以孝稱、雖工詩而不落稿、人詢故、曰、筆

墨非閨閣事。不過以之陶淑性情。豈借此沽譽鄉黨哉。兄女二。長碧紋。次碧璫。早失怙恃。嵩雪撫愛之。朝夕訓以貞烈事。亦知大義。同治元年壬戌孟春十日。藍逆陷淞城。嵩雪及二女死焉。城未陷前一日。從容謂弟曰。事急矣。城必破。急出逃以存宗祧。女流不能逃。逃必辱。是夜。涕泣慷慨聚家人而誓之曰。我輩身非男子。不能執弧矢以殺賊。且先人曾爲此地學官。食國祿。亦無從賊理。閨門婦女不早自決。一旦城陷。家破。身爲賊虜。貽笑宗黨。死難瞑目矣。母聞大笑曰。汝能死。真吾女也。母手調藥。合家咸飲。而女與二女姪。是夜三鼓卒。次日城陷。春宣爲虜。越五日釋歸。入視母未甦。氣息奄奄。絕而復蘇。女與二女姪。死七日矣。殮日。嵩雪貌如生。上下衣褶縫紉完密。二女姪亦如之。姑姪咸未字云。

吳雪溪曰。士大夫平居談天下事。憂憤激昂。一旦遇大變更。名敗身辱者多矣。嵩雪一女子。當事變倉卒間。能先幾毅然自斷。施及二女。是亦可以愧天下矣。

### 繁江五貞烈

貞女張氏、彭縣教家場人、幼字繁江士人高元舉、同治元年春、標梅將及、而賊忽至、脅其兄弟數人去、女隨父母逃避得免、次日歸、驚魂未定、賊後隊又至、父母復攜去、聞賊逼近、女躍身清流、父急救之、幸賊從別徑過、女得無恙、昇歸其家、至夜始醒、又見賊燬民房、火炎徹天、父母再欲逃、女泣曰、兒累親、不如死、父母婉慰防之、乃破涕爲笑、佯許偕行、衆在門外束裝、女已潛入室自縊死。

烈婦何氏、繁江士人余懋周妻、同治元年三月、滇匪竊龍橋及斑竹園、烈婦牽幼子弱女、出門逃避、遙望麥黃堰林中、樹木叢茂、偕匿其中、賊蹶跡入、執之、意欲就污、婦抱子悲啼不釋、賊奪之、婦泣曰、我誓不受污、何顧子女乎、遂赴清流死。

神醫氏、新繁民高志良妻、滇匪擾清流場、衆皆奔避、婦從容鎮靜、屹不爲動、衆怪問之、婦曰、去亦死、不去亦死、與其死道路、不如死於家、賊至、自焚死。

三姑韓氏、新繁某氏之妻、滇匪犯清白江、三姑隨其姑逃難、賊逼近、驟難避匿、賊見其美、圍之脅行、三姑且罵且走、行至江邊、躍身入水死、明日家人獲其屍、面色如生。



侯氏、繁江民石盛新妻、滇匪之亂、氏遠避荒江、被賊擄去、不肯行、賊斃其美、扶之上馬、躍下者數次、誓不受辱、罵聲聒耳、賊手亦之、

綿竹馮左二婦

綿竹南軒里馮氏、處士羅字宿繼室、性嫻雅、識大義、敬事姑夫、善撫前男、鄉人賢之、同治元年、滇逆犯境、氏夫出未歸、獨奉姑逃避、路遇賊、欲掠之、命舍其姑、氏誓之、爲賊所殺、同里有左氏徐元九之妻、亦賢孝而美、賊掠之、命棄其子、婦唾罵不絕口、脅以刃、罵益厲、賊殺之、二烈婦皆有娠、其賢淑均爲鄉里所稱道、此壬戌年三月初九日事也、

計社庭曰、古今逆亂之際、狐豕之羣、肆其蹂躪、聞風者先逃爲幸、否則掠辱不免、誰敢逆詈、以身蹈白刃哉、馮左之死、雖死猶生矣、於此見可我朝治化之隆、一里之遙、遂有女丈夫二焉、

郎寶弟夏傅氏附

寶弟鄧都人、郎永興之女、年十九、同治元年、石逆竄縣境、被擄、誓不受辱、賊脅以刃、乃詭言入廁、投糞池自盡、同時夏本乾妻傅氏、亦被擄、乘間取賊刃自刎、

朱氏女

烈女朱轉弟、金堂趙鎮儒醫朱君星樓第三女也、生性明敏、幼字里人熊德曙、未成婚、即遇藍逆之變、庚申、賊竄趙家渡、星樓攜家遠徙、女遂隨父、避居敘永麻城中、壬戌四月十一日、髮酋石達開、由黔犯蜀、圍攻敘永城、城陷、女被擄、賊斃其美、欲辱之、女唾罵不絕口、賊拔其舌而亡焉、

余濟村曰、甚矣劫運之有數也。宋氏女、侍父遠徙、避本鄉之蛇豕、適遭異域之豺狼。豈非數有前定乎。漢州倪雲門先生、沉博經史、尤精選學、庚申藍逆犯州境、先生被執不屈、屢瀕於死而得生、乘間逃出、挈家避居州城、領了卯鄉薦、兩度公車報罷、歸而授徒鄉里、似可稱劫外叟矣、乃其後復死於金輪強暴之手、豈真數不可逃乎。

李氏女

魯生名誠者，敘府珙邑人，年弱冠，舉茂才，娶高邑監生李源女，年十八，工吟詠，惟詠鴛鴦云：柳塘花塢任飛揚，相逐相呼共集梁。連理枝頭無別恨，畢羅何事繫鴛鴦。生見之，驚曰：詩寫性靈，何不祥若是。結縭三載，值同治元年李逆之亂，城破，夫妻均被掠，賊例有功者始授室，會有遷百長者，李逆將以李氏妻之，遂自縊死，未幾生亦逸去，感李氏節烈，對人未嘗不悼惜云。

余濟村曰：同治元年春，筠連珙縣界內有白蛾自西南來飛，如雪花，歷亂山谷，皆白，周圍數百里，至宜賓之橫江而止。後逆匪入川之道悉如之。蓋西方屬金，白主兵象也。

越嶲殉難婦女

吳胡氏，越嶲廳人，吳雍壽之妻，於同治二年二月，在中所壩遇髮逆追逼，恐受污辱，抱幼子投河死。同時周國棟女，年十二，懼辱自縊。王龍保妻吳氏，顏洪順妻唐氏，田

國華妻馬氏、均罵賊被殺、宋玉華母魏氏、年七十、火燒斃、金唐氏、夫婦皆被賊擄、氏給賊釋、夫抱幼子投河死、

竹路氏

竹培宗、蘆山縣人、妻路氏、女申蓮、同治二年二月二十七日、髮逆突至、氏攜女逃匿龍洞石穴中、賊搜獲、氏護女、罵賊受傷、女懼辱、先撲河、氏隨女投河、賊退獲屍、母女猶兩手相抱、

曹瑞雲

同治三年癸亥、春三月、髮逆賴剝皮、以石達開前鋒萬餘人、由川南突竄瀘縣之石羊場、沿途焚殺縣民、曹萬才、女瑞雲、年僅十四、賊入境、避於羊馬江邊、賊搜及之、欲脅去、女不從、賊欲抱之走、以爪劃賊面、賊欲負之行、以齒嚼賊肩、賊怒、刺其喉、棄屍江中、父母求而瘞焉、

黔江癸亥殉難父女

同治二年癸亥夏六月石逆餘黨李復猷自黔省王家沱渡河入彭水竄踞黔江縣城其時婦女殉難者如冉正秀之妻尹氏李仕進之女小妹見賊至均投崖死王任泰妻鄭氏杜珩妻王氏顏矮二妻高氏均罵賊被殺謝船戶妻雷氏賊至喚船不應亦被殺

余澚村曰妖由人興人心不善妖孽自作刀兵所以繼至也同治元年六月民間傳言有妖人剪鷄健羽七日後啄人立死市鷄大賤無敢食者又云男剪髮辮女剪乳頭已而果有髮被剪去者然當時剪去髮辮及食鷄羽被剪者究無恙不但黔江有此妖事卽成都所屬州縣亦有之余叔選廷有僕僮劉閏夜臥省垣寓中晨起髮辮剪去余親見之後亦無恙又有黃弗亭茂才夜半見白鷓飛入簷戶擊執之有紙剪繫鷓脚疑爲妖人作祟急焚之城鄉人情大懼女子競裹紅裙衣男子以赤繩繫髮纏之或云用硃書符佩之可禳其文爲饑饉饑饉四字按隆昌志載道光二十七年夏謠傳男子髮辮無故被剪時有飛蛾入戶鎖江橋有一婦以

穢物擊蛾墜地。視之，乃紙人也。胸有小印符，文不可辨。論者謂髮辮乃我朝定制。迨各匪入川，割人髮辮，其機已兆於此。

### 跋文附後

用心獨厚，行文亦佳，予竊以得士自喜矣。同學柳文洙拜讀。

濟村先生編輯此書，有功世教。光緒辛丑，自夏徂秋，排纂就緒，開雕於六月朔。都人士爭助板貲，咸欲先覩爲快。先生擬將諸君姓名彙齊後附列卷左，足見好善之心，人所同也。門下士江星璧謹跋。

光緒庚子秋，金堂余先生司訓此邦，提倡風雅，人爭嚮學。今年春，莊椿偕趙君伯瓏、叔璠、宿君景昭、雷君少庚、季君少浦、張君太芝、張君炳然、宋君梓門、蔡君調鼎、徐君聘之、築寬堂吟館，奉先生爲詞壇盟主，分題拈韻，詠史尤多，口講指畫，訓誨諄詳，同人獲益不少。先生嘗有詩云：榕陰如幕覆庭前，數本芭蕉補綠天。更喜升堂諸弟子，分題拈韻鬪詩箋。迨學使按臨嘉郡館，中半列茂才異等，莊

椿亦附驥其後、既而奉調、尊經書院肄業、先生編次此書、乃不朽之業、在椿愧未與校理之事、幸舍弟壽椿受業、先生之門、尙能左右其間、邑紳王君一心、杜君九峯、郭君星庭、王君環如、李君雲溪、咸樂贊成其事、伯瓏景昭諸君、頗能任分校之勞、莊椿擬於季秋歸來、以觀是書之成、斯時尊開大白、且讀且飲、亦人生大快事耳、

光緒辛丑初秋門下士幹莊椿謹跋於蓉城尊經書院之東軒

獨自獻逆蓮匪之亂、皆有專書行世、而咸同間李藍石三逆擾蜀、當時情事、卒無私家紀載、以著於篇、迄今四十年之久、不惟載籍無徵、即遺老亦不能詳言其故矣、若再數十年後、欲求其事之依稀髣髴而亦不可得也、先生此書、可謂有功於蜀矣、受業萬懜謹跋

